

Abosolo Dolö Amolia Hamoi Amo Ado Dëdëi Dibe Amoïe Neala Olelo Oboba

Uluguea Ado Mala Hedabi dafidi dëdëi amo dëdësa maadelahilä, hobeala beba elöwege Ulugu eamu dëdëi. Yesuïe Ado Mala Hedabi abosolo dolö ilia säla olelemäia Godeïe Gesamia idi olei.

Yesuea ado afädë säi amoda gowe. Eleloi Gesami e dili neebee gui maala ïe geloia dilile isogi nobamolömelë. Amala hamoseda, nïe Ado Mala Hedabi gaula Yalusalemege, Yudiamadige, Sameliamadige, sege föi sulubadelagi olelesa nawesa namolömelëla säi. Abosolo 1.8 bimalo.

Yesuea amala säi amo gadola ïe bëgëla aulo amolia Ado Mala Hedabi säla daidola nawesa nelo. Amala säla ïasebegi, dafidida Yu udia dolö hili ilimu Geleso sosogo nelo. Hobealada sege föi sulubadelagige Geleso sosogo aligisa maadela nelo.

Beba Abosologi afädë säi amoda, dafidi Bëdigosi Segeyogi Yesuïe bëgëla aulo sebea Eleloi Gesami digai amoge, amase, hobeala Eleloi Gesamia iilasila geloi ïasebegi, hamoi hamosa nelo amoge dëdëi dialea. Yesu selesaia mosöa awäla nebegi, Geleso sosogo nefolalo amolia Yalusaleme nea Ado Mala Hedabi säla daidosebegi, udia dolö yafie nefolalo amoli asigi besui.

Ilia Yu udia dolöïe sege sulubadelamadige Sameliamadige säla daidosa maadei. Aso, iliamu wagadi made sege odoa dibeamadige,

Olomomadige säla iia nawesa maadei amoie ado säla dödëla negei dialea.

Yesuea Eleloi Gesami ïmolömelëla säla negei

¹⁻² 13 33 Diofilasa-o, dafidi na bebagi dödëla negesaleada, Yesuea hamoi amoge, olelei amoge dafidi mi gäwia amila e selesaia mosöa fedala asi segeyo amoge dödëla negesa maadeimelë. Fedala made nea, ea Eleloi Gesamiie geloia abosolo dolö namiäia memelei amolima gomalä hamomalo, gomalä sämalola säla iaha maadei.

³ Yesu së naala baagolahilä, bu nowela abosolo dolö amolia e dofä nowei gabula helësëmäia e ulu-fadigila segeyo nabülasi biyidia ilibalä nea, Godea Beaha Maadela Sigi Neebe amoie ilima säla iaha nelo.

⁴ E, aso, ilibalä nea ea ilima sähalea, Dilia Yalusaleme dīgila mosabio. Naadoea ïmolömelëla säla negeila na dafidi dilima säla i amo imäia, gui beaha namialo.

⁵ Yoneada ödäea gesa nelomelë. Segeyo ede made nelolahilä, dili Eleloi Gesamia gemolömelëla säi.

⁶ Amo gala, ili gegedolahilä ema nabahalea, Dafidilo, Isilale udia dolö nilia nihili beaha namolö, nihilima ia obëgëmolö walio gogilela nabi.

⁷ Amala nabasebegi, Yesuea ilima säla obëgësalea, Naadoea hi asigia segeyo daiala negei amoie dawada, dilile made. Segeyo amo daialoda Naado hidomumelë.

⁸ Amai gaso, Eleloi Gesami e dili neebee gui maala, ie geloia dilile isogi nobamolömelë. Amala

hamoseda, nie Ado Mala Hedabi gaula Yalusalemege, Yudiamadige, Sameliamadige, sege föi sulubadelagige olelesa nawesa namolömelëla säi.

Yesu selesaia mosöa fedala asi

⁹ Ea ado amo säha maadelahilä, ilia ami beaha nebegi, e neala gauia adala selesaia mosöa fedai amo baidilia hagui amea, bu elö bimolöi made meli.

¹⁰ E fedala awäse amo gaalu, ilia muugi sisila nebegimu, dolö fagulo falei salugai äudä fodolofali maala ilibalä neebe meli.

¹¹ Amolea ilima nabahalea, Galili dolöla dili-e, mi edoie muugi sisilamu dialeala nabi. Amala nabalahlä elea sähalea, Yesu goda walio dili digila, e neala gauia adogola selesaia mosöa fedasebe amoda obëgëmolö. E selesaia mosöa awäsebe dilia meli amo gadoi wäla obëgëmolömelëla säi.

Ilia Yudasa bedefala dolö afädë memelei

¹² Amala säsebegi, ili segebi ëi Olibebidaia amila Yalusaleme obëgëi. Segebia amila Yalusaleme ga madefali, Yu udia dolöea segeyo Sabada gafegi nawelo amo gadoi.

¹³ Ili Yalusaleme besela galalahilä, mosö iso daia hogoli hili fisia ami fedala nogila digai. Amolida Fidage, Yonege, Yamesege, Äduluge, Filibige, Domasage, Badolomiuge, Madiasige, Alibiasaie malö Yamesege, Selodo sosogo Saimonoge, Yameseie malö Yudasage.

¹⁴ Dolö amolia Godema adomolö ili gegedosamu aligilo. Udia odoage, Yesuie eme Melige, ie edoolalige ilibalä amala gegedolo.

15 Amo gala asigi afädë negei sulubadela gegeadolada hädali afädëie nabülasi äudä gadoi sefolalebegi, Fidaea nowela nea sähalea,

16 Nedoola dili-e, Godeie ado siiba säla dädëla negei amo dofä gausiala digamolömelë. Yudasaea dolö nefolalo amolia Yesu gaumäia idi olei amoie Eleloi Gesamia Debidima aligilahilä bea säla negei amo gadola dofä gausiala digaimelë.

17 Yudasada nili sosogo nelo. Nihiligila hamoi gegekola hamomolöie e memeleimelëla säi.

18 (Yudasa hi nafade hamola muni nii amea sege afädë nofela nii. Amala hamola sege nia ami baagola digala bole dusula gahidado besela galai.

19 Amo hamoi amo hobeala Yalusaleme nefolalo amolia nabaha maadei. Amalebe sege amoie ei ilile ado sälada *Ageledama* negei. Nilile ado sälada heale sege.)

20 Fidaea sähalea, Gë Udälo bebagi ado afädë säla negei amo gowe.

Ïe mosö nalämäia. Mosö amogi afädë made
midiäiala
säla dädëla negei dialea. *Gë Udälo 69.25*

Amase, ado elö säla negei dibe amo gowe.

Hamoi ea hamolo negei amo elöea hamola bede-
famäiala
säla dädëla negei dialea. *Gë Udälo 109.8*

21 Amai gabugida nilia dolö elö gowe gadoi memeledelä. Amoda Dafidilo Geloi Yesu afu mafusa nelo amo gala nilibalä nawelo.

22 Yonea ödägi gese melëlo, Yesu neala gauia adala fedai melëlo nilibalä nawelo. Anea nilia e dofä baagola noweila dawadigi amo nilibalä sämolöie memeledelä.

²³ Amala säsebegi, ilia dolö äudä ëi säla negei. Dolö elö amoëie ëida Yosebe, odoaea ie ëi Basabasala sälo, odoaea Yasadusila sälo nelo amo. Amase, elö amoëie ëi Madiasile säla negei.

²⁴⁻²⁵ Amala sälahilä, ilia Godema adosalea, Dafidilo Geloj, dia sulubadelaie iso beaha maadei. Dolö äudä memelei amolegi afädëa Yudasaea abosolo hamoi idiadolasia amila bedefamäia dia afädë memelei amo olemalo. Yudasa eda hï segea awähalea abosolo hamoi dīgīla asi gabiola säi.

²⁶ Amala Godema adolahilä, elele ëi dëdëla salalahilä fofogolebe Madiasiie ëidale besela galasebegi, abosolo gïdälasi amolibalä giwi e baala namiäia memelela ifosi.

2

Godeie Gesami digai

¹ Yu udia dolöie molö nulo segeyo ëi Bëdigosi besela galasebegi, ili sulubadela mosö afädëgi gegedola sefolalo.*

² Amala gegedola sefolalebegi, fo geloiie goba gadoi aabela guula maalahilä, mosö ili fifigi sebea ami digala nobai.

³ Amala digala nobalahilä, nulo söale elile gadoi moge mogela ili sulubadela hïdo hïdolama aliligisebe meli.

⁴ Amalahilä Eleloi Gesamia udia dolö amoli sulubadelama nobalahilä, ilia fii odoäie ado säla besela gagalamäia Eleloi Gesamia sälasisi.

* **2:1:** Segeyo edefade Bëdigosi amoëie ëi elöda Sagaia Molö Hëhela Nelo Segeyo. Baagila Asi Segeyo molö nahilä segeyo nabülasi bia baagilahiläda Bëdigosi Segeyo besela galalo.

⁵ Yalusaleme ami Yu udia dolö Godeie mala nabelo sege föi sulubadelagi nefolalo amoli bobala asi ami sulo.

⁶ Udia dolö amolia goba amo nabalahlä, ili sulubadela gegedoi. Gegedoi amolia hido hidolaea nabelebe, ilile ado sälo amo gadola säsebe amo nabalahlä, ili sulubadela fudugi.

⁷ Amo nabala, ili edefademalä fudugilahilä sähalea, Wae! Nilile ado säla säha dibego ilida Galili dolö madefa.

⁸ Iliä nilile ado elö elöi amo säsebe nihili nabasebeweda, abeahäladu.

⁹ Nili Badialage, Midialage, Elamalage, nili Mesobodemia dolöge, Yudialage, Gabadosialage, Bödasalage, Esialage,

¹⁰ Filigialage, Bäfilialage, Isibilage, Libiaie sege Sailinimadilage, Olomola söfö misi amolige,

¹¹ Yu udia dolöge, udia dolö odoaea Yuie mala gaula mogolo amolige, Gilidilage, Alebialage, nili sulubadela nefolalebewema, ilia nihilile ado adola, Godea hamoi edefade hamoi amoie säla iasebegola säi.

¹² Ili fudugila asigi säosäolahilä sähalea, Goda edodula säla didigai.

¹³ Odoa nefolalo amolia gadiabola sähalea, Wani ödä gähe hamola negei amo edefadela naala gagaosebologa säi.

Fidaea Ado Mala Hedabi säla i

¹⁴ Amala säi amo nabalahlä, Fida e abosolo gidälasi amolibalä nowela nea ea ilima ado gelolafalä sähalea, Yu dolö dilimage Yalusaleme nefolalebe dilimage, amo hamoi amo säla idulä. Nie ado hedabola nabualo.

15 Dilia dolö gowe ili gagaosebela helësëi amoda amai mademelë. Segeyo walioda, aso, yosemelë.*

16 Go hamose goda dafidi bea sälo Yoalea säla negei amo gausiahamelë. Eada gomalä säla negei.

17 Godea sähalea, Segeyo aligila wagamolö ga madese gaaluda, na nïe Gesami udia dolö sulubadelama söga salimolömelë.

Dilile didiwi diefegelalia nïe mala olelesa namolömelë. Amase, dilile malö malisä amoliage sosoäla awäla elö elöla bimolömelë. Amase, dolö asigi fädäi dafidi neebe amolia simasimolömelë.

18 Segeyo amogimu nïe hamoi hamolasilo udia dolö amolimage na nïe Gesami söga salimolömelë. İlia nïe mala olelesa namolömelë.

19 Na muugi adogo hïdo elöi hamolasila naga föidaiage dolöea hamomolöi made gadoi hamolasimolömelë. Healege nulo söage höba buguge hamomolömelë.

20 Amase, Dafidilo Geloïie Segeyo Edefademalä besela galamolö amo, aso, made besela galala neëgi, esoge usila aubege bëlahilä heale uii besela galamolömelë.

21 Amala hamosegi Dafidilo Geloima damula mosöla säsebe amolida damula aulo gaula namolömelëla Godea säila

Yoalea säla negei amo Fidaea säi. *Yoale 2.28-32*

22 Fidaea sähalea, Isilale dolöla dili-e, ado sähago. Nabualo. Nasalese fii Yesuea geloi melëlo made

* **2:15:** Yosemelëla säi amoïe mida gomalä, Yu udia dolö amolia wani ödä yose made nulo.

gadoi hamolage, hido elöi hamolage, dolöea hamomolöi made gadoi hamolage, Godea Yesuma aligila dilibalä nea amala hamoi. Amala hamoi ameada e Godea odala äala hamoi amo hamomolö misi amo olei. Amoda dilia dawadigi nebego.

²³ Dolö amoda gaula imolömelëla Godea dafidi daiala negei amo gadola hamomäia fisigisi. Dilia e baagomäia dolö nafade hamolo nefolalo amolia e i fügäigi baala negemäia hamolasi.

²⁴ Baagoia e nafodomolö uli amea Godea baago amoie säa e fisigisimäia e nowela ifosi.

²⁵ Debidiage ie helësëla säi amo gowe.

Na beahamelebe Dafidilo Geloi e nebalä ga madefali namolöi namolö misi neebe meli. Nafadea ne neala fologolasiloea, ne gelolasimolöie e nie naabo dafädimadi ga made misi nea.

²⁶ Amalebe nie isogi edefade obeägilo nobalahilä na obeägi ado säi. Amase, nie domalogi hamomolö amo hamomäia na beaha namolö.

²⁷ Dia nie gesami baagoi uguli mosöa ami dögila made moholö. Die hamoi hamolasilo dihi memelela odai amo bauia ami made sigämolömelë.

²⁸ Dia ne namolöie idi oleimelë. Dia nebalä namolöi nebegoeada ne obeägilo nobalahilä obeägisa namolöla

Debidia säimelëla säi.

Gë Udälo 16.8-11

²⁹ Fidaea amala sälahilä sähalea, Nedoola dilie, nilile mäu Debidiie, na dilima fädäla sähago. E baagoige bauige. E bauri amo nili mia wi walio dialea.

³⁰ Dafidi eda bea sälo nebegi, Godea ema ado dofä gelola säla negesalea sähalea, Hobeafali

die mäu afädëa beaha aligilo flodaia samialam-
olömelëla säla negei amo Debidi hi dawadigi nelo.

³¹ Godea Afädë Memelei amo baagolahilä now-
ela ifosimolö amoie Debidia bea sähalea, Ìe gesami
uguli mosöa digila made moholö, ìe domalo bauia
ami sigämolö madela bea säla negei.

³² Amaimo, Yesu amoda Godea nowela ifosi.
Amo nilia beaha maadei amo säla ìahamelë.

³³ Godea Yesu neala gauia adala fedalasila ìe
naabo dafädimadi ifosilahilä, Eleloi Gesami ì. Ee-
doea Gesami ìmolömelëla dafidi säla negei amo ì.
Ea amo walio söga sali amo dilia siia beala gëhea
nabi amomelë.

³⁴⁻³⁵ Debidi eda selesaia mosöa fedai made gaso,
ea säla negesalea sähalea,
Dafidilo Geloia nìe Dafidilo Geloima sähalea, Na
die ado nii nefolalebe amoli di hawala
ifosimäia, dida nìe naabo dafädimadi awäla
salea, beaha samialola säimelëla

säi.

Gë Udälo 110.1

³⁶ Fidaea amala sälahilä sähalea, Isilale udia dolö
nefolalebe dili sulubadelaea hedabola helësëmalo.
Yesu e dofä dilia i fügäigi baala negei amoda
Godea e Dafidilo Geloï namiäiage Afädë Memelei
namiäiage ifosi amo hedabola helësëmalola Fidaea
säi.

Udia dolö yafie asigi besula ödägi gei

³⁷ Ado säi amo nabalahlilä, ilile isogi awäla
gäwilebe Fidala abosolo odoa amolima nabahalea,
Nedoola dili-e, nilia abilia hamomolödula nabi.

³⁸ Amala nabelebe Fidaea säla obëgësalea, Dili
asigi besula hido hídola Yesu Gelesoie ëigi ödägi
gemalo. Amala hamosegida, dilia nafade hamoi
amo hëla digila diligali Eleloi Gesami ìmolömelë.

³⁹ Godea ïmolömelëla säla negei amo gadola dilimage, dilile malö amolimage, udia dolö wagadi made nefolalebe amoli sulubadelamage ïmolömelëla säla negei. Dafidilo Geloï Godea e neebee misiäia wemolö amoli sulubadelama ïmolömelëla säla negeila Fidaea säi.

⁴⁰ Fidaea ado geloi odoage häila nabalöi hamoi odoage ilima gelola säla ïalahilä sähalea, Udia dolö nafade memelela made sulubadela hamolo walio nefolalebe welia së molö amogi dilila nüloea fisäla awäla asigi besumalola säi.

⁴¹ Ea amala säi amo hedabola häila nabi amoli ödägi gei. Segeyo amo gala udia dolö dausini ohodoa baai.

⁴² Abosolo dolö amolia mala olelei amo bögëla hamola digi, Geleso sosogo odoabalä dila nea, molö gedola nadigi, Godema adola digi, amo sulubadela ilia gelola hamosamu nelo.

Geleso sosogo nea mala hedabi hamoi

⁴³ Udia dolö sulubadela fudugila bedäi. Godea abosolo dolö amolima aligila hïdo elöi hamolasila, dolöea hamomolöi made gadoi hamola nawei amogi.

⁴⁴ Amase, asigi afädë negei nefolalo amolige afädëdi nelo. Hïdo hïdolaïe nelegei dilo amoda, ili sulubadelaïe ua gadoi dilo.

⁴⁵ Segege, nelegeige bidi nealahilä, mogela nelegei made amoligali ilo.

⁴⁶ Amase, segeyo sulubadelagi ilida Godeïe mosöamu gegedolahilä, hilile mosöa afufusa neada ilile iso asigi falagasei nea hiligila obeägila molö gegedola naala,

⁴⁷ Godeie ëi gauia adaha neebe amo bealahilä, udia dolö nefolalo amoli sulubadelaea obeägila melëlo. Segeyo sulubadelagi Dafidilo Geloia odoa asigi afädë negei amolida neala baalasi.

3

Dolö emo nafadei afädë wahilasi

¹ Segeyo afädëgi eso digase gaalu, Fida Yonele Godeie mosöamadi asi. Deadi amo gadola ilia Godema adosa aligilo negei.

² Amaimo, dolö afädë, ie emea neegela ägüsolo amo gala emo nafadei amo gadoi neegela ägüi, amo ilia sogobala gaula awäla Godeie mosö idi nogila digalo Aye Negei dibeä ami ifosisa aligilo. Segeyo sulubadelagi ea Godeie mosöa digasebe amolima muni ïmola sämäia ifosilo.

³ Fida Yonele Godeie mosöa nogila digasebe amo bealahilä ea elema sähalea, Alia ne muni ïmola säi.

⁴ Amala sälebegi Fida Yonelea ema siila nea Fidaea sähalea, Alima bimola säi.

⁵ Amala sälebegi e ïmolö gabula helësëla ea elema si.

⁶ Amala sisebegi Fidaea ema sähalea, Muni afädë gaui mademelë. Amai gaso, afädë gaui amo digali ïahago. Nasalese fii Yesu Gelesoie ëigi säha, di nowela nawemola säi.

⁷ Amala sälahilä ie naabo dafädi amo nabelela gauia adalasisëbegi, ie emo fodolofali neala gelolasi.

⁸ Nowela nila sadia adodogola asi. Amala awäla elebalä Godeie mosöa nogila digala, Godeie ëi gauia adala emo gumu sesegegila nawesa nelo.

9 Udia dolö nefolalo amoli sulubadelaea e Godeie ei gauia adala awäse amo bealahilä

10 ilia helësésalea, Godeie mosöa nogila digalo Aye Negei dibeami salea muni imola säha filo amo gabula helësëi. Ema hamoi amo bealahilä ili hame galalaia fedala fudugi.

Fidaea Godeie mosöa Ado Mala Hedabi olelei

11 Dolö amea Fida Yonelema gaula fëdöla nebegi, udia dolö nefolalo amoli fudugilahilä, Godeie mosö hadai dibeami baluluia mafui. Hadai amoda Solomonoie hadaila sälo.

12 Fidaea udia dolö mafui amo bealahilä, ea ilima sähalea, Isilale dolö dili-e, amo hamoi amogi dili fudugilahilä alima sisila dibegoda edoie. Amai dilia helësésaleada, alile geloiage Godeie mala mogola gaula neebeweage alia dolö gowe nowela ifosila helësésale.

13 Abalahamage Aisagage Yeigabage, nilile mäuge ilile Godea ie hamoi hamolasilo Yesuie ei ilibiamäia neala gauia adalasi. Dolö amo dilia dilile beaha aligilo neebea sigi gaula asimelë. Bailadi neebea sigi awäsebegi, Bailadia e fisigäla fisiga gamolö hamosebegi, diliada ema baagi iala golala melimelë.

14 Dilia dolö hedabi mogoifali hido elöi amoma baagi iala golala bealahilä, dolö nufidelo amo fisigämola säla didigai.

15 Udia dolögali Namolö Gaumäia İlo amoda baagomäia nufimelë. Amo baagolahilä Godea bauia amila neala nowela ifosi neebe amo alia siia melimelë.

16 Yesuie eigi asigi afädë negei amea Yesuie eia dolö dilia beala dawadigi amoma geloi i. Yesu hi

alile asigi afädë negei neala nowelasimelë. Asigi afädë negei amea dili sulubadelaie siigi e wahilasimolöi wahilasimelë.

¹⁷ Amai gabugi, nïe nedoola dili-e, dilia Yesuma hamoi amo fädäla helësëla made nea hamoila helësësa. Dilile beaha aligilo amoliage amala hamoila helësësamelë.

¹⁸ Amo gadola siibafali Gode e bea sälo sulubadela nefolalo amolima aligilahilä nea, ea Afädë Memelei amo së molömelëla bea säla negei amo gadola amala gausiala digai.

¹⁹ Amala hamoi gabugi asigi besula dilile nafade hamoi amo hëmäia Godemadi namialo.

²⁰ Dilia amala hamoseda, dilile gesami gelolasi-molöie Dafidilo Geloia e neebeala fu imolömelë. Amase, Afädë Memelei amo dilile namiäia dafidi odalasi Yesu amo dili neebea fisiga wemolömelë.

²¹ Siibafali Godea bea sälo hïle nafolai amolima aligila bea säla negei amo gadola, Godea sulubadela bu elö gähe namolö segeyo daiala negei amo gadola gausiala digamäia Yesu e selesaia mosöa beaha nea.

²² Siiba Mosesea sähalea, Dafidilo Geloi Godea dilile didoomadila aligila afädë bea sälo ne gadoi dilile bea sälo memelela ifosimolömelë. Amala aligiseda, dilia ie ado nabala bëgëla awäla hamomalo.

²³ Ie ado nabalahlilä made hamose dolö amolida Isilale udia dolö amolibalä made namiäia nufudala baagomolömelëla Mosesea säi.

²⁴ Amo gadola bea sälo sulubadelaia, Samuale neloa amila, bea säla negesalea segeyo waliowegi hamosebeweie bea säla negei.

²⁵ Dilida bea sälo amolile malöge, amase, Godea

dilile mäuma asialo made ado elöi säla negei amoie malöge nebego. Godea Abalahamama sähalea, Die mäuma aligila udia dolö fifi asi dibe amoli sulubadela neala obeägilasimölömelëla säi.

²⁶ Amaimo, Godea Yesu e ie hamoi hamolasilo namiäia diligalidale fisiga wei. Fisiga wei amoie mida gowe. Dilia nafade hamosa nebea amila ea sigi gaula obëgëlahilä obeägilasimäia fisiga weimmelëla Fidaea säla wagai.

4

Ilia Fida Yonele nafodoi

¹ Elea udia dolöma säla äaha nebegi, gobela ilo dolö nefolalo amolige, Godeie mosö idihë aligilo amolile beaha aligilo amoge, Sadiusi nefolalo amolige ele nebea misi.

² Elea udia dolöma Yesu baagola nowei amea baagoi amoli nowela namölömelëla säla olelesebegi, ili mihaläla misi.

³ Ili maalahilä ilia ele gaula nafodolahilä amogala gasisebegi, aiyo gudimölölahilä galabaia mosöa negei.

⁴ Amaimo, elea säla ä amo yafiea nalahilä asigi afädë negei. Hä dolö asigi afädë negei amoli gedolada dausini bia.

⁵ Segeyo elö aligisebegi, ilile beaha aligilo amolige, asigi gäwi dafidilo amolige, mala dawadigi amolige ili Yalusaleme gegedoi.

⁶ Gobela ilo Busa Edefade Anasage, Gaiafasage Yonege Alegisädage, gobela ilo Busa Edefadeie sosogo nefolalo amolige sulubadela gegedoi.

7 Ili gegedoi sebea ami ele ifosilahilä elema nabahalea, Alia hamoi amo edo geloia, nowëie ëigila hamoila nabi.

8 Amala nabasebegi, Fidama Eleloi Gesami nobai nea ea ilima säla obëgësalea, Udia dolöie beaha aligiloge, asigi gäwi dafidilola dili-e,

9 amai dilia walio alima mi nabi amoda alia dolö emo nafadei afädë ugila negei amoie nabi galëda, amai dilia helësësaleada, dolö emo nafadei amoda abeahäla hedabomolöi gabu.

10 Amai galëda, dili sulubadelaeage, amase, Isilale fii sulubadelaeage, mi fädäla helësëmolö di-alea. Nasalese fii Yesu Gelesoie ëia dolö wagadi nebegowe wahilasimolöi wahilasi amo dihili beasebegomelë. Dilia Yesu Geleso i fügäigi baala negei amo Godea bauia amila nowelasi amoda amo.

11 Igi amoda mosö olelo dilia galone hamomolöi made gabulahilä, memelela fisi amoda, galone geloi dafidilo besela galai dibeda amomelë. *Gë Udälo 118.22*

12 Elöea damula moholöi made neamelë. Sege föi sulubadelagi neebe amola nili damula moholö udia dolögali ëi elö made imelëla Fidaea säi.

13 Ilia beahamelebe Fida Yonelea gelolahilä bedäla made säsebe amo beala ele sugulu made hamoi, nelebo afädë oodo bealage made hamoi dolö nelo amo helësëlahilä ili fudugi. Fudugilahilä gaso, ilia helësësalea, ele Yesubalä neë melëlo amo helësëi.

14 Amala helësëlahilä ilia beahamelebe emo nafadei dafidi wahilasi amo elebalä neebe amo bealahilä, elema ado säla obëgëmolöi made meli.

15 Amalebe ilia ele Galisolö mosöa amila segea oodola doadigila mosalai. Ele asibua hilido didiäla

16 sähalea, Nilia malö äudä amolema abilia hamomolödu. Elea dolöea hamomolöi made gadoi afädë gelola hamoi amoda udia dolö Yalusaleme nefolalebe amolia dawadigisa maadei. Elea amala made hamoila sämolö uli gabu.

17 Amaimo, säla daidoloea, nilia ele nufulöie sähaleada, elema ei go säla udia dolö odoama bu säla imabiola gelola sädila säi.

18 Amala sälahilä ele welahilä ele maasebegi elema gelola sähalea, Alia Yesuie ei säla udia dolö odoama amala olelemabiola säla i.

19 Amala säsebegi, Fida Yonelea säla obögësalea, Godeie siigi, alia dilia säse go gadola nabala hamomolö amo dofeale ma, Godea säsebe amo gadola nabala hamomolö amo dofeale. Dilia memelema.

20 Amai gaso, alia meli amoge nabi amoge sämolö amo, made sämolö ulimeläla säi.

21 Amala sälahilä ilia elema säi amo gadola bu elö ele nufulöie ado gelolafali säla ialahilä ele nufulö fu made beasebegi fisigäla fisiga gai. Fisigäi amoie mida, udia dolö nefolalebe amoli sulubadelaea Godea hamoi amoie ie ei gauia adaha neebe amo helësëlahilä amai.

22 Dolöea hamomolöi made gadoi hamola dolö wahilasi amo eda gäheo i nabülasi biyidia baagi nelo.

Ilia Godema adosalea ie ado mala olelemolöie geloi imalola säi

23 Fisigäsebegi Fida Yonele helele sosogo neebaa obögëlahilä, gobela ilo busa amoliage, asigi gäwi

dafidilo amoliage, elema ado säi amo elea ilima säla iaha maadei.

²⁴ Säla i amo nabaha maadelahilä, ili sulubadelaëa hame afädë negela Godema adosalea, Dafidilo Geloï-e, muge naga föige ödä duhuluge nelebo sulubadela amoligi dibe neebe sebe amoge dia hamosa maadei.

²⁵ Siiba nilile mäu Debidi, die hamoi hamolasilo amoma aligila Eleloi Gesamia ado säi amo gowe.

Edoë udia dolö fii odoa ilia edefademalä mi-halähamu nea.

Edoë udia dolö amolia nalï ado afädë negesamu nea.

²⁶ Sege sulubadelaïe beaha aligilo gini nefolalo amolia nudumolöie daiala nefolalo.

Beaha aligilo gini amolia gege dolahilä Dafidilo Geloï amoge ie Afädë Memelei amoge daia sasagala neala golila

säi.

Gë Udälo 2.1, 2

²⁷ Amo gadola Heledoeage Bödiasa Bailadiage ele-balä udia dolö fii odoaeage Yu udia dolöeage dofä gaamu gowegi die hamoi hamolasilo hedabifalï Yesu, dia memelei amo, daia sasagala neala golimolöie gege doi.

²⁸ Iliä amala hamoi amoda dafidi die geloiage asi-giage daiala negei amo gadola gausiala digai.

²⁹ Amaimo, Dafidilo Geloï-e, ilia nilï nufulöie ado gelola säha nelo amo dia walio asigimalo. Die hamoi hamolasilo nilia bedäla made, gelola nea, die ado mala säla olelemolöie geloi imalo.

³⁰ Amo gala oloi dibe amo wahilasimolöiege, die hamoi hamolasilo hedabifalï Yesuie ëia dolöea hamomolöi made gadoi hamolasimolöiege hïdo

elöi hamolasimolöiege, die naabo mogodigimalola säla adoi.

³¹ Godema adola wagai amole mosö ili gedola sefolalo amo fogola Eleloi Gesamia ilima nobasebegi, ilia Godeie ado mala bedäla made gelola säla iaha nelö.

Udia dolö sulubadelaëa odoa ugila negei

³² Udia dolö Yesuma asigi afädë negei nefolalo amoli sulubadelaëa hame afädë negela asigi afädë negela nelö. Amala negela neada afädëa ie nelegei dibe amo bealahilä goweda niemelëla sälo made, hido hïdolaie nelegei dilo amoda ili sulubadelaie ua gadoi dilo.

³³ Abosolo dolö amolia gelola nea Dafidilo Geloi Yesu baagolahilä nowela neala gelola säla olelesa nelö. Godea ili sulubadelama edefademalä obeägïlasilahilä hedabola ugila negesa nelö.

³⁴ Ili sosogo nefolalo amoligida nelebo afädë ufoida made. Ilile sosogo odoaea segege mosöge munia bidi nealahilä

³⁵ abosolo dolö amoligali ilo. Amala ialahilä abosolo dolö amoliada udia dolö odoa ufola adi nefolalebe amoligali mogela ilomelë.

³⁶ Amo gadola dolö afädë nelö amoie ëida Yosebe. Ie ëi elö abosolo dolö amolia negeida Banabasa. (Banabasa amoda ado gowe gadoi. Iso asigi neala gelolasilo dolöla säla ëi negei.) Banabasada Ilibai sosogo nelö. Eda ödä södülogi Saibulusi fii.

³⁷ Amea ie sege afädë dolö elöma muni nii amoda gaula maala abosolo dolö amoligali i.

5

Ananiasa Safailalea hamoi

¹ Amala hamolo amo gadola dolö afädë Ananiasa ie udia Safailalea elele sege dilo amogi dolö afädëma bidi nii.

² Muni bidi nii amo Ananiasaea mogela odoa hile negesi. Ie udiaeage amo dawadigi sulo. Amalahilä Ananiasaea muni odoa amo gaula awäla abosolo dolö amolima i.

³ Iasebegi Fidaea Ananiasama sähalea, Dia Eleloi Gesamima wäfalä sämolöie mugabe Saidani die isogi nobamäia fu igo edoie. Dia die segeie bidi nii muni amogi odoa dihile negei gabu.

⁴ Sege bidi made nealada dihile dilo madele. Bidi nealahiläda bidi nii amoge dihile madele. Die isogi amala hamomolö helësëi amoda edoie. Dia wäfalä säi amoda dolöma made, Godema säimelëla säi.

⁵ Fidaea säi amo nabala Ananiasa ulula digala hame doala asi. Amala hamoimelëla säi amo nabelo amoli sulubadelaea edefademalä bedäi.

⁶ Amala hamosebegi, malisäea baagoi amo faguloea usulala gaula awäla bausi.

⁷ Aoa ohodoa baagibua egoama hamoi amo helësëla made idia amo misi.*

⁸ Amala maasebegi Fidaea ema nabahalea, Nema sämo. Alia sege muni nii amoda hä amo wäla niilela nabi. Amala nabasebegi, ea säla obëgësalea, Ä. Alia muni nii amoda hä go wälamelëla säi.

⁹ Amala säsebegi, Fidaea ema sähalea, Diage diguaeage ali haligilaea Dafidilo Geloie Gesamia abilia hamosebelela bimolöie fedogola meli amoda edoie. Digua baulo amolia dige gaula

* **5:7:** Molö giai deala molöi gadoi baagibua.

moholöie mumusogi digamolöie mosö idiliba maaha neamelëla säi.

¹⁰ Amala säi amole fodolofali Fidaie emo mia ulula digala hame doala asi. Amala hame doala asi amole malisä amolia maala e baagoi dibe amo bealahilä ilia ie domalo segea gaula awalahilä egoa bauia amimu bausi.

¹¹ Udia dolö Geleso sosogo nefolalo amolia ede-fademalä bedäla didigai. Amala hamoimelëla säi amo nabelo sulubadelaeage amai.

Dolöea hamomolöi made gadoi hamoi

¹² Udia dolöbalä nea abosolo amolia dolöea hamomolöi made gadoige hido elöige yafie hamosa nelo. Amoli sulubadelaeada hame afädë negela Solomonoie hadai dibea amimu gegedosa aligilo.

¹³ Ili gegedosebea amida udia dolö odoa nefolalo amolida ilibalä bedälo. Amala bedäi nea gaso, ili beahaleada ilile ei gauia adaha aligilo nelo.

¹⁴ Amalo gaso, udia dolö yafie nefolalo amolia Dafidilo Geloima asigi afädë negesa maadelahilä Geleso sosogo nefolalo amoliberalä baai.

¹⁵ Amalebe oloi difolalo amoli gaula mafula idiafa Fida awäsido fëo fösisila nidila negela digi, dafudaia gaula maala nidila negela digi. Amoie mida, ilia helësésaleada, Fida e maasegi, ie ausuluboea oloi difolalebe amoli dabemäia amai.

¹⁶ Sege odoa Yalusaleme ga madela dibeamadi amodila udia dolö yafiea oloi difolalo amolige mugabe fedai difolalo amolige gaula gegedosebegi, sulubadela neala hedabola wahila digisa maadei.

Selesaia fia abosolo dolö fisigäi

17 Amala hamosebegi, gobela ilo Busa Edefade nelo ameage, amase, ebalä aligilo Sadiusi sosogo dolö amoliage naabo göi.

18 Amala helësëlahilä ilia abosolo dolö amoli neala nafodolahilä gaula awäla galabaia mosöa negesi.

19 Amala negesi dibegi gasigi Dafidilo Geloïie sesaia fii afädëa galabaia mosö idi gai amo doga negesilahilä, ili sigi gaula segea doadigila fedalahilä

20 ilima sähalea, Dili afialahilä Godeïe mosöa nea namolö gähe goweïe mala sulubadela udia dolöma olelemalola säla ï.

21 Amala säi amo nabala abosolo dolö amoli yosefali Godeïe mosöa ami awälahilä udia dolöma mala olelesa nelo.

Gobela ilo Busa Edefade nelo amoge ebalä aligilo nefolalo amolige maalahilä ilia ado sämolö Yu udia dolöïe dolö asigi gäwi dafidi nefolalo Galisolö amoli gegeomalai. Gegedolahilä ilia sähalea, Galabaia mosöa amila dolö amoli sigi misiäiala säla ïmolö mosalola säi.

22 Amala säsebegi, idihë aligilo amolia galabaia mosöa awälahilä beahamelebe, dolö amoli maade beala Galisolö dolö amolima säla ïmolö obëgëi.

23 Obëgëlahilä ilima sähalea, Nilia galabaia mosö idi fëdöla gai amoge idihë aligilo idi gasia nefolalebe amolige melimelë. Bealahilä nilia idi gai amo dogala beahamelebe ami dolö afädë sebege made melimelëla säla ï.

24 Amala säla ïasebe amo nabalahlilä, Godeïe mosö idihë aligiloïe beaha aligilo ameage gobela ilo busa amolaliage goea edo besela galamolödula helësëla asigia säosäosa dilo.

25 Iliä amala asigi säosäosa dibegi dolö afädë

maalahilä ilima sähalea, Nabuö. Dolö dilia gal-
abaia mosöa negei amoliada Godeie mosöa udia
dolöma mala olelesa nefolaleamelëla säla i.

²⁶ Amala säla i amo nalahilä, idihë alig-
iloie beaha aligilo amola, idihë aligilo amolali
awälahilä ili sigi obëgëi. Udia dolö nefolalebe amo-
lia ili igia nufideloëa bedälahilä, ilia ilima nelebo
afädë made hamola, geleä awäla sigi obëgëi.

Abosolo ilia bedäla made ado säi

²⁷ Ili sigi obëgëlahilä Galisolö dolö sefolalebea
ami ifosi. Ifosilebe gobela ilo Busa Edefade amea
ilima sähalea,

²⁸ Nilia dofä dolö amoie ëi säla olelemabiola
gelola säla i. Amai gaso, nabuö. Mala amomu
Yalusaleme udia dolöma säla iasebegi ilia dilile ado
nabaha maadei gabio. Amase, dolö baagoi amoge
diliada nilia nufila sämolöi nebegola säi.

²⁹ Amala säsebegi, Fidala abosolo odoë amola ilia
säla obëgësalea, Nilia dolöëa säse amo gadola made,
Godea säse amo gadola hamomolöi galea.

³⁰ Dilia Yesu baagomäia iigi baala negei amoda
nilile mäuie Gode neebe amea e nowela ifosimelë.

³¹ Eda Dafidiloge Damula Auloge namiäia Godea
e gauia adala ie naabo dafädimadi ifosi. Godea
amala hamoi amoie mida gowe, Isilale udia
dolö asigi besumäiage nafade hamoi amo hëla
fisimäiage fu imolöie amala hamoi.

³² Niliaage Eleloi Gesami Godea ie mala hamolo
nefolalebe amolima ilo ameage amala hamoi amo
dawadigila siia bealahilä säla ulufadigisa aligilo
nilä nefolalebewemelëla säla i.

Gamelielea Galisolöma ado säi

³³ Galisolö dolö amolia ilia säi amo nabalahlä edefademalä habobala abosolo amoli baagomäia nufulöla helēsēi.

³⁴ Amala helēsēsa dibegi, Galisolö dolö sefolalebea amoligi afädē nowei. Eda Felesi dolö, eada mala säla negei amo olelelo. İe ēi Gameliele. Udia dolö nefolalo sulubadelaēada ēi sälo neala sälo nelö. Amea sähalea, Dolö go ili oodola segea namolö mosalamola säi.

³⁵ Amala sälahilä Galisolö dolö amolima sähalea, Isilale dolöla dili-e, dilia dolö go ilima nelebo afädē hamomolö helēsēsa galēda, dafididale fädäla helēsēmalo.

³⁶ Aso, sedade nelola made, Deyudasa e maalahilä ea sähalea, Neda dolö ēi sälommelä säsebegi, udia dolö hädali biyidia gadoia e bēgēla afiai. Amai gaso, e baagomäia nufudasebegi e bēgēla aulo amoli dusudasisalea mala olelei amo hogosa helei.

³⁷ Amase, hobeala gamanea udia dolöie ēi dēdēselo amo gala, Galili fii afädē, İe ēida Yudasa, misi. Maalahilä İe adoea udia dolö yafie neaha maadesebegi, eege baagomäia nufudasebegi, e bēgēla aulo amoli sulubadela dusudasisa maadei.

³⁸ Amaimo, walio na dilima säha, dolö go ilima afädē hamola made hä guilasimalo. İlia daii amoge hamoi amoge hili döfelēla hamosa galēda, amoda hogosa helemolömelē.

³⁹ Ma, Godea hamomäia daii hamosa galēda, dilia haimolö ulimelē. Dilia Godebalä ado neloeamelēla Gamelielea säi. Amala sälebegi Galisolö dolö amolia Gamelielea säi amo gadola hamodeläla helēsēi.

⁴⁰ Amala helēsēlahilä, İlia abosolo amoli we-

lahilä mofiasebegi, ili fëgämalai. Fëgälahilä Yesuie ei säla bu elöda olelemabiola sälahilä ili fisigäi.

⁴¹ Amalebe ili Galisolö neebee amila obeägila segea doadigila asi. Obeägila asi amoie mida gowe, Yesuie ëigi hewai amo Godea dofeala helësëi amogi.

⁴² Amalahilä segeyo sulubadelagi Godeie mosöa amige udia dolö mosöa amige Ado Mala Hedabi olelesalea, Godea Afädë Memelela ifosi amoda Yesu neamelëla fisila made, säla iahamu nelo.

6

Abosolo ili ugila negemäia ilia dolö gifalädalä memelei

¹ Segeyo amo gaaluda, Yesu bëgëla aulo malei maala baahamu nelo. Giligi ado sälo amolia Alamege ado sälo amolibalä gëgësalea sähalea, Dilia segeyo sulubadelagi mogela ilo amogida nilile udia didalo sebe amoligali made ilomelëla säla gëgëi.

² Amala gëgësebegi abosolo giwilasi amolia Yesu bëgëla aulo odoa amoli sulubadela gegedomalolahilä ilima sähalea, Nilia Godeie ado amo fisilahilä molö mogemolö amo dofea made gabumelë.

³ Amai gabugi, nedoola, dilia dili nebegogi dolö gifalädalä mogoi neala sälo, Godeie Gesami nobai, hedabola dawadigi, amomu memelemalo. Memelelahilä, hamoi amo ilia sigi namiäia ifosidelä.

⁴ Amalahiläda, niliamu Godema adosa namolö amoge udia dolöma Godeie ado mala säla imolö amoge hamosamu namolölamelëla säi.

⁵ Amolia säi amo udia dolöea nabalahlilä sulubadelaea dofea gabula säi. Amalahilä, ilia Sidibeni memelei. Sidibeni eda asigi afädë nege-lahlilä gelola nea, Eleloi Gesamige ema nobai nelo. Amase, Filibige, Bologolusage, Niganologe, Dimonoge, Bamenasage, Nigolasage ili memelei. Nigolasa eda Ädiago fii. Eda Yu fii made gaso, dafidi Yu udia dolöie mala neala gaulahlilä ilibalä dila nelo.

⁶ Dolö memelei amoli abosolo ili nee-bea sigi maala ifosisebegi, Godema adolasila ilia ilima naabo negesi.

⁷ Amala hamolahilä Godeie ado mala säla daidoi. Yalusaleme ami Yesu bégëla aulo udia dolö yafie, sämolö asusugai awäla baai. Gobela ilo dolö yafieage Yesuie mala gaula mogola asigi afädë negei.

Yu ilia Sidibenibalä gudi

⁸ Godeie ugila negeloge geloige Sidibenima nobalasisibegi, e udia dolöbalä nea hido elöige dolöea hamomolöi made gadoige gelola hamosa nelo.

⁹ Amala hamosebegi, dolö odoaea Sidibenibalä gëgësa nelo. Yu udia dolö amolile gedolo mosö afädë amoie ëida Fisigäi Amoli Dilo Mosöla sälo amoligi nelo. Dolö amolida Salinialage Alegisädialage misi. Ilibalä odoage Silisiala Esialage misi amoli sulubadelaea Sidibenibalä gëgësa nelo.

¹⁰ Gëgësalea Eleloi Gesamia Sidibeni hedabola dawadigilasi amea ilia ado säi amea e aulo dabemolöi made nelo.

¹¹ Ilile adoea aulo dabemolöi made bealahilä, geleä hado musügä awälahilä dolö odoama sähalea, Sidibenia Mosesele Godele gagadela säse nabimelëla sämalola säi.

¹² Amala säi amogi udia dolö nefolalo amoliage, asigi gäwi dafidilo nefolalo amoliage, mala dawadigi nefolalo amoliage habobala mihalälahilä, ilia Sidibeni sigi gaula Galisolö dolö neebee ami asi.

¹³ Amalahilä, ema ilia wäfalä babala säsäla sämäia dolö odoa sigi maalahilä amolia sähalea, Dolö neebee egoweada sege Godea hile nafolai goge, Ado säla negei dibe amoge gagadesamu nelomelë.*

¹⁴ Eada gomalä säimelë. Nasalese fii Yesuea mosö go haila fisila, mala Mosesea säla negei amo nalaba maaha nelo nilia nabaha neebewege neala bedefamolömelëla säi amo nilia nabimelëla säi.

¹⁵ Amo säi amo nalahilä, Galisolö dolö sefolalo amolia Sidibenüe odagi siila beahamelebe, selesaia fiie odagi gadoi neebee meli.

7

Sidibenia Galisolö dolö amolima ado säi

¹ Amaimo, gobela ilo Busa Edefade nelo amea Sidibenima nabahalea, Iliä ado säsebege dofä säsebelela nabi.

² Amala nabelebe Sidibenia säla obëgësalea, Naado nedoola dili-e, ado sähago. Nabualo. Nilile naua mäu Abalahama e Halana made awälä Mesobodemia nebegi, Gode yo digalo hido elöi amo Abalahama neebee maala besela galai.

* **6:13:** Sege Godea hile nafolaila säi amoda Godeie mosö amoie sähalea säi.

³ Maalahilä ea ema sähalea, Die segege sosogoge dīgila sege na olese amogi mosalola säi.

⁴ Amala säi amo nabalahlä, e Galadia sege dīgila Halana namolö asi. İe eedo baagolahilä, sege walio dili neebee ami namiäia e Godea namolö mosalola säi.

⁵ Amo gala ema sege fufu afädë nofela made İ. Sege afädë emo afädëa emesamolöige dofä made İ. Amai gaso, Godea sege amogi dige die diaua mäu ilige dili namiäia İmolömelëla Godea Abalahama e malö maade nebegi säla negei.

⁶ Godea gomalä säi. Die diaua mäu amoli elöie segea namolömelë. Ami gäheo i hädali biyidia galabaia hamoi gadoi hamolasisa neebe amo gaaluda, dolö elöea ili neala sälasimolömelë.

⁷ Amamolö gaso, ili galabaia hamoi gadoi hamomäia hamolasilo fii amolibalä na gudimolömelë. Gudilahilä ili sege amo dīgila awälahlä, sege wegi nea nİe İi gauia adamolömelëla Godea säi.

⁸ Amase, Godea asialo made ado elöi säla negei amoİe ea nofe negela Abalahamama gafodo damulasilo mala negei. Amala negei amo gadola Aisaga emea e ägülebeda segeyo gödögi Abalahamae Aisagaİe gafodo damulasi. Hobeala Aisagaİe malö Yeigabamage amai. Amalahilä Yeigabaİe malö nilİle mäu giwilasi amolimage amai.

⁹ Nilİle mäu gidälasi amolia giwi afädë Yosebema naabo gëlahilä, eda Isibi segea galabaia hamoi gadoi hamolasilo namiäia odoama muni İmolahlä muni nii. Isibi segea sigi asi gasoda, Godea e sigi nea

¹⁰ yöi elö elöla sulubadela dibeaa amila e damula

awäla ugila negei. Isibi sege beaha aligilo gini Felauie siigi, Godea Yosebegali hedabola dawadigilasiloge mala hedabi hamolasimäiage i. Amo bealahilä, Isibi udia dolöge, amase, ie mosö sulubadelage sigi namiäia Yosebe memelela ifosi.

¹¹ Amalahilä Isibi sege sulubadelagige Gainana sege sulubadelagige sidë i maasebegi, udia dolö edefade yösa nefolalo, nilile mäu ilia molö abidi galea walebelela hogoi gaso, afädë made beagolei.

¹² Aso, molö made nebegi, Isibi segea molö galeamelëla säi amo nabalahilä, Yeigabaea nilile mäu nelo amolima degabo mi gäwila afiamola sälahilä ili fisiga gai.

¹³ Amalahilä bu elö awäsebegi Yosebea ie edoolalima, neda Yosebemelëla ulufadigila säla i. Amala sälahilä nebegi, Felauea Yosebe sosogo amoge dawadigi.

¹⁴ Amalahilä, Yosebea ie eedo Yeigabala e sosogola Isibi misialola säsi. E sosogo gegedolada nabülasi gifalädaliäie odoi bia.

¹⁵ Misialola säsi amo nabala Yeigaba Isibi digala nebegi, hobeala e baagoi. Amalahilä nilile mäu amolalige baagosebegi,

¹⁶ ilile domalo amo Segeme segea gaula obëgëlahilä, sege dafidi Abalahamaea Segeme ami Hamolöie malöma baulo sege bidia niia ami bai.

¹⁷ Godea Abalahamama ado säla negei amo gausiala digamolö fu ga makesalea, Isilale udia dolö Isibi nefolalo amoli sosogo malei bäula besela galai.

¹⁸ Malei amala nebegi, hobeala beaha aligilo gini elö amea Yosebe made dawa nea, Isibi udia

dolö sigi nelo.

¹⁹ Gini amea nili sosogo amoli dahila nealahilä, nilile mäu sēlasila, ilile malö dubo baagomäia segea sadia gamalai.

²⁰ Amo gaalu, Moseseie emea e ägüla misi, malö amoda Godeie siigi hedabifali. Aube ohodoa eedo hi mosöa ami sigi nelo.

²¹ Amalahilä e segea negei dibegi, Felauie idiwia neala gaula awālahilä, hile malö folo wāla fosa nelo.

²² Amala fosololahilä ilia Isibiie dawadigilo amo sulubadela Mosesema olelei. Amasebegi ea ado adomolö amoge mala hamomolö amoge dolö geloi edefade nelo.

²³ Mosese e gäheo i nabūlasi biyidia baagilahilä, ie edoo Isilaleie malö amoli neebee söfē moholö dialeala helēsēi.

²⁴ Awālahilä ea beahamelebe Isibi dolö afädēa Isilale dolö afädē nufudaha neebe meli. Amalebe Mosesea Isilale dolö amo damūla awāla Isibi dolö amo hi asiala hamoi amoie hi e bidigi nufudala baagoi.

²⁵ Mosesea helēsēsaleada, ie edoo amolia Godea Moseseie naaboea ili fisigāmolö gabula helēsēsa dialeala helēsēi. Gasoda, iliada amala made helēsēi nefolalo.

²⁶ Amo aiyo amogi Mosese besela galala beahamelebe Isilale dolö äudä nudusa neebe bealahilä, ele neala aealasilalahilä elema sähalea, Malö äudä-o, didoo madele. Halimu edogi nudusala nabi.

²⁷ Amala sälebe, mi hamola nudulo amea Mosese bobala sadia galahilä ema nabahalea, Di nilile beaha aligilo namiäiage, gudi mogelo namiäiage di nowēa memelesio.

28 Aiyo dia Isibi dolö nufudadigi amo gadola nege nufudadigidelä misi nealela nabi.

29 Amala säi amo nabalahilä Mosese e Midiana segea fisäla awäla nelo. Ami nea ie dolö malö äudä sogobai.

30 Ami gäheo i nabülasi biyidia baagilahilä, Mosese e sege nafade udia dolö aligilo made sege Sainai bi ga made neebee ami nebegi, i holöfali afädëgi nulo söagila selesaia fii afädë Mosesea bimäia ulufadigila nelo.

31 Amala hamosebe amo beala Mosese e fudugilahilä ga madela hedabola fädäla bimolö awäha nebegi, Dafidilo Geloïe ado nabi.

32 Dafidilo Geloia sähalea, Neda die diado amolile Gode neawe, Abalahamaïege, Aisagaïege, Yeiga-baïege ilile Gode neawemelëla säi. Amala säsebegi, Mosese e edefademalä fudugila emo gisisëlahilä bimolö bedäla nelo.

33 Bedäla nebegi Dafidilo Geloia ema sähalea, Sege di nebegoda na nihile nafolai sege amea dia emo usililo salugai go giimo.

34 Nie udia dolö Isibi nefolalebe amolima ilia edefademalä neala sëlasisebe amo siia melimelë. Ili dudumigila diisa dibe amo nabalahilä, na ili damula awäla sigi obëgëmolöie digai neawe. Amai gabugi, hä misië, na di Isibi mosalahagomelëla säi.

35 Dafidi Mosese ema ilia habobalahilä ema säla obëgësaleada, Di nilile beaha aligilo namiäiage, gudi mogelo namiäiage di nowëa memelesiola säi amoda Mosese amoma säi gasoda, selesaia fii afädë i holöfaligila ulufadigi amoie naaboea dolö amea ili sigi namiäiage damula mosäiage Godea e fisiga galasimelë.

³⁶ Dolö amea Isibi segea neage, ödä duhulu ëida Heale Uii dibeaa ami neage, gäheo i nabülasi biyidia sege nafadeia ami neage, hido elöige dolöea hamomolöi made gadoige hamola ili sigi asi.

³⁷ Mosese amea Isilaleie malöma sähaleada, Godea dilile didoomadila aligila afädë bea sälo ne gadoi dilile bea sälo memelela ifosimolömelëla säi.

³⁸ Mosese amoda selesaia fii afädëa Sainai bia amila ema ado säla iasolo amo gala sege nafadegi gegeedolo amolibalä nelo. Nilile naado amolibaläge nelo. Ado diamolöi diamolö amo nilima säla imäia ema i.

³⁹ Amaimo, nilile naado amolia ea ado säi amo gadola hamomolö habobalahilä, e bobala sadia gala ilile asigida Isibi obëgësa nelo.

⁴⁰ Amala asigila nea ilia Alonoma sähalea, Niligali gode odoa naaboea hamomalo, iliadale nili sigi mosäia. Mosese amea nili Isibilahilä segea molöie sigi nelo amoma edo gadoi besela galaidu nilia dawa madela säi.

⁴¹ Amala säsolo amo gala ilia sugua afädë gao emalö gadoi naaboea hamolahilä wäfalä gode amoma sugua gadoi elö elöla nufudala göa nelegela i. Nilia naaboea hedabi hamoi gabula helësëlahilä ilia edefademalä obeägisa nelo.

⁴² Amala hamolebe Godea ili baagi iala ilia mu ilibia gasumilima göa nelegemäia fisigisi. Amo gadola bea säloie bebagi dëdëla negei amo gowe.

Isilale fii dili-e, gäheo i nabülasi biyidiagi sege nafadegi nea, sugua gadoi nufudala göa negela negali iledu.

⁴³ Amaimo, Molegeie balai mosö dilia gaula

asi. Amase, dilile gode Lëfanaie gasumili gadoige, dilia göa nelegemolöie naaboea hamoi amo dilia gaula asi. Dilia amala hamoi amea na dili Babilono holöbö baagia gala bobala mosäia fisiga gamolömelëla

dëdëla negei dialea. *Amosi 5.25-27*

⁴⁴ Gode ilibalä neebe amoie helësëla balai mosö amo nilile naadolalibalä sege nafadeia ami nelo. Mosö amoda Godea Mosesema gowe gadoi hamomalola säla olei amo gadola ilia hamoi.

⁴⁵ Hobealada nilile naado amolia ilile eedo bedefala balai mosö amo gaula Yasuabalä asi. Yasuabalä awäha nea Godea udia dolö fii odoa nefolalo amoli nesila digila sege amo iligali bedefala aligi awäha neada balai mosö amo gaula awäha nelo. Amalahilä balai mosö amo nebegimu beaha aligilo Gini Debidi besela galai.

⁴⁶ Godea ema obeägisebegi ea Godema nabahalea, Na mosö afädë Yeigaba fii amolile ulimolöda dofealela nabi.*

⁴⁷ Amala nabi gaso, Solomonoea Godeie mosö uli.

⁴⁸ Amai gaso, Ilibia Edefade neebe ameadam osö naaboea uligida aligilo made nea. Bea säloea säi amo gadola,

⁴⁹ Dafidilo Geloia sähalea, Muda nïe beaha aligilo filo dialeamelë. Amase, naga föida nïe emoea emesaia idala filo dialeamelë. Dilia ne namolöda mosö abodo gadoi olasimolö. Amase, ne hele fimolöie sege fuda abidi dialea.

* **7:46:** Mosö amoda Yeigaba fii (Isilale udia dolö) Godegali nelebo odala iala ie ëi gauia adamolöie gobela ilo mosö.

⁵⁰ Nelebo dibe goda sulubadela nïe naaboea hamoi madelela säila säla dëdëla negei dialeala säi. *Aisaea 66.1, 2*

⁵¹ Aso, Sidibenia ilima sähamu nea sähalea, Dilile iso asigi geloifali nebego, bobaeage gëheage asigi afädë made negei amo wälasi nebego. Eleloi Gesamima habobahamu nebego. Dilida dilile diado amoli nelo amo gadoimu nebego.

⁵² Bea sälo nefolalo amoligi afädë dilile diado amolia neala made sësa neloda nowë. Siiba dolö mogoifali moholömelëla säla digi amolige ilia baagomäia nufudadigisa nelo. Amase, walio dilia dolö amo hololölahilä baagomäia nufimelë.

⁵³ Diligali Ado säla negei amo selesaia dolöma aulo negela i amo dilia gaula nea, amo made hamolo nebego dilia amaila Sidibenia säi.

Ilia Sidibeni igia nufudala baagoi

⁵⁴ Sidibenia ado säi amo nabalahlilä, ilia edefade mihaläla ema bese ali nalëgëi.

⁵⁵ Amasebegi, Sidibeni ema Eleloi Gesami nobala nea, ea selesaia mosöa sida adogola nea beahamelebe, Godeie yo digalo hïdo elöi amoge, Yesu e Godeie naabo dafädimadi neebe amoge meli.

⁵⁶ Siila nea sähalea, Bimo. Selesaia mosö doganegei dibe amoge Dolöie Malö amo Godeie naabo dafädimadi neebe amoge beahamelëla säi.

⁵⁷ Amala säi amo nabala, ilia gelola hoala digila naaboea ilile gëhe galahlilä, e nebea gaalu fodolofali nawela awäla

⁵⁸ e gaula gaamu yala baagia sadia galahlilä, e baagomäia igia nufudaha nelo. Dolö dafidi ema babala sälo amolia ilile fagulo sedade daia salugai

amo giilahilä, malisä afädëie emo mia nidila negei. Malisä amoie ëida Solo.

⁵⁹ Iliä Sidibeni e igia nufudaha nebegi, ea Godema adosalea, Dafidilo Geloi Yesu-o, dia nie gesami nea nimola säi.

⁶⁰ Amala sälahilä, emo gumu sasagala salea, gelolafalä sähalea, Dafidilo Geloi-e, ilia nafade hamosebe goweëda ili së imabiola sälahilä, Sidibeni e süwia dilo wäla adi.

8

¹ Sidibeni nufudadigi amogi Soloea ie siigi dofea hamoila helësëi.

Soloea Godea udia dolö wela ifosi nefolalo amoli neala sëlasisa nelö

Segeyo amo gaalu, Sidibeni nufudalahilä, Godea Yalusaleme udia dolö wela ifosi nefolalo amoli mi gäwila edefademalä gelola neala sëlasisa nelö. Amalebe ili sulubadela fisäla awäla Yudia segeamadige Samelia segeamadige dusudasila afiaha maadei. Abosolo ilimu Yalusaleme ami nelö.

² Dolö odoa Godeie mala nabelo nefolalo amolia edefademalä didigaola Sidibeniië domalo bausi.

³ Amalahilä Soloea udia dolö Godea wela ifosi nefolalo amoli nufudala ialalesa nelö. Amala hamosa nea mosö neebe amo sulubadelagi awälahilä, udiage dolöge gaula dusugaia awäla galabaia negesa nelö.

Samelia segea Ado Mala Hedabi säla ï

⁴ Udia dolö fisäla dusudasila afiai amolia sege ili afiaido amo sulubadelagi Ado Mala Hedabi säla ïia afiai.

⁵ Amala afialahilä, Filibi Sameliaäe gaamu afädë dibeä ami awälahilä, ea ilima sähaleä, Godeä Afädë Memelei amo hä miäsi neamelëla säla äaha nelo.

⁶ Filibia ado säla äi amo udia dolö gegedoi amolia hedabola nabalähilä, ea dolöea hamomolöi made gadoi hamola digisebe amo beala ili sulubadelaea ea ado säsebe amo nabaha nelo.

⁷ Amaha neä, udia dolö yafiema mugabe fedai nefolalo amoli nesila digisebegi üälala gäwila doadigila awäla digi, amase, dolö emo nafadeige, dolö fii siige yafie wahila digisa maadei.

⁸ Amala hamosebegi, gaamugi ami fii udia dolö amolia edefade obeägisa nelo.

⁹ Gaamugi ami dolö afädë äe äi Saimono sulo. Dafidida ea golë hamosa nelo. Samelia fii udia dolö fudugimäia elö elöla hamosa nelo. Ea hümu sähaleada, Neda äi sälo edefademelëla sälo.

¹⁰ Amase, dolö odoä äi säloge, memasage sulubadelaea Saimonoäe ado nabaha aligilo. Amoli sulubadelaea sähaleada, Godeäe geloi amo ilia Edefadela sälo amoda amola sälo.

¹¹ Saimonoeä segeyo yafiegi golë hamosa nelo amogi ili neala fudugilasilo amea ilia ea säsebe amo nabaha nelo.

¹² Amäi gaso, Filibia ilima Godeä Beaha Maadela Sigi Neebe amoäege Yesu Gelesoäe äige Ado Mala Hedabi säla äasebegi, udiaeage dolöeage, asigi afädë negesebegi, ödägi gei.

¹³ Amase, Saimono eege asigi afädë negesebegi ödägi gei. Amalahilä e Filibibalä nawesa neä, dolöea hamomolöi made gadoige, geloi melëlo made gadoige hamosebe amo bealahilä Saimono e fudugi.

14 Abosolo dolö Yalusaleme nefolalo amolia Samelia ilia Godeie ado mala neala gausaleala säi amo nabalahlilä ilia Fidale Yonele ili neebee fisiga gai.

15 Amala säsebegi, ele awäla besela galalahilä, elea Samelia udia dolö amolia Eleloi Gesami nimäia Godema adolasi.

16 Mida, Eleloi Gesami ilibalä digala made nelo. Yesuie eigimu ödägi gesa nelo.

17 Godema adolasilahilä, elea ilima naabo negesisebegi ilia Eleloi Gesami nii.

18 Abosolo äudä amolea naabo negesi amea Gesami iasebe amo Saimonoea bealahilä, ea muni iahagolahilä

19 sähalea, Na afädëma nie naabo negesisegi Eleloi Gesami nimolö amoie geloi amo nema imäiamelëla säi.

20 Amala sälebe Fidaea ema säla obögësalea, Godea memalä imolö amogi dia munia nimolö helësëi amea, dige die munige haligila heli segea mosäiamelë.

21 Die iso asigi Godeie siigi mogoi made nebege. Ameada alia hamoi hamosebewegida dofä dia hamomolöi mademelë.

22 Dia nafade hamomolö helësëi amoie asigi besumalo. Amalahilä, die isogi nafade asiala helësëi amo hëmäia Dafidilo Geloima adomalo.

23 Na säi amoie mida, gesami aulo gamogai amo die isogi nobalahilä, nafade hamomolö amea di gide begei dibe go beahamelëla Fidaea säi.

24 Amala säsebegi, Saimonoea säla obögësalea, Alia säi amo gadola nema made hamomäia Dafidilo Geloima nie adolasimola säi.

25 Amalahilä elea Yesuea elema hamoi amo säla

ï. Amase, Dafidilo Geloïie ado malage säla ialahilä Yalusaleme obëgëi. Obëgësalea Samelia segeïe gaamu holöfali dibeadi amogi Ado Mala Hedabi säla olelela aliligi obëgëi.

Filibia Idiobia dolöma Ado Mala Hedabi säla ï

²⁶ Amalahilä Dafidilo Geloïie selesaia fii afädëa Filibima sähalea, Yalusalemela Gasa segea aulo idi gumadi mosalo. Idi sege nafadeido aulo amogi mosalola säi.

²⁷ Amala säi amo nabalahlilä Filibi e nowela asi. Idi amogi awäha nebegi, Idiobia dolö afädë idiafa gausiai. Dolö amoda dafidi iso neadigi nelo. Dolö ameadä Idiobia udia dolöïe beaha aligilo gini udia ëi Gädasi sulo amoïe muni nelegeige beaha aligilo nelo. Dolö amoda Yalusaleme ami Godeïe ëi gauia adala Godema adomolö asi

²⁸ obëgësalea, galo sugua hosima begela dusug-ala aulo amogi filahlilä, bea sälo Aisaeaea bebagi dëdëla negei dibe amo nidela aligi awäha nelo.

²⁹ Nidela aligi awäha nebegi Gesamia Filibima sähalea, Di awäla galo mia ga madela, galo awäse amo gadola mosalola säi.

³⁰ Amala säsebegi, Filibi e baluluia galo awäse amo gadola awäla nebegi, Idiobia dolö amea Aisaeaea bebagi dëdëla negei dibe amo nidese nabi. Amo nabalahlilä Filibia ema nabahalea, Ado nidese goïeda helësësebelela nabi.

³¹ Amala nabasebegi, ea säla obëgësalea, Afädëa goïe mida gowemelëla nema made säla iaseda, na abeahäla helësëmolödula säi. Amala sälahilä ea Filibima sähalea, Galodaia haligila fidelä fedala fimola säi.

³² Bebagi ado säla dëdëla negei nidei amoda gowe.

Sugua sibi baagomäia nufulö sigi awäsebe amo gadolage, sibi emalö hilí damusegi, nafi dagala adolo made amo gadolage, ea nafi made dagai.

³³ E neala hewalasilahilä íe gudi mogola made säsi. E nagadaia namolöda aligila wagai amoíe yaua mäuíe ado nowëa säsimolöla säla dëdëla negei dialea. *Aisaea 53.7-8*

³⁴ Idiobia dolö amea Filibima nabahalea, Bea sälo amea, amo säi amo nowëie helësëla säi gabu, hì e helësëla säi gabule ma, elöie helësëla säi gabulela nema säla ímola nabi.

³⁵ Amalebe Filibia dafidi ado dëdëla negei nideia amila mi gäwila Yesuie Ado Mala Hedabi dolö amoma säla olelesa nelo.

³⁶⁻³⁷ Ele idiafa awähalea ödä afädë dibeia ami besela galala Idiobia dolö amea Filibima nabahalea, Bimo. Ödä dialea. Ne ödägi gemolö amo nelebo afädëa dofogamolöi gabulela nabi.*

³⁸ Amalahilä ea galo gaulo amoma beaha namiëlahilä, eege Filibige helegela ödägi digala aligilahilä Filibia e ödägi gelasi.

³⁹ Ele ödägila fedalahilä, Dafidilo Geloíie Gesamia Filibi fodolofalí sogobala gaula asibua Idiobia dolö amea e bu elö made melí. Amalahilä ea obeägíla nelea hì aulo idi amogi asi.

⁴⁰ Filibi e hä Asodasa gaamua neebe melí. Amalahilä e segea amila doadigila awäla gaamu

* **8:36-37:** Uluguea beba gowe dëdëi amogi hobeala dolö odoaea ado odoa neala baala, damo 37 dëdëi. [37 Amala sälebe Filibia säla obëgësalea, Díe bobaea gelola asigi afädë negei nea galëda, ödägi gemolöi dialeamelëla säi. Amala sälebe dolö amea sähalea, Ä, asigi afädë negei neawe. Yesu Geleso e Godeie Efege neala helësëlahilä gaula mogosamelëla säi.]

dibe sulubadelagi nawesalea, Ado Mala Hedabi olelela aliligi awäla Sisalia gaamugi besela galai.

9

Solo e asigi besui

¹ Amo gala Soloea Dafidilo Geloïie bégëla aulo nefolalo amolima sêlasila nufudadigideläla gelola sähamu nelo. Ea gobela ilo Busa Edefade nebea ami awälahilä sähalea,

² Gedolo mosö amoli beaha aligilo Damasaga nefolalebe amolima idulä, beba afädë dëdëla imo. Yesuie Idigi aulo nefolalebe, udiage dolöge, beagoleseda, nafodolahilä Yalusaleme sigi obëgedeläla säi.

³ Amalahilä, Solo e Damasaga suägïla nebegi, mudaiala yo digalo maala fodolofali ema sege yabagelelo wäla yabagelei.

⁴ Amea e nagadaia digai dibegi, afädëa ema sähalea, Solo-o, Solo-o, edogi dia ne neala sêlasisala säse nabi.

⁵ Amo nabalahilä ea säla obëgësalea, Dafidilo, dida nowëla nabi. Amala nabasebegi, ea säla obëgësalea, Neda Yesu, dia neala sêlasilo amomelë.

⁶ Di hä nowela Damasaga gaamugi mosalo. Dia hamomolö amo ami säla imolömelëla säi.

⁷ Dolö odoa Solobalä asi amolia adola made aumala nelo. Ado säse amo nabi gaso, dolö hodo made meli.

⁸ Solo e digai amo noweia adalahilä si fisigäla meli gaso, nelebo bimolö uli meli. Uli galebeda ilia e nabelela gaulahilä sigi awäla Damasaga besela galai.

⁹ Besela galalahilä, ami segeyo ohodoa nelo amogi bimolö uli nea, molö ödäge made naala nelo.

¹⁰ Damasaga ami bægëla aulo afädë nelo. Amoie ëida Ananaiasa. Ea sosoäla awäla beahaleamelebe Dafidilo Geloia wela sähalea, Ananaiasa-ola säi. Amala säsebegi, ea säla obëgësalea, Dafidilo Geloie, ne neawela säi.

¹¹ Amasebegi Dafidilo Geloia ema sähalea, Di nowelahilä idi gogi mosalo. Idi amoie ëida Mogoi Idi. Amogi awälahilä Yudasaie mosöa besela gamolöie nowela mosalo. Yudasaie mosöa besela galalahilä dia Dasasa fii dolö afädë ëi Soloda salealela nabualo. Mosalola säi amoie mida, ea Godema adosa neebe amoie.

¹² Ea sosoäla awäla beahaleamelebe ie si hed-abomäia dolö afädë ëida Ananaiasa maalahilä ie naabo negesi melila säi.

¹³ Amala sälebe Ananiasaea säla obëgësalea, Dafidilo Geloie, dolö goeada udia dolö dihile nafolai Yalusaleme nefolalo amolima nafade edefade hamoimelëla udia dolö yafia säi amo na nabimelë.

¹⁴ Nili neebea wige udia dolö die ëi gauia adalo amoli sulubadela nafodomolöie gobela ilo busa nefolalo amolia ema geloi imelëla säi.

¹⁵ Amala säsebegi, Dafidilo Geloia ema säla obëgësalea, Mosalo. Dolö amoda nie hamoi hamolasilo namiäia memeleimelë. Eada udia dolö fii odoa amolige, beaha aligilo gini nefolalebe amolige, Isilale udia dolö nefolalebe amolige, nie ëi ilile siigi sämäia memeleimelë.

¹⁶ Ea nie ëigi së elö elöla molö amo na ema olemolömelëla säi.

17 Amala säi amo nabalahlilä, Ananaiasa awäla besela galalahilä mosö amogi nogila digai. Digalahilä ea ema naabo negesila sähalea, Nedoo Solo-o, Dafidilo Geloia ne wi misialai, di wi maa-halea Yesu idiafa dia meli amea. Die si bu bimäiage Eleloi Gesami dima nobamäiage ne misialaila säi.

18 Amala sälebe fodolofali seme bebe gadoi Soloie siigila digalahilä ea bu bimolöi meli. Amalebe Solo e hä nowelahilä, ödägi gei.

19 Ödägi gelahlilä, molö naala gelola obögëi.

Solo Damasaga nea Yesuie mala säla iaha nelo

Damasaga nea Solo e bögëla aulo amolibalä segeyo odoa nelo.

20 Beaha aligila made fodolofali gedolo mosöa awäla nea, ea Yesuda Godeie Efege neamelëla säla iaha nelo.

21 Amalebe ea ado säi amo nabelo amoli sulubadela fudugilahilä sähalea, Udia dolö ei go gauia adalo amoli Yalusaleme nufudadigisa aligilo amo e madele. Yawege amala hamomolöie ili nafodolahilä gobela ilo busa nefolalebea ami sigi gaula moholöie misi madelela säla didigai.

22 Amalo gaso, Soloea edefademalä gelolasila ado mala säla iaha nelo. Säla iahalea Afädë Memelei amoda dofä Yesu e neamelëla säi amo Yu udia dolö Damasaga nefolalo amolia nabala fudugila, dofä säsebelä helësëlahilä, säla obögëmolö asusugai nelo.

23 Segeyo yafie baagilahilä, Yu ili gegecola Solo baagomäia nufidedelämelëla säla didiäha dilo.

24 Amala didiäi amo Soloea nabi. Iliä segeyo sulubadela gasi esoage Damasaga gaamu yalala

amalela digi amoëe idi nogila digalo amo sulubadela Solo e baagomäia nufulöie idia nege-samu nelo.

²⁵ Amala hamosa nebegi gasi afädëgi Soloie bëgëla aulo nefolalo amolia Solo adu gadoigi salalahilä yala baagido ëfëa begela fisiga idai.

Solo e Yalusaleme nelo

²⁶ Solo e Yalusaleme awäla, Yesu bëgëla aulo amolibalä gedola namolö helësëi. Amala helësëla nebegi, eda Yesu bëgëla aulo made neala helësëla sulubadelaea bedäha nefolalo.

²⁷ Amalo gaso, Banabasaea e sigi awäla abosolo amoli neebee ami asi. Sigi awälahilä ea abosolo amolima Solo e idiafa awäha nebegi Dafidilo Gelo meli amoge, ea Soloma ado säi amoge, ilima awala säla i. Amala säla ialahilä Damasaga awäla Soloea Yesuie ëgi ie ado mala gelola säla i amoge ilima awala säla i.

²⁸ Amala sälahilä Solo e ilibalä gedola nea, Yalusaleme sege sulubadelagi awäha nea, Dafidilo Geloie ëgi gelola säla iaha nawesa nelo.

²⁹ Amala säla iaha nea, ea Yu dolö Giligi ado adolo nefolalebe amolibalä ado adosa nea gëgësa nelo. Gëgësebegi ilia e baagomäia nufulöie idi hogosa nelo.

³⁰ Amala hamosa neamelëla säi amo nabal-ahilä edoolalia Solo Sisalia sigi awälahilä e Dasasa mosäia ifola asi.

³¹ Amala hamolahilä, Yudiage Galilige Sameliage udia dolö Godea wela ifosi nefolaloa ami aeaala nelo. Amala nea ili neala gelolasisebegi, Dafidilo Geloibalä bedäla nagadaiala nelo. Eleloi Gesamia ilile asigi

falagaselasisebegi, udia dolö odoaea asigi afädë negela ilima disa maadei.

Fidaea Eniasa wahilasi

³² Fida e sege sulubadelagi nawesalea, udia dolö Godea hile nafolai Lida gaamugi nefolalebea amige digala nelo.

³³ Digala nea segea ami dolö afädë fii si dibe meli. Dolö amoëie ëida Eniasa, e imididaia diasi dibegimu gäheo i gödölasi baagi.

³⁴ Fidaea ema sähalea, Eniasa-o, Yesu Gelesoea di wahilasebegi. Nowelahilä die fëo galimola säi. Amala säi amole e fodolofali nowei.

³⁵ Udia dolö sulubadela Lidalage sege Salonolage ili sulubadelaea e bealahilä Dafidilo Geloima asigi besui.

³⁶ Yesu bëgëla aulo udia afädë ëi Dabida, Giligi ado adola ëi elöda Dogasa, e Yoba filo. Udia amea hamoi hedabi hamosamu nea. Udia dolö busadäoi nefolalebe amoli ugila negesamu aligilo.

³⁷ Amala hamosa sebegi e olola baagoi. Baagosebegi odoaea ïe domalo nigime hëla hogoli ilibia afädëgi nea negesi.

³⁸ Yoba gaamu amoda Lida gaamu ga madela negei. Bëgëla aulo nefolalo amolia Fida segeyo amo gala Lida neai amo nabalahlilä, ilia dolö äudäma e neebea bea mosalai. Awälahlilä elea ema sähalea, Saula made, nili nefolalebea fodolo misialola säla ï.

³⁹ Amala säla ïasebegi, Fida e nowelahilä hiligila obëgëi. Besela galalahilä hogoli ilibia amogi ilia e sigi asi. Sigi awälahlilä udia didalo nefolalo amoli

e neebe gaalu ga madela nefolalea didigaola fagulo sedadege fagulo odoage Dogasaea hi e made baagola salea hamoi dilo amo ema nidila olei.

⁴⁰ Fidaea ili sulubadela afiaha maademolahilä, emo gumu sasagala salea Godema adoi. Amala adolahilä Fidaea ie domalomadi besuia galahilä sähalea, Dabida, nowemola säi. Amalebe udia amea si fisigäla Fidama bealahilä e nowela fii.

⁴¹ Amala hamolebeda Fidaea udia amoie naabogi nabelela nowela ifosi. Ifosilahilä Fidaea udia dolö Godea hile nafolai nefolalo amolimage, udia didalo amolimage mofiamolahilä, ea udia wahi neebe amo ilima olei.

⁴² Amala hamoi amo Yoba udia dolöea dawadigisa maadelahilä yafia Dafidilo Geloima asigi afädë negei.

⁴³ Fida e segeyo yafie Yoba segea ami nelö. E ami nelö amoda dolö afädë ei Saimonobalä nelö. Saimono ameada sugua gao gafodo nealahilä, amea nelebo odoa hamomolöie daiaha aligilo.

10

Selesaia fii afädë maalahilä Goniliasama ado säla
i

¹ Sisalia gaamugi ami dolö afädë nelö. Ie ëida Goniliasa. Eada ami dolö hädali afädë beaha aligilo nelö. Hädali afädë amoda hädali gafeia amoligi, hädali gafeia amolile ëida Idali Ami Dolöla sälo.

² Goniliasa eada Godea hamei dibe amomu hamolo nea, Godebalä bedäla nagadaiala aligilo. Ie mosöa nefolalo amoli sulubadelaage amalo. Eada busadäoi neebe amoli ugila negela muni

nelegeige iaha aligilo nea, segeyo sulubadelagi Godema adolasisa aligilo nelo.

³ Amala hamosa nebegi segeyo afädëgi eso bëgisebe amo gaalu, Goniliasaea sosoäla awäla beahaleamelebe, Godeie selesaia fii afädëa e nebea maalahilä ema Goniliasa-ola säsebegi ea fädäla meli.

⁴ Amala säsebegi, ea bedälahilä, selesaia fii amoma siila dialea nabahalea, Dafidilo, edola nabi. Amala nabasebegi, ea ema säla obëgësalea, Dia Godema adosa aligilo amoge, nelegei muni busadäoi amoligali iaha aligilo amoge Godea bealahilä di helësësa neamelë.

⁵ Amaimo, dolö afädë Saimono, ie ëi elöda Fida, amoda di nebea gui misiäia dolö odoaea Yoba bea mosalamalo.

⁶ Dolö amoda edaio Saimonoie mosöa söfë misi saleamelë. Saimono ameada sugua gao gafodo nealahilä, amea nelebo odo hamomolöie daiaha aligilo. Ie mosöda duhulu agesugi neamelëla säi.

⁷ Selesaia fii amea ema säla iala asibua Goniliasaea ie hamoi hamolasilo äudä nelo amolege, amase, ami dolö afädë Godea hamei dibe amomu hamolo ebalämu aligilo amoge, ohodoa amoli misialolahilä,

⁸ nelebo e nebea maala hamoi amo sulubadela ilima fädäla säla iaha maadelahilä ea ili Yoba mosaloi.

Fidaea sosoäla awäla meli

⁹ Amo aiyo amogi ili awäla idiafa eso mogogi suägila gaamu ga madela awäha neebe amo gaalu, Fidaea Godema adomolö mosö figi baledeidaia fedai.

10 Fedalahilä adosa salea, Fida e sidëa baagosebegi molö molö helësëi. Odoaea molö giala da-
iasebe amo gaalu, Fida e olobola salea sosoäla
awäla meli.

11 Beahaleamelebe mu doga negelahilä
nelebo afädë fagulo gadoi edefade bidi biyidiagi
gaulahilä nagadaia fisiga idogosebe meli.

12 Amodaia ami hogoi elö elöige, nagadaia
hagömoea aulo elö elöige, hagila aulo haea elö
elöige sefolalebe meli.

13 Amo beaha nebegi, ado afädë sähalea, Fida-o,
nowelahilä dia nufudala muöla säse nabi.

14 Amala säi amo nabalahilä Fidaea säla
obëgsalea, Dafidilo Geloi-e. Ai, made molö. Nilia
made mualaige, nelebo die siigi dofea madege, na
afädë dofä made maimelëla säi.

15 Amala sälebe, ado amea bu elö ema sähalea,
Godea dofea muöla säi amoda ie siigi dofea madela
sämabiola säse nabi.

16 Amo gadola bu ohodoala hamolahilä fodolo-
fali nelebo fagulo gadoi amo mudaia dusugala
neasebe meli.

17 Sosoäla awäla meli amo Fidaea mi edoiedula
asigi säosäola hehelësësa sebegi, dolö ohodoa Go-
niliasaie mosöala misi amoli maalahilä, Saimonoie
mosö abidi neala nalaba awäla beagolelahilä, idi
galo mia ami segeamadi nelo.

18 Idi galo baagido segea nea wala nabahalea,
Dolö afädë Saimono, ie ei elöda Fida, mosöa gui
sebelela nabi.

19 Sosoäla awäla meli amo Fidaea edodula
hehelësësamu sebegi Gesamia sähalea, Nabuö, dolö
ohodoaea di hogosa nea.

20 Di hä nowela digamo. Ilibalä moholö amogi

dia asigi säosäomabu. Na ili fisiga weila säi.

²¹ Amala säsebegi, Fida e digalahilä dolö amolima nabahalea, Dolö dilia hogose amoda nemelë. Edoë misila nabi.

²² Amala nabasebegi, ilia säla obëgësalea, Godeie selesaia fii afädëa ami dolö hädali afädë beaha aligilo Goniliasama sähalea, Fida di neebee misialamalo. Ea säse amo dia nabualola säimelë. Goniliasada dolö asigi mogoi, Godebalä bedäla nagadaiala aligilo neamelë. Yu udia dolö amoliage e asigi mogoi neala sälomelëla säi.

²³ Amala säsebegi, Fidaea ili mosöa digafiamola sälahilä, ili ami adi.

Fida e Goniliasaie mosöa asi

Diala nowela hiligila afiai. Edoolali odoa Yoba gaamugi nefolalo amolige hiligila afiai.

²⁴ Amo aiyo amogi e Sisalia gaamugi besela galai. Gaamugi ami Goniliasaea ili beaha nelo. E sosogo amolige e damelëfalä amolige misialolahilä, ili gegedola beaha nefolalo.

²⁵ Fida e digala besela galasebegi Goniliasa maalahlilä, ie emo mia gumusula dia idogoi.

²⁶ Amala hamosebegi, Fidaea e nabeleia idahalea sähalea, Di nowemo. Nege dolöfämelëla säi.

²⁷ Fidaea ebalä adodola mumusogi digahamelebe udia dolö yafie gegedoi dibe meli.

²⁸ Bealahilä ilima sähalea, Afädë Yu dolö neebe amogida udia dolö fii elöbalä aligilo madege, amase, söfëge aulo madela säla negei amoda dilia dawadigi nebege. Amala hamolo gaso, dolö elöma dida nafade, amase, Godeie siigi dofea madela made sämäia Godea nema oleimelë.

²⁹ Amalebe misialoi amogi na säla obëgëla made, ne misimelë. Amaimo, mi edoie ne misialaila nabahala nabi.

³⁰ Amala nabasebegi, Goniliäsaëa sähalea, Gomoie gahada deadi walio neebe we gadola eso bëgisebe amo gaalu, nihi mosöa Godema adosa sebegi, dolö afädë fagulo hedabi eleloi salugai nie odagia maala nelo gabio.

³¹ Amala maala nea ea sähalea, Goniliäsa-o, dia Godema adoi amo ea nabi. Amase, dia nelegei munige busadäoi amoligali iaha aligilo amoge Godea made elaboi nea.

³² Dolö afädë Saimono, ie ei elöda Fida, e Yoba gaamugi neamelë. Dolö odoama bea mosalamalo. Dolö amoda edaio Saimonoie mosöa söfë misi saleamelë. Saimono ameada sugua gao gafodo nealahilä, amea nelebo odoa hamomolöie daiaha aligilo. Ie mosöda duhulu agesugi neamelëla säi.

³³ Amala sälebe na fodolofali di bea mosalola säi. Nabalahlilä misi goda hedabi hamoi. Ne-sege. Amaimo, Dafidilo Geloia sulubadela dima sämalola säi amo gadola säsebe amo nabolö nili sulubadela Godeie sidaia gedola saleawela säi.

Fidaea Goniliäsaie mosöa Ado Mala Hedabi olelei

³⁴⁻³⁵ Fidaea sähalea, Godea udia dolö sulubadela memelela made, fii sulubadelaëa ebalä bedäla nagadaialahlilä, mala mogoi hamosa nefolalebe amoli Godea hulu helësëla obeägilo neebe amoda, dofä na walio beagolei neawe.

³⁶ Godea neala dalulasilo Ado Mala Hedabi Yesu Geleso aulodaia nea säla, Isilale udia dolöma säla i amo dilia dawadigi nebego. Yesu Geleso amoda udia dolö sulubadelaie Dafidilo Geloia nea.

³⁷ Yonea ödägi gelo mala oleleibua, Galili ami mi gäwilahilä, Yudia sege sulubadelamadi hamoi amo dilia dawadigi nebego.

³⁸ Ami hamoi amoda gowe. Godea Nasalese fii Yesu memelela Eleloi Gesamige, geloige, ema söga negesebegi, Gode ebalä nelo amea Yesuea fufuia nawesa nea, udia dolöma hedabi hamola digi, udia dolö mugabe busaie geloi hawa nefolalebe amoli sulubadela wahila digi amo dilia dawadigi.

³⁹ Ea Yalusaleme neage, Yu udia dolöie sege sulubadelagi neage hamoi amo nilia beaha maadei. Iliä e baagomäia iigi baala negeimelë.

⁴⁰ Amaimo, segeyo äudä nelolahilä osodagi Godea dolö amo nowela ifosilahilä, udia dolöea e bimäia olei.

⁴¹ Amala olei amoda, udia dolö sulubadelama made, Godea e bimäia memeleiamu meli. E baagola nowesebegi ebalä molö ödäge naha aligilo neebe nilimamu oleimelë.

⁴² Ea nilima sähalea, Udia dolöma ado mala säla iahalea, udia dolö dafidi baagoi amolilege walio nefolalebe welilege gudi mogelo namiäia Godea ne memelela ifosila säla imalola säi.

⁴³ Dafidi bea sälo nefolalo amoli sulubadelaäe ie helësëla bea säla sähalea, Ema asigi afädë negei nefolalebe amolia nafade hamoi amoda Godea ie äia hëla digimolömelëla säi.

Godea udia dolö fii odoagali Eleloi Gesami i

⁴⁴ Fidaäa ado amo, aso, säha nebegimu, Eleloi Gesami udia dolö ea säi amo nabaha sefolalo amoli sulubadelama digai.

⁴⁵ Asigi afädë negei gafodo damulo Fidabalä misi amolia Eleloi Gesami memälä udu ilo amo fii odoama söga sali amo beala fudugisa dilo.

⁴⁶ Fudugi amoëe mida gowe. Udia dolö amolia ado elö säla, Gode eda edefade neala säse nabi amogi. Amalahilä Fidaea nabahalea,

⁴⁷ Nilä Eleloi Gesami nii amo gadola nii amoli ödägi made gemolöila sämolöi nealela nabi.

⁴⁸ Amala nabasebegi, ea Yesu Gelesoie ëigi ödägi gemalola säi. Amalahilä ilia ema segeyo odoa ilibalä namolömelëla säla gauia idai.

11

Fida e Yalusaleme awälahilä nelebo hamoi säla ï

¹ Abosolo iliage edoolali Yudia sege sulubadelagi nefolalo amoliage nabahalea, udia dolö fii odoa amoliage Godeie ado mala neala gaui neala säi amo nabi.

² Nabalahlilä nea, gafodo damulo dolö odoaea Fida Yalusaleme awäla besela galasebegi, ilia ema nemoi.

³ Nemola sähalea, Dia dolö gafodo made damui nefolalebe amolile mosöa digalahilä, ilibalä molö gedola naha sulo gabiola säi.

⁴ Amala säsebegi, Fidaea nelebo dafidi mi gäwila hamoi amo ilima awala sähalea,

⁵ Ne Yoba gaamugi Godema adosa sebegi, olobola salea sosoäla awäla beahamelebe, mudaiala nelebo fagulo gadoi edefade bidi biyidiagi gaulahlilä ne mia fisiga idogoso.

⁶ Fisiga idogosebegi fagulo gadoi amogi na siila fädäla beahamelebe, sugua foi elö elöige, hogoi odoage, hagömoëa aulo gadoige, hagila aulo haeage sefolalebe meli.

⁷ Beaha nebegi nema ado afädë sähalea, Fida-o, nowelahilä dia nufudala muöla säse nabi.

⁸ Amo nabalahlä na säla obögësalea, Dafidilo Gelo-i-e. Ai, made molö. Nilia made mualaiqe, nelebo die siigi dofea madeqe, afädë nie nafia made maimelëla säi.

⁹ Amala sälebeda ado amea mudaiala bu elö sähalea, Godea dofea muöla säi amoda ie siigi dofea madela sämabiola säse nabi.

¹⁰ Amo gadola bu ohodoala hamolahilä nelebo amoli sulubadela mudaia dusugala neasebe meli.

¹¹ Amo gala dolö ohodoa Sisialia fisiga gai amoli mosö ne neebee ami maala besela galasio.

¹² Besela galasebegi Gesamia nema ilibalä moholö amogi dia asigi säosäomabula säi. Amala säsebegi, nedoo gafeia amolalige nebalä awälahlä, nihiligila dolö amoie mosöa nogila digai.

¹³ Digalahilä ea nilima säla iahalea sähalea, Selesaia fi afädë nie mosöa maase meli. Selesaia fi amea sähalea, Dolö odoa Yoba mosaloi, amoli awäla dolö afädë Saimono, ie ei elöda Fida, e misiäia bea mosaloi.

¹⁴ Ea ado mala säla iasebe amea dige die mosöa neebe amolige dili sulubadela damula moholömelëla säila säi.

¹⁵ Amaimo, na ado säha nebegi, Eleloi Gesami dafidi mi gäwila nilima digai amo gadola ilimage digasio.

¹⁶ Amala hamolebe na helësëla obögësalea, dafidi Dafidilo Geloia ado säi amo gadola, Yoneada ödäea gesa nelo, dili Eleloi Gesamia gemolömelëla säi amo helësëla obögëimelë.

¹⁷ Dafidilo Gelo Yesu Gelesoma asigi afädë negesebegi, Godea niligali i amo gadola, iligalige iasebegi, na Godema iligali amala imabula sämolöi nelolela Fidaea säla wagai.

18 Amala säi amo nabalahlilä, ilia bu säla obëgëla made, Godeie ëi gauia adala sähalea, Godea udia dolö fii odoa neebe amoliage asigi besulahilä namolö gähe neala gaumäia iligali fu i gabula säi.

Udia dolö Godea wela ifosisi Ädiago nefolalo

19 Sidibeni baagomäia nufia amila odoaea ili neala sëlasisa nebegi, udia dolö fisäla dusudasila afiai amoli fisäla odoa Fonisiage, Saibulusige, Ädiagoge awäla ado mala säla iia Yu udia dolö mamu olelela aliligi asi.

20 Amai gaso, fisäla asi amoligi Saibulusi dolö odoage Sailini dolö odoage Ädiago gaamugi awäla Giligi udia dolö mage Dafidilo Geloia Yesuie Ado Mala Hedabi olelesa nelo.

21 Dafidilo Geloia ie geloi ilima olesebegi udia dolö yafie asigi afädë negesa maadelahlilä Godemadi namolö obëgëi.

22 Amala hamoila säi amo Godea Yalusaleme udia dolö wela ifosi nefolalo amolia nabalahlilä, ilia Banabasama Ädiago segea bea mosalai.

23 E awäla besela galalahilä beahamelebe, Godea ili hedabola ugila negei amo bealahilä ea obeägi. Obeägilahilä ea ilile iso asigi gelolasila udia dolö sulubadelama sähalea, Fisila made, Dafidilo Geloibalä dila nebegoda go wälasimu namialola säi.

24 Banabasa e dolö hedabi, Eleloi Gesami ema nobai nea, asigi afädë negei geloi nelo amea amala säi. Amaimo, udia dolö yafiege Dafidilo Geloima asigi afädë negela baai.

25 Amala hamolahilä Banabasaea Solo hogomolöie Dasasa asi.

²⁶ Beagolelahilä ea e Ädiago sigi obëgëi. Ädiago ami gäheo i afädë ele udia dolö Godea wela ifosi nefolalo amolibalä gechedola nea, udia dolö yafiema mala säla olelesa nelo.

Yesu bëgëla aulo Ädiago ami mi gäwila Geleso sosogola ëi negei.

²⁷ Segeyo amo gaalu, bea sälo odoa Yalusaleme-lahilä Ädiago digai.

²⁸ Iligi afädëie ëi Agabasa e nowelahilä, Gesamiie geloia bea säla negesalea sähalea, Sege fëi sulubadelagi sidë i edefademalä gelola moholömelëla säla negei. Amala säi amo gadola beaha aligilo Gini Sisa Golodiasa nebegi gausiala digai.

²⁹ Ado säi amo nabalahlä, bëgëla aulo nefolalo amolia ado afädë negela, edoolali Yudia nefolalebe amoligali ugila negela imolöie, muni dibe amo gadola idulämelëla säi.

³⁰ Iliä amala säi amo gadola hamolahilä, ilia Babasale Sololele naabogi gausilahilä, dolö asigi gäwi dafidilo nefolalebe amolima imolöie gaula mosaloi.

12

Yamese baagömäia nufudalahilä, Fida nafodoi

¹ Amo gaalu, Gini Heledoea udia dolö Godea wela ifosi nefolalo odoa amoli neala sëlasimolöie gaula nafodosa nelo.

² Ea Yoneie edoo Yamese baagömäia nudulo helebea nufi.

³ Heledoea beahamelebe, Yu ilia ea nelebo hamosebe amogi haeafula obeägisebegi, Fidage gaula nafodomalai. Ea amo hamoi amo Segeyo

Edefadegi beledi edelo yidila made gobela molö fu amo gala amala hamoi.

⁴ Fida gaula galabaia mosöa negesilahilä, ami dolö nudulu gäwi biyidia amolia Fida e idihë namialai. Nudulu gäwi afädë afädëlagi ami dolö biyidia biyidiala ifosisi. Amala ifosisilahilä, Heledoea Baagila Asi Segeyo amo baagibua ebalä gudi-molöie udia dolö neebee e sigi moholöla helësëi.

⁵ Amaimo, Fida e galabaia mosöamu nebegi, udia dolö Godea wela ifosi amolia ie Godema gelola adosa nelo.

Selesaia fii Fida fisigäi

⁶ Heledoea aiyo gadola e sigi moholölahilä, walio gasigi gadola, Fida e ami dolö äudä amole mogogi ami adi dilo. Iliä e igi ëfë äudäea begela negesilahilä, ami dolö odoaea galabaia mosö amoie idi galo baagido idihë nefolalo.

⁷ Amala dibegi, Dafidilo Geloie selesaia fii afädë fodolofali maala aligisilahilä, galabaia mosö hogolia ami yo digai. Selesaia fii amea Fidaie afawa nufigila didiigisalea sähalea, Di fodolofali nowemola säi. Amala säi amole igi ëfë äudä amo Fidaie naabogi amila fisigäla digai.

⁸ Amala hamosebegi, selesaia fii amea sähalea, Die malibu fëdöla negelahilä, emo usililoge salug-amola säi. Amala säi amo gadola Fidaea hamosebegi, selesaia fii amea ema sähalea, Die daia salugalo fagulo amoge salugalahlilä, ne bëgëla misiëla säi.

⁹ Amala säsebegi, e awäse amo gadola bëgëla segea doadigila awähaleada, selesaia fii e dofä sigi

awäsebela made helësëla, ea sosoäla awäla beahala helësëi.

¹⁰ Ele awähalea idihë aligilo elö neebe amo baagila awäla, elö neebe amoge baagila asi. Amala awäla gaamugi aulo idi galo igi aeanea hamoia gaia ami besela galai. Besela galalebe idi gai amo hï asigia doga negesebegi, ele doadigila asi. Awäla idi afädë amogi awäha nebegi, selesaia fii amea e amilahilä fodolofali dīgila asi.

¹¹ Selesaia fii amea dīgila asibua Fidaea fädäla helësëla obögësalea sähalea, Heledoie naaboea gauia amilage, Yu udia dolö ilia hamomolö helësëia amilage, Dafidilo Geloia ne damula awäla ië selesaia fii dofä fisiga wei gabula säi.

¹² Amala fädäla helësëlahilä, Fida e Yoneie eme Meliie mosöa asi. Yoneie ei elöda Maga. Mosöa ami udia dolö yafie gegedolahilä Godema adosa dilo.

¹³ Fida e maalahilä idi galo baagido segeamadila nea, gödögödöla nufigisebegi, hamoi hamolasilo dolisä ei Olodaea idi gai dugimolö misi.

¹⁴ E maalahilä säse amo nabahamelebe, Fidaea adose nabala e edefademalä obeägisalea, idi gai amo made dogala baluluia digalahilä sähalea, Wae, dili-e! Fida idiliba misi neamelëla säi.

¹⁵ Amala sälebe, ilia ema sähalea, Di gagaosa walofala säi. Amala säsebegi, ea ado gelolafali sähamu nea, Ai, dofä misi neala säi. Amalebe ilia sähalea, Goda ië selesaia fii gabula säi.

¹⁶ Iliä amala säha dibegimu, Fida ea, aso, idi galogi gödögödöla nufigisamu nebegi, idi gai dogalahilä beahamelebe Fida neebe beala ili edefademalä fudugi.

¹⁷ Amalebe udia dolö amolia made adomäia

ea naabo usigililahilä, Dafidilo Geloia e galabaia mosöa amila doadigila segea sigi misi amo ilima awala iaha maadei. Awala iaha maadelahilä sähalea, Amala hamoimelëla Yamesemage, edoolalimage säla imalola säla ialahilä Fida e doadigila awäla sege elögi asi.

¹⁸ Sege yose amo gaalu, ami dolö amolia fudugilahilä Fida abodogi asidula didiäla edefademalä asigi säosäosa dilo.

¹⁹ Amala hamoi gabugi, Heledoea e hogoi amo made beagolesebegi, idihë aligilo nelo amolibalä gudilahilä ili baagomäia nufualai.

Amalahilä Heledo e Yudia sege dīgila Sisalia gaamugi namolö asi.

Heledo baagoi

²⁰ Udia dolö Daiamadi nefolalebe amolimage, Saidonomadi nefolalebe amolimage, Heledoea edefademalä mihaläha nelo. Amala nebegi, hili asigi afädë negelahilä Heledo neebee asi. Iliä bea moholö nea, gini dilo mosö beaha aligilo dolö ëi Balasadusabalä ado afädë negelahilä, hobeala neala dalumolöie ado sämolö ili Heledo neebee asi. Amala sämolö asi amoie mida, ilia Heledoie segeamadi molö bidia nelo amo helësëla amai.

²¹ Segeyo daiäla negei amo gala Heledo e beaha aligilo giniie fagulo sedade salugalahilä, beaha aligilo filodaia salea, ea udia dolöma ado edefade säla i.

²² Amo nabalahilä udia dolö amolia, Ado säsebe goda dolöea säse amo gadola made gabu, gode afädë elöea säse amo gadola säsebela gelola sähamu nelo.

²³ Ado amo Heledoea nabalahlilä, Godeie ei gauia adamolö made helësei amea, Dafidilo Geloie selesaia fii afädëa e fodolofali nufi. Amalebe, fësöea naala e hame doala asi.

²⁴ Amaibua Godeie ado mala säla daidola bäui.

²⁵ Hä Banabasale Sololea Yalusaleme ami ugila negemolö asi amo hamosa maadelahlilä, elea Yone Maga sigi hiligila Ädiago obëgi.

13

Banabasale Solole Godeie hamoi hamomolö mosaloi

¹ Udia dolö Godea wela ifosi Ädiago nefolalo amoligi odoaea bea sälo nea, odoaea säla olelelo nelö. Ilile ëida gowe, Banabasage Simeono, ie ei elö Nigeluge, gaamu Sailini ami fii Ulusiusige, beaha aligilo Heledobalä esamala aligilo Manainige, Sologe, ili nelö.

² Segeyo afädëgi udia dolö Godea wela ifosi amolia Dafidilo Gelo helësëla molö aiala made mai. Made naala nea, Dafidilo Geloie ei gauia adala Godema adosebegi, Eleloi Gesamia ilima sähalea, Banabasale Sololea hamoi hamomäia na helësëla daiai dibe amo gadola hamomäia, ele nafolala odasimalola säi.

³ Amalebe ilia molö made naala aiala, Godema adola elema naabo negesilahilä mosalai.

Banabasale Sololea Saibulusi Godeie ado mala olelei

⁴ Eleloi Gesamia ele mosalosebegi, ele gaamu Selusia ami digai. Selusia amila ele du edefadegi fila awäla Saibulusi södölo dibeami asi.

⁵ Ele awäla gaamu Salamisi besela galalahilä, elea Yu udia dolöie gedolo mosö nefolalebea ami

Godeie ado mala säla iaha nelo. Ele ugila negeomolöie Yonege elebalä asi.

⁶ Ele ödä södölo amoie sege sulubadelamadi nawesa nelolahilä awäla gaamu Bafosi besela galai. Segea ami Yu dolö afädë sebe meli. Dolö ameada golë elö elöla hamosa aligilo nea, wäfalä bea sälo nelo. Amoie ëida Ba-Yesu.

⁷ Eda gamane beaha aligilo dolö Segiasa Folasabalä aligilo nelo. Gamane dolö amoda asigi gäwi nulügäi nelo. E Godeie ado mala nabelälä Banabasale Solole misialola wei.

⁸ Amai gaso, golë hamolo, amoie ëi elöda Elimasi, ea Banabasale Sololele ado bafuäha nelo. Mida, ea gamane beaha aligilo neebe amea Yesuma asigi afädë made negemäia helësëla amai.

⁹ Amala hamosebegi, Solo, ie ëi elö Folola sälo nelo amoma Eleloi Gesami nobalahilä ema siila dialea sähalea,

¹⁰ Wäfalä säsäla dahila nelo sulubadelage, asigi musügä negela gadiabolo sulubadelage dima nobai gabu. Amai, dida mugabe busaie malö neebe, mogoi hamomolö dibe amo sulubadelabaläda dia ado neala aligilo. Diada Dafidilo Geloie mala mogoi hamolo dibe amo halowemolö helësësa aligilo amo, made fisimolöle.

¹¹ Amai galëda, nabualo. Dafidilo Geloie naaboea di nufudasebego. Hä die si dofogalahilä, eso neë made beala, holöbö segeyo sedade namolömelëla säi. Amala säi amole fodolofali gelë gadoiage gasimi sagai gadoiage ie si gesusebegi, nagubila nawesalea afädëa e nabelela gaula sigi mosäia ea hogosa nelo.

¹² Amala hamoi amo bealahilä, gamane beaha

aligilo dolö amea Dafidilo Geloïie ado mala säi amo nabala fudugilahilä, asigi afädë negei.

Banabasale Folole Bisidia segeïe gaamu Ädiago ado mala säla olelei

¹³ Bafosi amila Fologe ebalä asi amolige du edefadegi fila awäla Bäfilia segeïe Bega gaamugi besela galai. Gaamugi amila ili digïla Yone e Yalusaleme obëgëi.

¹⁴ Amala hamosebegi, ili Bega gaamugi amila awäla, Bisidia segeïe Ädiago gaamu dibeä ami besela galai. Besela galalahilä, segeyo Sabada gafegi ili gedolo mosöa ami awäla sulo.

¹⁵ Gedolo mosöa ami sebegi, Mosese nebegi Ado säla negei amoge, amase, beä sälo nefolalo amolia säla negei amoge nidelahilä, gedolo mosö beaha aligilo amolia dolö afädëma ilima sämäia säsi. Säsisalea, Nedoola dili-e, dilia udia dolö asigi gelolasimolöie ado afädë gaulea galëda, säla imäiamelëla säi.

¹⁶ Amala säi amo nabalahilä, Foloea nowela aligila naabo usigililahilä sähalea, Isilale dolö diliage, amase, fii odoa Godebalä bedäla nagadaiala neebe diliage, nabualo.

¹⁷ Isilale udia dolö go ilile Gode neebe amea dafidi nilile naado nefolalo amoli memelei. Amalahilä ili Isibi awäla nebegi, sosogo malei besela galamäia neala edelasilahilä, hobeala ie geloïamu Isibila sigi doadigila asi.

¹⁸ Sigi awäla sege nafade udia dolö aligisia made ami nebegi, gäheo i nabülasi biyidiagi ea yöi gaula hï guila auaula nelö.

19 Amalahilä Gainana ami fii gifalädalä sulo amoli nufudaha maadelahilä, ilile sege Isilale udia dolö samiäia hilima imelë.

20 Amala hahamola maaha nea gäheo i hädali biyidiaie nabülasi bia gadoi nelo. Sege amo nealahilä, Godea ei sälo odoaea beaha aligimäia iligali äla beaha aliligi awälahilä, bea sälo Samuale nelo ami awäla besela galai.

21 Samuale nebegi, ilia beaha aligilo gini imäia ödögesebegi, Godea Bëyamini sosogomadila Gisiie malö Solo i. Amala äasebegi Solo eda gäheo i nabülasi biyidiagi beaha aligilo nelo.

22 Godea Solo beselalahilä, ilile beaha aligilo Gini Debidi namiäia memelela ifosi. Debidi helësëla ado gomalä säi, Yesiie malö Debidida nie naabo dafädi, hame salifali neebe melimelë. Eada na helësëi dibe amo gadoi hamosa maademolömelëla Godea säi.

23 Dolö amoie yaua mäumadila afädëa Isilale udia dolöie damula aulo namiäia Godea dafidi säla negei amo gadola Yesu e misimelë.

24 Yesu e, aso, maala ulufadigila made nebegi, Yonea Isilale udia dolö sulubadelama sähalea, Asigi besulahilä ödägi gemalola säla äaha nelo.

25 Yonea ie hamoi hamola wagamolö fu ga madesebegi, ea sähalea, Diliada ne nowë neala helësësebe. Neda amo mademelë. Amai gaso, nabualo. Hobeä ne baagia e moholömelë. Na ie emo usililo efë fisigamolö dofea made neawela Yonea säimelë.

26 Nedoola dili, Abalahamaie malöge, amase, fii odoa Godebalä bedäla nagadaiala neebege, damula moholö amoie ado gowe nilima fisiga wei.

²⁷ Udia dolö Yalusaleme nefolalo amola, ilile dafidilo nefolalo amolalia dolö amo fädäla dawadigi made nelo. Dawadigi made nea, ilia e baagomäia nufulöla säi amea bea sälo nefolalo amolia ado säla negei dilo amo segeyo Sabada gafe sulubadelagi nidesamu aligilo amo gadola gausiala digai.

²⁸ Amaimo, e baagomolö mi maadegi, ilia Bailadima nufualola säi.

²⁹ İe helësëla dödëla negei dibe amo sulubadela gausiaha maadesebegi, ilia idaijala gaula digalahilä igi äbägi bausi.

³⁰ Amai gaso, Godea e bauia amila neala nowelasi.

³¹ Nowelasissebegi, dafidi ebalä Galilila Yalusaleme fedafiai amolia e segeyo yafiegi meli. Meli amolia udia dolöma e olelo nea.

³² Amaimo, nilia dilima Ado Mala Hedabi säla İaha neawe. Dafidi nilile naadolalima hamomölömelëla säla negei amo gadola

³³ Godea Yesu neala nowelasi amea ilile malö nilima gausiala digaimelë. Gë Udälo agedugi dödëla negei amoda gowe.

Dida nİe malö nebege, walio neda dİe Diado aligisawela
säla dödëla negei dialea. *Gë Udälo 2.7*

³⁴ Godea Yesu neala nowelasi amo bu made baagomölömelëla gomalä säla dödëla negei dialea.

Dofä hedabi obeägİlasimolö dafidi Debidima İmolömelëla säla İ amo gadola dilima İmolömelëla
säla dödëla negei dialea. *Aisaea 55.3*

³⁵ Amo gadoi ado elö säla dödëla negeida gowe.

Die hamoi hamolasilo dihi memelela odai amo
 bauia ami made sigämolömelëla
 säla dëdëla negei dialea. *Gë Udälo 16.10*

³⁶ Debidi nelo amo gaalu, Godeie hamoi hamo-
 molö negei dilo amo gadola hamosa maadelahilä
 e baagoi. Baagosebegi ie eedolali bauia ami eege
 amimu baula sigäi.

³⁷ Amaimo, Godea afädë neala nowelasi amoda
 sigäi made melimelë.

³⁸ Amai gabugi, nedoola dili-e, Yesuie aulodaia nea
 nafade hamoi amo hëmolöie mala dilima säla iaha
 neebewe helësëmalö.

³⁹ Ea hamoi amea, sulubadelaea dolö amoma
 asigi afädë negesebegi, nafade hamoi amo Mosese
 nebegi Ado säla negei ameadä hëmolö uli amo
 sulubadela ea hëla digisa maadelo nea.

⁴⁰ Amaimo, bea sälo nefolalo amolia dafidi bea
 säla negei amo dilima gausiala digaloea, hedabola
 idihë namialo. Bea säla negei amoda gowe.

⁴¹ Gadiabolo nefolalebe, bimo. Beala fudugilahilä
 baago geia mosalo. Dili neebe amo gaalu,
 na hamomolö amo afädëa dilima amala
 hamoila säsedä, dilia dofä gabula made
 helësëmolömelëla

säla dëdëla negeila Foloea säla wagai. *Habagaga
 1.5*

⁴² Amala säla wagalahilä, Folole Banabasale
 gedolo mosöalahilä doadigila awäha nebegi, udia
 dolöea elema sähalea, Mala amo gadoi segeyo
 Sabada gafe elö gogi säla imolö obëgëmalola säi.

⁴³ Amalahilä gedoi amoli dusula awäla, Yu udia
 dolö yafiege, amase, udia dolö fii odoa Yuie mala
 bëgëla hamolo yafiege, Folole Banabasale bëgëla
 asi. Bëgëla maasebegi, elea ilima säla iahalea,

Godea ugila negelo dibeami fodola namialola gelola säla i.

⁴⁴ Segeyo Sabada gafe elö amogi Godeie ado nabalö gaamu sulubadela gegedoi gaso, odoa holöbö made gedoi.

⁴⁵ Amaimo, Yu udia dolö amolia yafie gegedoi dibe amo bealahilä, ilile iso asigia Foloma edefademalä naabo gëlahilä, e gadiabola, ie ado ba-fuäha nelö.

⁴⁶ Amasebegi, Folola Banabasalea hubabelela made gelola nea sähalea, Amaimo, Godeie ado dilimadale dafidi säla imolöi galea gaso, dilia helësäleada, namolöi namolö nimolö amo nilia dofea madela helësëlahilä, ado amo eegeia gasebe-goeada alia dili dögila fii odoamadi moholömelë.

⁴⁷ Mida, Dafidilo Geloia alia hamomalai amoda gowe.

Dida fii odoa udia dolöie yo digalo nebego.

Damula aulo amo sege föi dibe sulubadelamadi gaula mosäiala

säi.

Aisaea 49.6

⁴⁸ Elea amala säi amo nabalahlilä, udia dolö fii odoaea obeägila, Dafidilo Geloie ado mala gauia adalahilä, Godea namolöi namolö amo gaula namiäia memelei amoli sulubadela asigi afädë negei.

⁴⁹ Amalahilä Dafidilo Geloie ado mala neala gaulahlilä sege amogi säla daidoi.

⁵⁰ Amaimo, Yu udia dolö amolia gaamu amoie udia dafidila fii Gode helësëlo sefolalo amoliage, dolö ei sälo nefolalo amoliage mihalämäiala, Folole Banabasale neala sälasimäialahlilä, sege amomadi made namiäia nesila digi.

⁵¹ Amala hamolebe ilia asiala hamoi amo helësëmäia elea dao elele emogi baai amo fëfëla salalahilä, Aigoniama asi.

⁵² Yesu bëgëla aulo nefolalo amolima obeägiloge Eleloi Gesamige nobai nelo.

14

Folole Banabasale Aigoniama nea ado mala säla olelei

¹ Aigoniama ami Folole Banabasalea gaamu odoagi aulo amo gadola Yuie gedolo mosöa ami asi. Ami awälahilä ado mala hedabolafalä olelesa nelo amea, udia dolö yafie, Yuge, Giligige, ilia asigi afädë negei.

² Amasebegi, Yu udia dolö asigi afädë negemolö haboi nefolalo amolia udia dolö fii odoa amolia edoolalima bimolö habobamäia si nigilasi.

³ Segeyo yafie Folole Banabasale ami nea, bedäla made Dafidilo Geloïie ado mala gelola olelesa nelo. Amala olelesa nebegi, Dafidilo Geloïie ugila negelasilo mala säla ï amo dofä gabula helësëmäia, Dafidilo Geloia ele neala gelolasilahilä, dolöea hamomolöi made gadoige, hïdo elöige hamomäia elema geloi ï.

⁴ Amala hamosebegi, gaamugi ami fii udia dolö nefolalo amoli mogelahilä, odoa damula Yumadi, odoa damula abosolomadila mogela nelo.

⁵ Amasebegi, Yu ilige, amase, fii odoa amolige, ilile sigi aligilo amolibalä nea, Folole Banabasale së muäia igia nifulö dialeala helësëi.

⁶ Amala helësësaleala säi amo nabalahlilä, Folole Banabasale fisäla awäla Ligonía segeie gaamu Ilisidalage Debigge sege amoie ga made ga madela dibeadi amogige asi.

⁷ Amige elea Ado Mala Hedabi säla iia asi.

Folole Banabasale Ilisidala nea hamoi

⁸ Ilisidala gaamugi ami dolö emo nafadei afädë sulo. Emea emo nafadei amo gadoi neegela ägüla misi salea, holöfalä emesala nawelo made sulo.

⁹ Dolö amea Foloea ado säsebe amo nabaha sulo. Nabaha sebegi, Foloea ema sisamelebe, e wahimäia asigi afädë negei sebe amo bealahilä

¹⁰ gelola sähalea, Dihile emoea nowela namiëla säi. Amala sälebe, dolö amo nila fedala aligisilahilä nawesa nelo.

¹¹ Foloea amo hamose amo bealahilä, Ligonía udia dolö yafie gegedoi amolia hilile ado adola gelolafalä sähalea, Dolö gadoi hamolahilä, gode amoli nihili neebee digai gabuwela säi.

¹² Amala sälahilä, Banabasaie ei Susa negei. Amase, Folo eda ado adolo neala helësëlahilä, ie ei Hemisi negei.*

¹³ Ilisidala gaamu amoie yala baagido ami ilile gode Susaie odala ilo mosö olasi nelo. Amoie gobela ilo dolö nelo amea mama bebegesiala amalei amoge sugua gao gawali amoge idiliba ami sigi misi. Sigi maalahilä eage gegedoi nefolalo amoliage elegali göa nelegela nufudala imolö helësëla sigi misi.

¹⁴ Amala hamomolöie hamosa neala säi amo nabalahlilä abosolo äudä Banabasale Foloea helele

* **14:12:** Iia hilile gode ei sälo dibe amo gadola ei negei.

fagulo amo nulilahilä, udia dolö gegedoi mogogi ami baluluia awälahilä, ado gelola silälasila

¹⁵ sähalea, Dolö dili-e, dilia goda edo hamomolöie hamosa. Alige dolöfä dili nebege gadoi neamelë. Dilia nelebo memalä gadoi go fisila Gode namolöi neebe amoma besumäia alia Ado Mala Hedabi säla imolö misimelë. Gode namolöi neebe ameada muge naga föige ödä duhuluge nelebo sulubadela amoligi dibe neebe sebe amoge ea hamosa maadei.

¹⁶ Dafidi ea udia dolö fii odoa siiba fii amoli sulubadela hili helësëse amo gadola mosäia fisigisi.

¹⁷ Amai gaso, ea hamoi amo sulubadela e dofä neala helësämäia, musügä negela made, hi e olei. Ea hedabi hamosebe amoda gowe. Sege mudaiala fisiga idaloge, amase, molö bäulasiloge amole diligali ilomelë. Diligali molö iase amea bolelasiloge obeägilo dilile isogi nobalasiloge neamelëla säi.

¹⁸ Elea ado amala sälahilä, udia dolö gegedoi sefolalo amolia elegali göa nelegela sugua gao made nufudala imäialahilä, baagi sei hamoi hamosa nelo. Amalebeda ilia made amai.

¹⁹ Amaha nebegi, Yu odoa Ädiagolage Aigoniama malage mofiai. Mofiai amolia helësëse amo gadola gegedoi amolia amala helësämäialahilä, ilia ado afädë negei. Ado afädë negelahilä, ilia Folo igia nufi. Nufi amo baagoi gabula helësëlahilä, dusugala gaula awäla gaamu baagido negesi.

²⁰ Amala hamosebegi, Yesu bögëla aulo nefolalo amolia Folo e amalela digila nebegi, e nowelahilä gaamu amogi bu obögëla digai. Diala aiyo amogi Banabasale helegela Debi asi.

Banabasale Fololea Yesu bögëla aulo nefolalo

amoli neala gelolasi

²¹ Ele gaamugi ami nea elea Ado Mala Hedabi säla ïaha nelö. Säla ïamea Yesu bögëla aulo yafie besela galai. Amalahilä ele Ilisidalage Aigoniamage Ädiagoge obëbögela awähalea,

²² elea bögëla aulo nefolalo amoli neala gelolasila sähalea, Dilia asigi afädë negei nebegoda go wälasimu namialola säsisila aliligi obögëi. Elea sähalea, Godea Beaha Maadela Sigi Neebea ami moholöie, nilia yöi yafie bimolömelëla säla ï.

²³ Asi amo obögësalea, elea Godea wela ifosi sege hido hïdologi dolö odoa asigi gäwi dafidilo nefolalebe amolia sigi aligimäia memelela ifosisi. Ifosisilahilä, molö made naala aiala nea, udia dolö Dafidilo Geloima asigi afädë negei nefolalo amoli Godema adola ema gausisila aliligi asi.

Ele Sisalia segeie gaamu Ädiago obögëi

²⁴ Amalahilä Bisidia sege baagila awäla Bäfilia segea besela galai.

²⁵ Besela galalahilä elea Bega gaamugi ami Godeie ado mala säla ïalahilä, Adalia digai.

²⁶ Adaliala ödä sibigi fila Ädiago obögëi. Dafidi Ädiago ami elea hamoi hamola wagai amo hamomäia Godea udia dolö wela ifosi Ädiago nefolalo amolia Godea ele ugila negemäia ele Godema adolasila gausia ami obögëi.

²⁷ Ami besela galalahilä, elea udia dolö Godea wela ifosi nefolalo amoli gegedomalolahilä, Godea elemadi aligila hamoi amo ilima awala säla ïaha maadei. Elea sähalea, Udia dolö fii odoa

amoli Yesuma asigi afädë negemäia ea idi doga negei gabiola säla i.

²⁸ Eleda segeyo yafie Yesu bëgëla aulo amolibalä ami nelo.

15

Mala hamogimolöie Yalusaleme gegedoi

¹ Dolö odoa Yudiala digalahilä ilia edoolalima säla olelesalea sähalea, Mosese nebegi säla negei dibe amo gadola, gafodo damulo mala dibe amo made hamoseda, Godea dili made damula molömelëla säla i.

² Amala säla i amo nabalahilä, Folole Banabasalea dolö amolibalä didiähalea holöfali made gëgëi. Amalebe ilia Folole Banabasale dolö odoa nefolalo amolibalä mala amo hamogimolöie abosolo amolimage, asigi gäwi dafidilo nefolalo amolimage, nabuäia Yalusaleme fedamalai.

³ Amala säi amo gadola Godea wela ifosi nefolalo amolia mosalosebegi ili fedafiai. Fedafiahalea ilia Fonisiamadige Sameliamadige udia dolö nefolalo amolima fii odoa nefolalo amoli Godema asigi afädë negeimelëla säla iia fedafiai. Ado amala säi amo nabalahilä, edoolalia edefademalä obeägisa nefolalo.

⁴ Ili fedafiala Yalusaleme besela galasebegi, udia dolö Godea wela ifosi nefolalo amoliage, abosolo amoliage, asigi gäwi dafidilo nefolalo amolalia dili mofiaha golela säla olei. Amasebegi Folole Banabasalea Godea elema aligila hamoi amo sulubadela ilima säla iaha maadei.

⁵ Amai gaso, Felesi sosogo odoa asigi afädë negei nefolalo amolia nowela aligilahilä sähalea,

Fii odoa amoliage gafodo damumolö dialea. Amase, Mosese nebegi Ado säla negei amoge ilia hamomäia säla imolö dialeala säi.

⁶ Ado amo hamogimolöie abosologe, asigi gäwi dafidilo nefolalo amolalige gegedoi.

⁷ Gegedolahilä ado säsäla awäla gidogo gado-gosebegi, Fida e nowela aligilahilä ilima sähalea, Nedoola dili-e, fii odoa nefolalebe amolia Ado Mala Hedabi nïe nafia nabalahlilä asigi afädë negemäia Godea dafidifalï diligi ne memelei amo dilia dawadigi.

⁸ Sulubadelaïe iso asigi dawadigi neebe Gode amea udia dolö fii odoa nefolalebe ilige dofea neebela ulufadigila olesalea ïe Eleloi Gesami niligali ï amo gadola iligalige imelë.

⁹ Eada ilige nilige mogogi nofeida maade. Iliä Yesuma asigi afädë negesebegi, ilile nafade hamoi amo ea hëla fisimelë.

¹⁰ Amaimo, dilia Gode fedogola bimolölahilä adu yöi edefade niliage nilile naado amoliage ägümolöi made amo bëgëla aulo nefolalebe amolia ägümäia neala ägüsi amo mi edoïe.

¹¹ Amala hamomolöi mademelë. Nilia helësësaleada, Dafidilo Geloi Yesuïe ugila negeloea ili damula asi amo gadola nilige damula asila helësësamelëla Fidaea säi.

¹² Amala säsebegi, Banabasale Fololea udia dolö fii odoabalä nea, Godea elema aligila nea dolöea hamomolöi made gadoige hïdo elöige hamoi amo sulubadela gegedoi sefolalebe amolima elea säla ï. Säla ïaha nebegi, ilia ado adola made, nalabola sefolalo.

¹³ Elea ado säha maadesebegi Yamesea sähalea,

Nedoola dili-e, na säsebewe nabuö.

¹⁴ Godea udia dolö fii odoa nefolalebe amoli hamei amo dafidi olela odoa iligi ie namiäia memelei amo Saimonoea nilima awala säla imelë.

¹⁵ Säla i amo gadola bea sälo nefolalo amolia ado amo wäla säla negei dialea. Amoda gomalä dëdëla negei dialea.

¹⁶ Dafidilo Geloia sähalea, Hobeä ne obëgëlahilä na Debidiie mosö dagabola digai amo hamogimolö. Mosö hai dibe amo hahamogilahilä gelolasimolömelë.

¹⁷ Mida, udia dolö fii odoa amolia Dafidilo Geloï hogomäia amamolömelë. Fii odoa nie ëi gaula neebe amoli sulubadelaea ne hogomäia amamolömelëla säi. Gowe sulubadela hamolo Dafidilo Geloia amala säila säla dëdëla negei dialea. *Amosi 9.11-12*

¹⁸ Amoda siibafali nilia dawadigi.

¹⁹ Na sämolö helësësebe amoda gowe. Udia dolö fii odoaea Godema asigi besusa neebe amolida nilia neala yölasimolö amo dofea made.

²⁰ Iliä yöi made gaumäia nilia ilima beba gomalä dëdëla fisiga gadelä. Age gowe, molö nulo dibe amogi wäfali godegali göa nelegela i muabio. Agedu gowe, udia dolö fa nimabio. Osoda gowe, hogoi elö elöla sebe amo nufudahalea, muugia heale gälo sali amola muabio. Biyidu gowe, heale hi eege muabio. Amoli dëdëla fisiga gadelä.

²¹ Mida, siibafali Mosese nebegi mala säla negei dibe amoda gaamu sulubadelagi dolö odoaea säla iahamu aligilo. Ie ado mala amoda gedolo mosö difolalebea ami segeyo Sabada gafe sulubadelagi nidesamu aligilömelëla Yamesea säi.

Fii odoa Geleso sosogo nefolalebe amolima beba dödëla ï

²² Amala säsebegi, abosolo amoliage, asigi gäwi dafidilo nefolalo amoliage, amase, udia dolö Godea wela ifosi ami nefolalo amoli sulubade-laeage ado afädë negelahilä sähalea, Nilï neebewegi dolö odoa Folole Banabasalebalä Ädiago mosäia memeledelämelëla säi. Amala sälahilä ilia Yudasale, ïe ëi elöda Basabasa, Sailasale memelei. Eleda edoolali amoligi dafidilo nelo.

²³ Beba ilia gaula mosäia gomalä säla dödëla ï.

Abosolo niliage, asigi gäwi dafidilo nefolalebe-weage, dilile didoo nefolalebe nilïa nilïle nedoo fii odoa Ädiagoge Siliamadige Silisiamadige nefolalebe dilima dili go gabiola säla beba gowe dödëla ïasisago.

²⁴ Nilï neebewegi odoaea dilima ado säla ï amea dili fudugila asigi säosäola nefolaleai amo nilïa nabi. Iliä amo amala sämalola nilïa made säimelë.

²⁵ Amoïe nilïa ado afädë negelahilä, dolö memelei amoli nilïle damelë aeaifalï Banabasale Fololebalä dili neebëa fisiga idamolöla helësëi.

²⁶ Dolö äudä amoleada nilïle Dafidilo Geloï Yesu Gelesoïe ëigi hamoi hamosalea baagomolö ga made dibeä amimu ga madela aligilomelë.

²⁷ Nilïa amala helësëi amo gadola Yudasale Sailasalea bebägi ado dödëi amo gadola adoea säla ïmäia dili neebëa mosalahagomelë.

²⁸ Eleloi Gesamiage niliage yöi afädë dilima neala baalasiloëa nilïa ado geloï biyidiamu dilia hamomäia säla ïmolöla helësëi. Amoda gowe ili.

²⁹ Age gowe, molö nülo dibe amogi wäfalï gode-

gali göa nelegela i muabio.

Agedu gowe, heale hi e muabio.

Osoda gowe, hogoi elö elöla sebe amo nufuda-
halea muugia heale gälo sali amola muabio.

Biyidu gowe, udia dolö fa nimabio.

Amo hamomabiola säi amo hamola made sisi-
gaha aligiseda, hedabola namolömelë.

Hä amomelë. Hawiola
säla dëdëla i.

³⁰ Hä mofiamalolahilä ili Ädiago digai. Digala be-
sela galalahilä ilia Geleso sosogo nefolalo amoli
gegedomalolahilä beba dëdëi amo ilima i.

³¹ Amala iäsebegi udia dolö amolia dëdëi amo nidei.
Ado hedabi dëdëi amo nidei amea ilile asigi neala
gelolasisebe amogi obeägi.

³² Yudasale Sailasaleage bea sälo nea, edoolali
bologodei namiäia neala asigi gelolasila ilima ado
yafie säla ihamu nelo.

³³⁻³⁴ Ele Ädiago ami segeyo holöbö ede nelolahilä,
ilia dafidi ele mosalola sälo nefolalebea ami
obëgëmäia edoolalia aealo alima diamiäialahilä,
Hawio obëgëmalola säi.*

³⁵ Folole Banabasale Ädiago ami nea, eleage dolö
odoa yafieage amolalia Dafidilo Geloiië ado mala
säla iadigi säla olela digisa nelo.

Folole Banabasale gëgëlahilä hido hidoi

³⁶ Segeyo odoa nelolahilä Foloea Banabasama
sähalea, Gaamu sulubadelagi Dafidilo Geloiië ado

* **15:33-34:** Dawadigi odoa ilia helësësaleada, ado odoa säi damo
gogi dialeala helësëi. Ado amoda gomalä. [Amäi gaso, Sailasa eda
Ädiago ami namolöila helësëi.]

mala säla ia ami edoolali hedabola neebelela fädäla bebea obëgädila säi.

³⁷ Amala säsebegi, Banabasaea Yone Maga helësëlahilä, nihiligila afiahala säi.

³⁸ Amai gaso, Foloea e sigi moholö amo dofea madela helësëi. Mida, dafidi ea elebalä hamoi hamomolö made awäla ele dägila Bäfiliala bahila obëgëi amogi.

³⁹ Amala helësësebegi Folole Banabasale helemu edefade gëgëlahilä mogela, Banabasaea Maga sigi gaula ele Saibulusi moholöie ödä sibigi fila asi.

⁴⁰ Amase, Foloea Sailasa memesebegi edoolalia sähalea, Godeie ugila negelo alibalä namialola säsebegi, ele asi.

⁴¹ Ele awäla Folo e Siliamadige Silisiamadige nawesa nea, udia dolö Godea wela ifosisi sege amoligi nefolalo amoli neala gelolasisila aliligi asi.

16

Dimodi e Folole Sailasalebalä asi

¹ Folo e awähamu nelolahilä, Debige Ilisidalage awäla besela galai. Ami bëgëla aulo afädë ei Dimodi nelo. Ìe emeda Yu fii udia gaso, ìe eedoda Giligi dolö nelo. Emeda asigi afädë negei sulo.

² Edoolali Ilisidala ami fiage Aigoniama fiage Dimodi eda asigi mogoi neala sälo nelo.

³ Foloea Dimodi ebalä moholöla helësëlahilä, ea Dimodiie gafodo damulasi. Amala hamoi amoie mida, segea ami Yu udia dolö neebe amoli sulubadelaeadä Dimodiie eedoda Giligi dolö neala dawadigi neebe amo helësëlahilä amala hamoi.

⁴ Ili gaamu dibeamadi amogi nawesalea ilia abosologe, asigi gäwi dafidiloge Yalusaleme ami

nefolalo amolia mala säla negei amo gadola ilia bēgēla hamomäia ilima säla iia awäha nelö.

⁵ Amalebe udia dolö Godea wela ifosi nefolalo amoli Yesuma asigi afädē negemolömadi neala gelolasilahilä, segeyo sulubadelagi odoaea asigi afädē negelahilä ilima maala baala bäusa nelö.

Folea Doloasa nea sosoäla awäla meli

⁶ Eleloi Gesamia ilia Esiamadi ado mala säla imolö mosabiola idi gasebegi, ili Filigiamadile Galesiamadilemu nawesa namolö asi.

⁷ Misia sege nofea ami awäla besela galalahilä, ili Bidiniamadi awäla besela galamolö helēsēsebegi, Yesuie Gesamia mosabiola idi gai.

⁸ Amala idi gasebegi, ili Misia baagila digala gaamu Doloasa awäla besela galai.

⁹ Awäla besela galasolo amo gala, gasigi Folea sosoäla awäla beahaleamelebe, Masedonia fii dolö afädēa ema sähalea, Dia nili Masedonia ugila negemolö duhulu dēgēla misialola säha neebe meli.

¹⁰ Folea amala sosoäla awäla beasebegi, hä, nili fodolofali Masedonia moholöie fu hogosa neada, Godea nilia ilima Ado Mala Hedabi säla imäia neala olei gabula helēsēi.

Ilidiaea asigi afädē negei

¹¹ Amalahilä nilia Doloasa digila ödä sibigi fila mogolafali awäla Samodelese besela galai. Amo aiyo amogi oböla awäla Neabolisi besela galai.

¹² Neabolisi amila nagadabodo awäla Filibai besela galai. Gaamu amoda Masedonia segeie afädē dilo. Amida Olomo gamane maala aligilo. Nili ami segeyo odoa nelö.

¹³ Segeyo Sabada gafegi Filibai gaamu amoie yala idi galo baagido doadigila awäla, ödä

afädëie agesua Godema adolo sege dialealedula helësëlahilä, nili ödägi ami afiai. Ami awäla udiafali odoa gegedola sefolalebe amolibalä fifigilahilä adosa sefolalo.

¹⁴ Daiadaila udia afädë ëi Ilidia sulo. Ado säi amo ea nabaha sulo. Udia ameada fagulo hogale uii gadoi amo bidi neaha aligilo. Ea Godeie ëi gauia adala Godema adosa filo. Foloea ado mala säla iaha nebegi, Ilidiaea mala amo hedabola nabala gaula mogomäia Dafidilo Geloia ie iso asigi doga negelasi.

¹⁵ Amala hamosebegi, Ilidiage ie mosöa ami aligilo amolige ödägi gei. Ödägi gesebegi Ilidiaea nilima sähalea, Dafidilo Geloima na dofä asigi afädë negei gabula helësësa galëda, na mosöa namolö mofiamalola säi. Ea ähadulamu eegesebegi nili ea mosöa afiai.

Folole Sailasale Filibai galabaia negei

¹⁶ Nili Godema adolo segea ami awäha nebegi, dolisä afädë galabaia hamoi gadoi hamolasilo sulo amoma, mugabe fedalahilä meualasilo sulo amo, nilia gausiala digai. Dolisä amea meuasebe amoie, udia dolö nefolalo amolia ie beaha aligilo nefolalo amoligali muni ede ilo nelo.

¹⁷ Folola nihiligila awäha nebegi, dolisä amea bögëla maalahilä üala sähalea, Dolö golida Gode Dofä Ilibia Edefade neebe amoie hamoi hamolasilo neamelë. Dili damula aulo neala gaumäia, ilia säla ilo neala säi.

¹⁸ Dolisä amea segeyo yafiegi ado amala sähamu aligisebegi, Foloea habobalahilä besuia imogola mugabe fedai amoma sähalea, Yesu Gelesoie ëigila

sähago. Dolisä go digila, segea mosöla säi. Amala säi amole, mugabe amo doadigila asi.

¹⁹ Amala hamosebegi, dolisä amoie beaha aligilo amolia hobeala muni bu elö made nimolö gabula helësëlahilä, ilia Folole Sailasale gaulahilä, magaiä gaamugi sigi aligilo nefolalebea ami, ele gaula dusugaia asi.

²⁰ Iliä Olomo gamane gudi mogelo nefolalo amoli neebea ami sigi awälahilä sähalea, Yu dolö äudä gowelea nilile gaamugi wi maalahlilä, udia dolö neala nafadelasisebemelë.

²¹ Nilia hamomolö madela säla negei dibe amoda, elea hamomalola säla olelesa neamelë. Mala olelesebe amoda, Olomo dolö nefolalebe niliada amo nabala hamomolöi mademelëla säi.

²² Amala säi amo nabalahlilä, udia dolö gege-doi amoliage ele nifulö hamosebegi, gudi mogelo amolia elele fagulo giila digilahilä, ele buudi damuia nufualai.

²³ Iliä gelola nufudala ialalelahilä, Folole Sailasale dusugaia awäla, galabaia mosöa ifosilahilä, galabaia beaha aligilo amoma gelola sähalea, Ele hedabola idihë namialola säla i.

²⁴ Amala säla iäsebegi, galabaia sigi aligilo amea ele galabaia mosö hogoli mogogi amogi gaula awäla ifosilahilä, elele emo i gäia igadula negesi.

²⁵ Gasi mogogi Folole Sailasalea Godema adola digi, ie ëi gauia adala gë udäla digisebe amo, odoa galabaia mosöa sefolalo amolia nabi.

²⁶ Amala säha sebegi, fogoli edefademalä fodolo maalahlilä, galabaia mosö igau fogosa maadei. Amala hamoi amole, mosö amoie idi galo dogä negesa maadelahlilä, igi ëfëa ili sulubadela nafodoi

amoge, holola fisigäla digaha maadei.

²⁷ Amala hamoi amogi, galabaia beaha aligilo amo adi elaboi amo nowelahilä beahamelebe, idi galo sulubadela dogä negesa maadei dibe amo bealahilä, galabaia negei amoli fisäla awäha maadei gabula heläsäi. Amala heläsälähilä, ea hile nudulo helebe besela neala, hi e nufudala baagodelä hamosebegi,

²⁸ Foloea ado gelolafalä sähalea, A, di dihimu nufuabio. Nilida fisäla made asimelä. Sulubadela sefolaleawela säi.

²⁹ Amala säi amo nabalahilä, galabaia beaha aligilo amea gele gaula mofiamola sälahilä, Folole Sailasale seba baluluia awäla, e emo gigisäla elele emo mia gumusula dia digai.

³⁰ Amala hamolahilä, ea ele segea sigi fedalahilä elema sähalea, Dafidilo äudä ali-e, Godea ne damula mosäia na abilia hamomolödula nabi.

³¹ Amala nabasebegi, elea säla obägäsäla, Dafidilo Geloï Yesuma asigi afädä negeseda, dihädige, die mosöa ami aligilo amolige, damula moholömeläla säla i.

³² Amala sälahilä, elea emage, ie mosöa aligilo amolimage, Dafidilo Geloïie ado mala säla iaha nelö.

³³ Amo gala, gasi mogogi galabaia beaha aligilo amea ele sigi awälähilä, elele domalogi buudi damuia nufi amo nigime hëläsi. Amala hamosebegi, eege ea mosöa aligilo amolige ödägi gelasi.

³⁴ Ödägi gelasisebegi, ea ele ea mosöa sigi awälähilä, ele molö muäia i. Eage, ea mosöa aligilo amoliage, ilia Godema asigi afädä negei amogi edefade obeägisa nelö.

³⁵ Yose Olomo gamane gudi mogelo amolia dadi gaui nefolalo amolima ado säsisalea sähalea, Dolö äüdä amole fisigämäia säla ïmalola säsi.

³⁶ Amala säsi amo nabalahlä, galabaia beaha aligilo amea Foloma säla ïahalea, Na ali fisigämalola gudi mogelo amolia säsi gabumelë. Iliä amala säsi gabugi ali doadigila awähalea dalulo go gaula geleä mosalola säi.

³⁷ Amala säsebegi, gaso, Foloea dadi gaui mofiai amolima sähalea, Alïda Olomo dolö amogi neebe amo ilia gudila made, udia dolö si mogogi bu-udi damuia ali nufi. Nufudalahilä galabaia mosöa gaula dusugaia awäla ifosisio. Amaimo, iliada walio ali geleä musügä fisigäla mosalasi-ole. Ai, amala mademelë. Hili ili maalahilä ali fisigämäiamelëla säi.

³⁸ Foloea säi amo gadola dadi gaui amolia gudi mogelo amolima säla ïasebegi, ele Olomo dolö amogi gabiola säi amo nabalahlä ili bedäi.

³⁹ Amalahilä ilia ele neebee awäla elema aeala sähalea, Asiala hamoimelëla sälahilä, amila sigi segea doadigila awäla gaamu we dïgila mosäiamelëla geleä säi.

⁴⁰ Amala säsebegi, ele galabaia mosö dïgila awäla Ilidiaea mosöa asi. Mosöa amida edoolali sefo-lalebe amoli bealahilä, elea ili neala gelolasilahilä asi.

17

Folöle Sailasalea Desalonaiga nea hamosa nelö

¹ Ili asi amo awäla Äfibolisige Aboloniage besela galala dïgila awäla giso Desalonaiga besela galai.

Gaamugi amida Yu udia dolöie gedolo mosö afädë nelo.

² Dafidi Folo e sege odoagi nea gedolo mosöa aulo amo gadola e awäla gedolo mosöa ami digai. Gedolo mosöa ami Foloea segeyo Sabada gafe ohodoagi gegedola mofiai amolibalä ado bebagi säla dödëla negei amo ilima säla äaha nelo.

³ Amala säla äaha nea ea ilima Godeie ado mi ulufadigila awala säla äaha nelo. Ea ilima sähalea, Afädë Memeleia së naala baagola nowemolöla bea sälo amolia dofä amala säla dödëla negei dialea. Yesuda na walio dilima säla äahago. Amoda Afädë Memelei amomelëla Foloea säi.

⁴ Amala säla äasebegi, odoa ami nefolalo amolia ea dofä säsebelä helësëlahilä Folole Sailasalebalä dii. Giligi udia dolö Godeie ëi gauia adalo yafieage udia dafidila fii odoaeage amai.

⁵ Amai gaso, Yu dolö nefolalo amolia naabo gëlahilä, dolö nafade hamolo memalä magaia gaamugi nawesa aligilo nefolalo odoa amoli hobe nii. Hobe nealahilä udia dolö yafie gegedolasila, ado gelolafalä säi amea ili sulubadelaea gaamugi ami nududulä hamoi. Amala hamola ilia Folole Sailasale udia dolö neebea sigi moholöie ele hogosalea dolö afädë ëi Yeisonoie mosöa ami fudulasia awäla hogola digai.

⁶ Awäla hogoi amo ele made beasebegi, ilia Yeisonoge edoo odoa amolali gaula dusugaia awäla galisolö dolö amoli neebea awälahilä gelolafalä sähalea, Dolö sege sulubadelagi nafade yafie daidola hamosa maadelo amolia hä nilile segea besela galai gabumelë.

⁷ Besela galasebegi Yeisonoea ie mosöa fimäia fu

ï gabio. Ili sulubadelaea beaha aligilo gini elö Yesu neebe amo sähaleada, beaha aligilo Gini Sisa neebe amea hamolo mala säla negei dibe amoda damusa neamelëla säi.

⁸Udia dolö sulubadela nefolalo amolige galisolö dolö nefolalo amolige ilia ado säi amo nabalahlä, fudugila bedäi.

⁹Fudugila bedäsebegi galisolö dolö amolia Yeisonoeage dolö odoa ebalä gaui amoliage ili fisigämolöie muni ïmalasebegi, ïmalasebe amo gadola ïasebegi ili fisigäi.

Folole Sailasalea Belia nea hamoi

¹⁰Segeyo amoïe gasigi edoolalia Folole Sailasale Belia moholö mosalola säi. Amala säsebegi, ele awäla Belia besela galalahilä, Yu udia dolöie gedolo mosöa ami asi.

¹¹Udia dolö Belia ami sefolalo amolile asigi fisigäi ameada Desalonaiga udia dolö amoli baagila asi. Ili Godeïe ado mala nabulö edefademalä obeägila nabahamu nelo. Nabalahlä, ilia Foloea ado mala säla ï amo dofä walebelela bimolöie segeyo sulubadelagi bebagi ado dädëla negei amo nidela fädäla beaha aligilo.

¹²Amala hamolahilä ili yafiea asigi afädë negei. Giligi udia dafidila fii sefolalo amoliage, amase, Giligi dolö yafieage asigi afädë negei.

¹³Amala hamosebegi, Foloea Belia amige Godeïe ado mala säla ïaha neala säi amo nabalahlä, Yu dolö Desalonaiga nefolalo amoli Belia ami mafulahilä, udia dolö amoli fudugila bedämäia ili neala fologolasi.

14 Amala hamosebegi, edoolalia Folo e ödä duhulu dibeamadi amodi mosäia fodolofalī fisiga gai. Sailasale Dimodile made awäla Belia ami nelo.

15 Folo ifola afiai amolia e Adenesi gaamugi ami ifosila obögösebegi, Foloea ilima ado säsisalea, Sailasale Dimodile ne neebee fodolofalī misiäia säla ïmalola säsisebegi ili obögëi.

Folole Sailasalea Adenesi nea hamoi

16 Folo e ele misiäia Adenesi ami beaha nea beahamelebe, gaamugi ami nelebo yafie wäfalī godegali göa nelegela sämolöie naaboea hamoi difolalebe amo bealahilä, ïe asigigi edefademalä yösa nelo.

17 Amogi yöla ea gedolo mosöa ami awälahilä, Yu udia dolö nefolalo amolibaläge odoa Godeïe ïi gauia adalo nefolalo amolibaläge didiäha nelo. Magaia gaamu dibeaa amige segeyo sulubadelagi udia dolö gausiasebe amolibalä ea didiäha nelo.

18 Ebigulia sosogo mala olelelo dolö odoaeage Sidoigi sosogo mala olelelo dolö odoaeage Folobalä säla obögë obögësa nelo. Ili odoaea sähaleada, E dawadigi gadoi hamola säha neebe goda edo säsebelä säi. Amase, ili odoaea sähaleada, Sege näiadodi amolile godeïe mala säla ïahaledula säi. Iliä amala säi amoïe mida gowe. Foloea Yesuïe malage baagoi amoli nowemolö malage säla ï amogi amai.

19 Amala sälahilä ilia Folo e sigi awäla Aliobagusa Galisolö dolö amoli gegedola adolo segea ami awälahilä ilia ema sähalea, Dia mala gähe säla olelelo amo nilia nabolö hamesamelë.

20 Ado odoa säi amo hïdo elöi gabugi, amoïe mi helësedelälä säi.

²¹ (Adenesi fii amoliage, amase, sege näiadodi fii Adenesi ami maala nefolalo amoliage nelebo odoada hamolo made, segeyo sulubadelagi iliada mala gähe elöi elö elöla sämolöge nabalöge amomu hamosamu aligilo.)

²² Amasebegi Foloea Aliobagusa Galisolö dolö amoli mogogi nowela nea sähalea, Adenesi fii dilie, dilia nelebo afädë hamosebego na beahaleada, dilia göa nelegela hamolo mala amo gelola hamei gabula helësësamelë.

²³ Na nawesalea beahamelebe, dilile göa nelegela sälo mosö yafie meli. Beahaleamelebe göa nelegela nufudala ilo auli afädë aulula negei dibeami gomälä dödëla negei dibeo. Gode nilia dawa madegalila dödëla negei dibeo. Dilia Gode dawa made nea e helësëlo. Amo hile ado malafali amo na walio dilima säla iahagomelë.

²⁴ Godeada sege dibe sulubadelage nelebo sulubadela amogi dibe neebe sebe amoge hamosa maadei. Gode eda mudaiaiege nagadaiaiege Dafidilo Gelo nea. Gode amoda gobela ilo mosö naaboea hamoi amoligi aligilo made nea.

²⁵ Eda nelebo afädë ufola adida made neebe amo dolöfäea e ugila negela nelebo afädë imolöi mademelë. Mida gowe. Ea namolöge hamege nelebo sulubadelage udia dolö sulubadelagali imolöda hi e nea.

²⁶ Eada mi gäwila dolö afädë hamoi amoma aligila udia dolö fii sulubadela hahamola sege sulubadelagi awäha namialai. Aso, amala made hamola nebegi, dafidifali ea daiaha maadelahilä, udia dolö ili amo gala gowegi namiäiala helësëlahilä, ilile sege nofela daiala

negei.

²⁷ Ea ili hamoi amoëe mida gowe. Ili e hogomäiage nagubaia nawela e beagolemäiage ea ili hamoi. Gode eda nili hido hídola neebee wagadi made made nea.

²⁸ Mi ema aligilahilä, ie geloigi nili segegi fila digi fologola digisa sebewemelë. Amo gadola diligi ado dëdëlo dolö odoa nefolalo amolia sähalea, Nilige ie malölali neamelëla sälo.

²⁹ Hä nilida Godeie malö neebe amea, nilia e goloeage silibaeage igiage, nelebo afädë dolöea ie asigia naaboea hamola negei difolalebe amoma Godeda amo gadoi neala helësëmolöi mademelë.

³⁰ Godeada dafidi udia dolöea e dawa made nea hamoi amoda ea helësëlo made nelo. Amalo gasoda, walio ea udia dolö sege föi sulubadelagi neebe amo sulubadelaea asigi besumalola gelola säha nea.

³¹ Ea dolö afädë memelei amoëe aulodaiala udia dolö sege sulubadelagi nefolalebe amolibalä mogolafali memelela mogemolöie segeyo afädë daiiai amo dialea. Ea dolö memelei amo baagola nowela ifosi amea udia dolö nefolalebe sulubadelabalä amala hamomolömelëla dofä gelola säla negei amo oleimelëla Foloea säi.

³² Baagoi amoli nowemolöla säi amo nabal-ahilä, dolö odoa nefolalo amolia ölahilä e gadia-boi. Amase, odoaea sähalea, Ado walio säla i amo hobeala bu elö nabalö helësësamelëla säla i.

³³ Amala säsebegi, Foloea ili amilahilä digila asi.

³⁴ Amala awäsebegi dolö odoa nefolalo amolia ebalä dila asigi afädë negei. Asigi afädë negei amoligi dolö afädëie ëida Daionisiasa, eda Aliobagusa Galisolö dolö nelo. Eage, amase, udia afädë

ëi Damalisi eage, amase, odoaeage elebalä asigi afädë negei.

18

Foloea Golïdi nea hamoi

¹ Amala hamosebegi, Folo e Adenesi dīgila Golïdi asi.

² Golïdi ami Yu dolö afädë ëi Aguila gausiai. Eda Bödasa fii dolö. Beaha aligilo Gini Golodiasaea Yu fii Olomo nefolalebe amoli sulubadelama näiadodi afiaha maademalola säsebegi, Aguila ie udia Bilisilale Idali sege dīgila hädamade misi nelo. Folo e ele sebea asi.

³ Foloeage Aguila Bilisilaleage hamoi afädë hamolo. Amalebe e elea mosöa gedola nea eage hamoi hamosa nelo. Ili bidi nimolöie ilile hamoida balai mosö nedëmesa aligilo.

⁴ Amo hamosa neada Foloea segeyo Sabada gafe sulubadelagi gedolo mosöa ami awälahilä, gegedoi amolibalä didiäha nelo. Yu udia dolö odoaeage Giligi udia dolö odoaeage ea dofä säsebela helësëi.

⁵ Sailasale Dimodile Masedoniala digasebegi, Foloea segeyo sulubadelagi Godeie ado mala säla iahamu nelo. Ea Yu udia dolö nefolalo amolima Afädë Memelei amoda Yesu neamelëla gelola säla iaha nelo.

⁶ Amala säla iaha nebegi gaso, ilia made nabalahilä e baagido säla digi gagadela digisa nelo. Amala hamosebegi, Foloea ie fagulo fëfëla digilahilä, ea ilima sähalea, Dili nafadegi awäседа, dihili asiala hamoi ameamelë. Asialada nema mademelë. Walio neebe wegida ne awäla udia dolö fii odoa nefolalebea moholömelëla säi.

⁷ Amala sälahilä, amila ili dīgila Folo e dolö afädë ëi Didiasa Yasadusi amea mosöa asi. Ìe mosöda gedolo mosö gägägëlafali nelo. Dolö ameadä Godeie ëi gauia adalo nelo.

⁸ Gedolo mosö beaha aligilo ëi Galisibusaeage ea mosöa aligilo amoliage ilia Dafidilo Geloima asigi afädë negela nelo. Amase, Golidi udia dolö yafie nefolalo amoliage nabalahlä asigi afädë negesebegi ili ödägi gei.

⁹ Gasi afädëgi Foloea sosoäla awäla beahaleamelebe, Dafidilo Geloia ema sähalea, Bedäla nafi yömabio. Mala säla iahamu namialo.

¹⁰ Mida, ne dibalä neamelë. Gaamugi guida, udia dolö yafie nie neebe amea afädëa di nufudala sëlasimolö mademelëla säla i.

¹¹ Amala säla iasebegi, Foloea udia dolö nefolalo amolima Godeie ado mala säla iaha nea gäheo i afädëie, elö amoie aube gafeia ami nelo.

¹² Agaia sege Galioea beaha aligilo nelo amo gaalu, Yu fii nefolalo amoli ado afädë negela ilia Folobalä ado neala e gaulahlä gudilo mosöa sigi asi.

¹³ Sigi awälahilä ilia sähalea, Udia dolö nefolalebe amolia Godeie ëi gauia adamäia dolö gowea mala säla negei dibe amo gadola made, mala elöi säla, säla olelesa neamelëla säi.

¹⁴ Amala säsebegi, Foloea ado sädelä hamosa nebegi, Galioea Yu fii amolima sähalea, Yu dolöla dili-e, mala dabiala nafade hamoiie sämolö mofiai galebeda, amoda na habobala made hedabola nabalabio.

¹⁵ Gasoda, adoge ëige dihilile mala säla negeige amolilemu galëda, amoda dihili hamogimalo.

Goïeda na made mogemolömelëla säi.

¹⁶ Amala sälahilä ea ili gudilo mosöa amilahilä nesila digi.

¹⁷ Amala hamosebegi, ili sulubadelaea gedolo mosö beaha aligilo ie ëi Sosodenisi nelo amo gaulahilä, gudilo mosö baagido segeamadi ami nea, nufudaha nelo. Amala nufudasebegi Galioeada hilile hamoi hamosebegola helësëlahilä ea adola made nelo.

Folo Silia segeie Ädiago obëgëi

¹⁸ Amala hamosebegi, Folo e Golidi ami segeyo odoa nelolahilä ea edoolalima dili samialola säla, ödä sibigi fila Silia segea moholö asi. Bilisilale Aguilalege hiligila asi. Awäla Sëgilia gaamua ami nea Foloea Godema afädë hamomolömelëla säla negei amea ie busa hili damusa maadei.

¹⁹ Amalahilä awäla Ebesa besela galai. Besela galalahilä Foloea ele ami digilahilä, hido awäla gedolo mosö neebee ami besela galai. Besela galalahilä Yu dolö nefolalo amoliberalä ado didiäha dilo.

²⁰ Amala didiäha dibegi ilia ema sähalea, Dida nilibalä holöbö sedade namiäiamelëla säi. Ili Amala säsebegi, Foloea ilima üla made säi.

²¹ E moholö nea ea ilima sähalea, Ne dili nee-bea obëgëmäiala Godea hameseda, amoda ne obëgëmolömelëla säi. Amala sälahilä ea ili hawiola sälahilä e Ebesa digila ödä sibigi fila asi.

²² Awäla ödä agesua besela galalahilä Sisalia gaamugi besela galai. Besela galalahilä awäla e fedalahilä udia dolö Godea wela ifosi nefolalo amolima dili go gabiola säla olelahilä awäla Ädiago digai.

23 Folo e Ädiago ami holöbö ede nelolahilä, e awäla Galesiamadige Filigiamadige holöbö aligila baagila digila awähalea, Yesu bégëla aulo nefolalo amoli sulubadela neala gelolasisila aliligi awäha nelo.

Abolosia Ebesa nea hamosa nelo

24 Amo gaalu, Yu dolö afädë ëi Abolosi eda Alegisädalia fii nelo amo Ebesa misi. Eada ado hedabola dawadigila adolo nea, bebagi ado dödëla negei dibe amo hedabola dawadigi nelo.

25 Dafidi Dafidilo Geloïie idigi aulo mala ema olelei. Ìe iso asigigi sämo sämosa nebegi, ea Yesuïe mala amo udia dolöma hedabola olelesa nelo. Abolosi eada Yonea ödägi gelo mala olelei amomu dawadigi nelo.

26 Abolosia gedolo mosöa ami nea gelola säla ïaha nelo. Amala säla ïasebe amo nabalahlilä, Bilisilale Aguilalea Abolosi sigi aliga galahlilä, elea Abolosi ea Godeïe idigi aulo mala hedabola helësëmäia mogolafali säla ïaha nelo.

27 Hobeä Abolosi e Agaia segeä moholö helësësebegi, edoolalia e gelolasila hä mosalola sälahilä, Yesu bégëla aulo amolima beba dödëla ïasisalea Abolosima obeägïlahilä gauia idogomaloï. Abolosi e ami besela galasebegi, udia dolö Godeïe ugila negeloea ili ugila negesebegi asigi afädë negei amoli ea hedabola ugila negesa nelo.

28 Mida, udia dolö yafie gegedoi nebegi, ea bebagi ado dödëla negei dibe amogila sähalea, Afädë Memelei amoda Yesu e neamelëla ulufadigila säi. Ea ado amo gelolafali säsebegi, Yu udia dolö hewalahilä ilia adola made sau sagai.

19

Foloea Ebesa nea mala säla iaha nelo

¹ Abolosi e Golidi nebegi Folo e nawesalea segebi gau fedala digala digila awäla Ebesa besela galai. Besela galala Ebesa ami bögëla aulo odoa gausiai.

² Gausialahilä ea ilima nabahalea, Dilia Yesuma asigi afädë negeselo amo gala Eleloi Gesami niilela nabi. Amala nabasebegi, ilia säla obögësalea, Eleloi Gesami neala säi goda nilia nabi mademelëla säi.

³ Amala säsebegi, Foloea säla obögësalea, Amai galëda, edoea ödägi geila nabi. Amala nabasebegi, ilia säla obögësalea, Yonea ödägi gelo amo gadola geimelëla säi.

⁴ Amala säsebegi, Foloea säla obögësalea, Yonea ilia nafade hamoi amoie asigi besula ödägi gelo. Ea udia dolöma sähalea, Ne dafidi misi neamelë. Hobeala afädë moholö amoma dilia asigi afädë negemolö dialeala säi. Hobeala moholöla säi amoda Yesu hi e helësëla säila Foloea säi.

⁵ Foloea amala säi amo nabalahlä, ili Dafidilo Geloï Yesuie eigi ödägi gei.

⁶ Amasebegi Foloea ilima naabo negesisebegi Eleloi Gesami ilima digala ilia ado elö säla bea säha nelo.

⁷ Dolö amolida giwilasi gadoi nelo.

⁸ Amala hamosebegi, Folo e gedolo mosöa ami digai. Aube ohodoagi amala digahamu nea ea ado mala gelola säla iahalea, udia dolö nefolalo amolibalä didiähalea, Godea Beaha Maadela Sigi Neebe amoie mala säla iaha nelo amoda dofä säi gabula helësëmäia säla iahamu nelo.

⁹ Amala säla iahamu nebegi dolö odoa nefolalo amolia ilile asigi geloi neada asigi afädë made

negei. Udia dolö nefolalo amolia nabuäia ilia Idigi aulo mala amo gagadesa nelo. Iliä amala hamosebegi, Foloea ili amilahilä Yesu bögëla aulo amoli sigi asi. Amala hamolahilä segeyo sulubadelagi ado mala säla didiälo mosö afädë Dilanasaie nee-bea ami awälahilä, Foloea Yesu mala säla didiäha nelo.

¹⁰ Ea gäheo i äudägi amala hamosamu nelo. Amala hamoi amea Esia segea nefolalebe ili sulubadela, Yu udia dolöeage, Giligi udia dolöeage, Dafidilo Geloie ado mala nabi.

Segebaie efegelalia hamoi

¹¹ Godea Foloie naaboea geloi melëlo made hïdo elöi hamosa nelo.

¹² İe filimo dogelo faguloge bululo faguloge hîle domalogi diigilo amo gaula oloi difolalebea ami awäsebegi, oloi damula digi, mugabe doadigila awäla digisa nelo.

¹³ Amala hamosebegi, Yu dolö nawesalea mugabe fedai nesila digisa aligilo nefolalo amoligi odoaea oodo beala Dafidilo Gelo Yesuie ëi säla mugabe fedai nefolalo amolima sähalea, Foloea İe mala säla İlo Yesu amoie ëigi dili nesila digisagola sälo.

¹⁴ Yu udia dolöie gobela İlo busa afädëie İe Segebaie efegelali gifalädalïa amolia amala hamosebegi,

¹⁵ mugabe fedai amea ilima säla obögësalea, Na Yesu dawa, Fologe helësësa. Gasoda, dilida nowëla nabi.

¹⁶ Amala nabalahlilä dolö amoma mugabe fedai nelo amea ilima nila sadia alogola İe geloia ili

baagila awäla, ili nufudala ialalesebegi ili mosöa amila sësëla dudugümu fisäla asi.

17 Amala hamoimelëla säi amo nabalahilä, Ebesa nefolalo sulubadela Yu udia dolöge Giligi udia dolöge edefademalä bedälahilä, Dafidilo Geloï Yesuïe ëi gauia adaha nelo.

18 Amase, asigi afädë negei yafie nefolalo amoli maalahilä, ulufadigila, nilia nafade amo hamoimelëla säla sisiaha maadei.

19 Golë hamolo yafie nefolalo amolia ilile golëie beba difolalo amo gaula mafulahilä, udia dolö nefolalo amoli sulubadelaëa bimäia gobesa maadei. Beba gobei amoli muni dafidi nii amoda näba gegedolada siliba giwi dausini nabülasi bia gadoia nii.

20 Amo gadola Dafidilo Geloïie ado mala daidolahilä, edefademalä gelola bäui.

Ebesa ami nebegi, habobahalea üalala säi

21 Amala hamosebegi, Folo ema Gesamia helësëlasisebegi daiala negesalea, dafidi Masedoniage Agaiage awälahilä, hobeala Yalusaleme moholöi moholöla helësëi. Amala helësëlahilä sähalea, Ami awäha maadelahiläda, Olomoge söfë moholö dialeala säi.

22 Amala sälahilä ea ie ugila negelo Dimodile Elasadale Masedonia mosaloi. Ele amala mosalolahilä, e holöbö Esia segea beaha nelo.

23 Amo gala, Idigi aulo mala olelei amogi yömolö holöfalï made, edefade besela galai.

24 Dolö afädë nelo amoïe ëi Demediliasa, ea nelebo elö elöla silibaea hamolo nelo. Ademisiïe odala ilo mosö gadoi holöfalï afädë afädëla

Demediliasaea silibaea hamolo nelo.* Ea amo hamolo ameada hamoi hamolasilo nefolalo amolia muni edefade neaha aligilo.

²⁵ Ea ìe hamoi hamolasilo amolige, dolö odoaea hamoi amo gadoi hamolo nefolalo amolige neala gegeдоласилahilä sähalea, Dolöla dili-e, nilia hamoi amo hamolo amea muni edefade nelo amoda dilia dawa.

²⁶ Ebesa wimu made, Esiamadi sege holöbö sulubadelamadida, dolö Folo amea udia dolö yafie dusugala nidilahilä, ilile asigi neala gagaolasila sähalea, Nelebo dolö naaboea hamola nowei amolida, gode madela sälo nea. Amo dilia beadigi nabadigi amomelë.

²⁷ Ea amala hamosa neebe ameada, udia dolö amolia nabalahlä, nilia bidi nimolöie hamoi hamolo amoda nafadela säloea. Amomu made, nilile gode edefade udia Ademisiie odala ilo mosöge udia dolöie siigi memalä gabula säloea. Amase, Esiamadi udia dolö nefolalebe amoliage, udia dolö sege sulubadelagi nefolalebe amoliage dafidi ìe èi gauia adalo gaso, ìe èi edefade amo neala nagadaialoeala säi.

²⁸ Ado säi amo nabalahlä, ilia edefademalä mihaläla gelola üalalahilä sähalea, Ebesaie Ademisida edefademalä neala gelola sähamu nelo.

²⁹ Amaimo, gaamugi nefolalo amoli sulubadelaëa üalala dodogösa difolalo. Amala üalala dodogösa difolalea, Masedonia fii dolö äudä Gaiusale Alisadagusale Folobalä nawesa aligilo amole ilia gaalu gedolo gaamu edefade dibeä ami

* **19:24:** Ademisida gowe gadoi. Eda wäfalì gode udia gadoi. Udia dolöëa nelebo elö elöla göa nelegela, wäfalì gode amogali ilo.

fodolofali sigi gaula asi.

³⁰ Foloea udia dolö yafie gegedoi dibeami hi äudulä hamosebegi, Yesu bégëla aulo nefolalo amolia made mosalola säi.

³¹ Esia sege amoie gamane beaha aligilo odoa Folobalä damelë hamola aligilo nelö amolia Foloma ado säsisalea sähalea, Di gedolo gaamu dibeami dofä mosabiola säsi.

³² Iliä amala säsisebe amo gaalu, udia dolö gegedoi amolia gelola üalala dodogöla säha difolalo amea, ili asusugahalea odoaea ado elö säsebegida, odoaeada, oböla, ado elö säla aulo dabela digisa dilo. Ili yafieada, mi goweie gedoi gabula made helësëi nefolalo.

³³ Yu dolö nefolalo amolia Alegisäda e nowela fedala aligisia ami namiäia nabelela gaula fedala ifosisebe amo bealahilä, udia dolö odoaea helësësaleda, mi e gabula helësëi. Amala helësësebegi Alegisäda e nowela aligilahilä nea naabo usigilisalea, gegedoi amolima ne mademelëla sädelä hamoi.

³⁴ Amala hamoi gaso, ilia eda Yu dolö amogi gabula bealahilä, ado gelola gaalu sähalea, Ebesaie Ademisida, edefademalä neamelëla säha nebegimu, aoa äudä gadoi asi.*

³⁵ Gaamu amoie gusigusi nelö amea udia dolö sulubadela nefolalo amolima sau sagamolahlilä, ea ilima sähalea, Ebesa dolöla dili-e, Ademisi edefade neebe amoie odala ilo mosö neebe amoiege, amase, nelebo afädë mudaijala beselala digai dibe amoiege sigi aligiloda Ebesa gaamumu dibe amoda dolö afädëa dawa mateda nowë.

* **19:34:** Aoa äudäda molö giai deala molöi gadoi.

³⁶ Hä, na säi amo gadola afädëa wäfalï säila sämolö uli ameada, dilia nelebo afädë asigi made gäwila hamolo amo gadola, made hamola, sau sagamo.

³⁷ Dilia dolö äudä sigi misi goweleada odala ilo mosöa negei amogi afädë made fa nii, dilile gode udia amoge made gagadeimelë.

³⁸ Amaimo, Demediliasaeage ebalä hamoi hamolo neebe amoliage, ilia afädëbalä gudimolö helësësa nea galëda, gamane gudilo dolö neebe amea amoïe gudimolö segeyo odoa daijala negei dialea. Iliä amogi gudimolöi galea.

³⁹ Amomu made ado odoage sämolö helësësa nea galëda, amoda gamane dolö amolia ado giwi sämolö gegedomalola säsegi sämolöi galea.

⁴⁰ Nilia walio hamoi amea Olomo gamane neebe ameada, nilima dilia üalala dodogöla gëgëimelëla sälahilä, nilibalä gudimolöi gabumelë. Iliä amala hamoseda, nilia walio gegedola üalala säi amoïe mi goweïe säimelëla sämolöi mademelëla gusigusi amea säla wagai.

⁴¹ Amala säla wagalahilä, ea gegedoi nefolalebe amolima afiaha maademalai.

20

Folo e Masedoniage Giligige asi

¹ Ado gelola üalala dodogöla säha dilo amo sau sagaha maadeibua, Foloea Yesu bëgëla aulo amoli mofiamalolahilä, asigi gelolo mala ilima säla ialahilä, ne awähamelë, dili hawio, namialola sälahilä, e Masedonia moholö asi.

² Sege amoligi nawesa nea, Foloea ilima asigi gelolo ado yafie säla ïia awälahilä, hobeala Giligi segea besela galai.

³ E ami aube ohodoa nelolahilä, hobeala e du neala Silia moholö hamosebegi, Yu fii nefolalo amolia e nufulöla didiäha dialeai amea, e Masedonia obëgemolöla helësëi.

⁴ Dolö ebalä asi amolida gowe ili. Gaamu Belialada Bilusaie malö Sobadage, Desalonaigala Alisadagusa Següdasalage, Debila Gaiusage, amase, Dimodige, Esia segeala Digigusi Dolofimasalage, amoli ebalä asi.

⁵ Dolö amolida ilidale dafidi awäla nili misiäia Doloasa ami beaha nelo.

⁶ Segeyo Edefadegi beledi edelo yidila made gobela molö amo baagilahilä, nili Filibai digila ödä sibigi fila afiai. Amala afiala ödä sibigi fila segeyo bia awälahilä, afiala ili neebee Doloasa besela galai. Besela galalahilä segeyo gifalädalä ami nelo.

Doloasa ami Foloea Yudigasa neala nowelasi

⁷ Segeyo gifalädalügi nili molö molö gedolahilä Foloea ilibalä didiäha nelo.* E aiyo amogi moholö gabula helësëlahilä, ea säla ïaha nebegimu gasi mogoi.

⁸ Mosö ilibia hogoli nili gedoi amogida gamali wala negei malei dilo.

⁹ Ami malisä afädë amoie ëi Yudigasa e mosö amoie wïdo holela dagaboidaia ami salea edefademalä süwiala waoi. Foloea sähamu nebegi, Yudigasa süwiala adi elaboi amo hogogolula fedai

* **20:7:** Dolö dawadigi odoa amolia helësësäleada, molö mai amoda Yesuie molö maila helësëi.

osodadaia amila bebedoi. Amala hamosebegi, neahamelebe hä, baagoi meli.

¹⁰ Folo e digalahilä malisä amodaia dia fedalahilä naaboea gauia welahilä sähalea, Hame gudusebemelë. Didigaomabula säi.

¹¹ Amala sälahilä Folo e bu fedala beledi daga-bodasila nalahilä, ado sedadela säha nebegimu segeyo sagai. Segeyo sagasebegi, e asi.

¹² Malö amo made baagoi sebegi, ilia e sigi awähalea ilile iso asigia edefade obeägi.

Folo e Doloasala Miledusa asi

¹³ Nili nilidale ödä sibigi filahilä Asoso moholö afiai. Asoso ami Folo gausialahilä, ödä sibigi fimolö helësëi. Folo e nagadabodo moholöie ea amala daiiai.

¹⁴ Afialahilä Asoso ami ea nili gausialahilä, eege ödä sibigi fedala filahilä nihiligtila Midilini afiai.

¹⁵ Amo aiyo amogi amilahilä, ödä sibigi fila awäla Giosi sida gagala awäla, aiyo amogi Samoso awäla besela galai. Amilahilä amo aiyo amogi Miledusa awäla besela galai.

¹⁶ Esia segeamadi segeyo yogobodimolö made-lahilä, Foloea Ebesa baagila moholöla helësëi. Yu udia dolöie molö nulo segeyo ëi Bëdigosi made besela galai amo gaalu, fodolofali Yalusaleme awäla besela galamolöi galëda, amoda moholöla helësëi.*

Foloea Geleso sosogo Ebesa nefolalo amolile dafidilo amolima hawiola säi

¹⁷ Miledusa ami nea, Foloea udia dolö Godea wela ifosi Ebesa nefolalo amolile asigi gäwi

* **20:16:** Baagila Asi Segeyo molö nalahilä segeyo nabülasi bia baagilahiläda, Bëdigosi Segeyo besela galalo.

dafidilo nefolalo amoli e neebee misiäia misialola säsi.*

¹⁸ Ili e neebee maala besela galasebegi, ea ilima sähalea, Esia segeamadi degabo mi gäwila maala neloa amila dilibalä nea hamosa nelo amoda dilia dawadigi.

¹⁹ Yu dolö nefolalo amolia ne nifulö daiaha nelo amea ne fedogola beasebegi, na nihī nagadaiala siaholö digaha nea, Dafidilo Geloīie hamoi hamolasisa nelomelē.

²⁰ Dili ugila negemolö amogi afädē musügä negela made, na dilima säla iadigi, udia dolö gegedoi dibeaa amige, dilile mosöa amige, säla olelela digi amoda, dilia dawadigi amomelē.

²¹ Amaimo, na Yu ilimage, amase, Giligi ilimage asigi besulahilä, Godemadi nea, nilile Dafidilo Geloī Yesuma asigi afädē negemalola gelola säla ī amomelē.

²² Amala hamosa nelo gaso, hä walio Gesamia ne mosöla säse amo gadola, ne Yalusaleme moholö neawe. Ami neēgi, nema edo hamomolödu, na dawa mademelē.

²³ Dawa made gaso, na afädē dawadigida gowemelē. Sege sulubadelagi ne neloadi amogi nebegi, Eleloi Gesamia nema säla iähalea, Galabaia negemolöge sē molöge bimolömelēla gelola säla iāhamu nelomelē.

²⁴ Amaimo, ne namolö amoda, nema memalä gadoi gabula helēsēsamelē. Godeie ugila negelasilo Ado Mala Hedabi säla imolöie hamoi Dafidilo Geloī Yesuea nema ī amo hamola wagamolö amoda, geloi gabula gelola helēsēsa neawe.

* **20:17:** Miledusala Ebesa moholöda mia made, gilomida nabülasi bia gadoi. Ayala Fogomayu gadola.

²⁵ Hä, nabuö. Ne dafidi dili nefolalebeadi Godea Beaha Maadela Sigi Neebe amoïe mala säla ïaha nelo gasoda, diligi afädëa hobeala nie mi bu elö made bimolöla helësësamelë.

²⁶ Amai gabugi, walio na dilima ulufadigila fädäla säla ïahago. Afädë nafadegi awäседа, asial-ada nema mademelë.

²⁷ Mida gowe. Godea hamomolö amo afädë musügä negela made, sulubadela na dilima säla ïaha maadei amea.

²⁸ Geleso sosogo sugua sibi gadoi nefolalebe amoli dilia sigi namiäia Eleloi Gesamia dili ifosi amo ilile asigige dihilile asigige hedabola beaha namialo. Udia dolö Godea wela ifosisi nefolalebe amoli ïe namiäia hile healea nii amoli dilia sugua sibi sigi aligilo amo gadola, ili sigi namialo.

²⁹ Ne asibua ilua ügülo geloi gadoi dili nefolalebea gui maalahilä, sugua sibi gadoi nefolalebe amoli bobasëla made, nufudala hësömolöla helësësamelë.

³⁰ Dihili diligi dolö odoaea nowelahilä, ado halowela säla, Yesu bëgëla aulo nefolalebe amoli dusugala ili bëgëla misiäia moholömelë.

³¹ Hä, idihë namialo. Na gäheo i ohodoagi esoage gasigige siahölö digaha nea, dili hïdo hïdolama säla olelesamu nelo amo helësëmalö.

³² Amai gabugi Godemage, ïe ugila negelo ado mala amomage dili gausisagomelë. Mala amea dili neala gelolasimolöige, Godeïe udia dolögali hedabi ïmolö dibe amo gadola dilima ïmolöige nea.

³³ Na afädëie munige faguloge gesami awäla made nelomelë.

³⁴ Nihile naaboea nihï hamoi hamola, nihïnege, nebalä aligilo amolige, nili molöge neleboge dofea

negei dilo amoda, dihili dawadigi amomelë.

³⁵ Na sulubadela hamosa nelo amo gadola hamoi edefade hamosebwea udia dolö geloi made nefolalebe amoli ugila negemolöi dibe amo oleimelë. Amase, Dafidilo Geloï Yesuea sähalea, Afädëa digali afädë iäседа, dia holöfalï obeägimölö. Gasoda, dia afädë elögali iäседа, dia edefademalä obeägimölömelëla säi amo helësëmolöi dibe amoge oleimelëla Foloea säla wagai.

³⁶ Ea ado amo säha maadelahilä, ili sulubadela-balä ea emo gumu sagala gumusula Godema adoi.

³⁷ Godema adola wagasebegi, ili sulubadelaea edefademalä diila Folo gaula mimi.

³⁸ Amala ilia edefademalä asigii. Asigii amoïe mi edefadeda gowe. Ea nïe mi bu elö made bimölömelëla säi amogi. Hä, amalahilä ilia e du dibeami ifola asi.

21

Folo ödä duugi awäla, Yalusaleme asi

¹ Nilia ilima, nili hä afiahamelë, dili hawiola sälahilä, ödä sibigi fila mogolafalï awäla Gosi besela galai. Amo aiyo amogi Olodesi besela galai. Amilahilä Badala besela galai.

² Badala amila ödä sibi elö Fonisia moholö dibe amo bealahilä, nili amogi fila afiai.

³ Afiahalea nilia Saibulusi södölo dibe amo bealahilä naabo fefeädimadi dibe amo amilahilä nili baagila awäla Siliamadi awähamu nelo. Awähamu nea Daia awäla besela galai, du amogi nelegei gauï amo ami negemolöie.

⁴ Daia ami besela galala bēgēla aulo nefolalo amoli beagolelahilä, nili ilibalä segeyo gifalädaläia ami nelö. Gesamia ilima aligilahilä helēsēlasisebegi, ilia Foloma Yalusaleme mosabiola säi.

⁵ Amala säsebegi gaso, nili moholö fu besela galasebegi, hä doadigila afiai. Afiassebegi ili sulubadela udia malöla gaamugi amila nilibalä duhulu agesua afiai. Afialahilä nili sulubadela duhulu bosea ami emo gumu sasagalahlilä Godema adoi.

⁶ Godema adolahilä, nili hä afiahamelē, ilima dili hawiola säi. Amase, iliage nilima amala hawiolahlilä hili mosöa obēgēsebegi nili duugi fimolöie afiai.

Sisalia ami bea sälo Agabasaea Foloma ado säla
ï

⁷ Ödä sibigi filahlilä Daia dīgīla awāhamu nea, Dolemesi besela galai. Besela galalahilä nedoo nefolalo amoli säla olela gausialahlilä ilibalä segeyo afädē adi.

⁸ Diala aiyo amogi awāla Sisalia besela galai. Besela galalahilä Ado Mala Hedabi säla ilo afädē nelö amoie ei Filibi amoie mosöa digalahilä ebalä nefolalo. Filibida dolö Gifalädaläia amoligi nelö.*

⁹ Ìe idiwilali biyidia sulo amoli dolö made fila awāla salea, Godeie bea sälo sulo.

¹⁰ Nili ami segeyo nahui nebegi Godeie bea sälo afädē amoie eida Agabasa eda Yudiala misi.

¹¹ E nili neebeebea ami maala, ea Foloie malibu gii amo nealahilä hile emole naabole neegilahilä,

* **21:8:** Filibida dolö gifalädaläia abosolo ugila negelo namiäia dafidi memelei amoligi nelö. Abosolo 6.1-6 bimalo.

ea sähalea, Eleloi Gesamia sähalea, Malibu goweie eedo amo Yalusaleme ami Yu dolö nefolalebe amolia gowe gadola gaula neegila dolö fii odoama imolömelëla säsebemelëla säi.

¹² Amala säi amo nabalahlä niliäge, amase, udia dolö ami nefolalo amoliage Foloma Yalusaleme fedamolö gameläla sähamu nea häuai.

¹³ Amala sähamu nefolalebegi ea säla obögësalea, Dilia düsamu dibegoea ne neala yölasisebe goda edoie. Ne Yalusaleme ami nea nie emo naabo neegimolö gomu made. Dafidilo Geloï Yesuie äigi baagomolö diëge amoda dofeala helësäselëla säi.

¹⁴ Amala säsebegi, ea helësëi neebe amo haila fisimolöi made beala nilia fisilahlä sähalea, Dafidilo Geloïa hamesebe amo gadola hamomäiamelëla säi.

Folo e Yalusaleme asi

¹⁵ Amala säla, segeyo amala nelolahilä, nelegei neala gaula Yalusaleme fedai.

¹⁶ Bëgëla aulo odoa Sisaliala nilibalä gegebola afiai. Afiai amoda Saibulusi fii afädë bëgëla aulo siiba nelo amoie ëida Nesono ie mosöa awäla nefolamolöie ilia nili sigi asi.

¹⁷ Nili Yalusaleme besela galasebegi ami nedoolali amolia obeägila gauia idai.

¹⁸ Amo aiyo amogi Folola nihiligila Yamese neebea afiai. Afiaha dibegi, asigi gäwi dafidilo nefolalo amoli sulubadelage ami gegedoi.

¹⁹ Foloea ilima dili go gabiola sälahilä, udia dolö fii odoa nefolalebea ami Godea emadi aligila hamoi amo ilima awala säla iaha maadei.

²⁰ Foloea awai amo ilia nabalahlä Godeie ëi gauia adai. Amalahilä ilia Foloma sähalea, Nedoo,

dia dawa, Yu udia dolöda dausini maleia asigi afädë negei. Udia dolö amoli sulubadelaeadada Ado säla negei amo gelola bögëla awäha neamelë.

²¹ Amala hamola nelo amolima dolö odoa nefolalo amolia sähalea, Foloea Yu udia dolö sege elö elöla fii odoa amoligi nefolalebe amoli sulubadelama ado gowe gadoi säla olelelo. Mosesea Ado säla negei dilo amo fisimola säla, dilile malöie gafodo damumabio, siiba mala hamolo amoda made hamomalola säla äaha neamelëla odoaea säla i gabio.

²² Odoaea di yawe misi neala säседа, ilia dofä nabolö gabumelë. Hä nilia abilia hamomolödu.

²³ Amaimo, niliada dia mala afädë bögëla hamomäiaie säla äaha. Nilibaläda Godema afädë hamomolömelëla säla negei dolö biyidia nea.

²⁴ Diada ili sigi awäla, ilia Godeie siigi nigime baai made neebe amo olelo mala hamomolö amo diage amala hamomalo, amase, ili busa gesemolöie ilile bidige dia negelasimalo.* Amala hamosedada, odoaea ado die säi amo nabelo amoliada, nilima wäfalä säla i gabula helësëlahilä, Ado säla negei dibe amo dia bögëla hamolo gabula helësëmolömelë.

²⁵ Udia dolö fii odoa asigi afädë negei neebe amolima, ado sämolö helësëi dilo amo nilia beba dödëla i. Nilia ilima sähalea, ili idihë nea, molö nulo dibe amogi wäfalä godegalä göa nelegela i muabio. Amase, heale hi e muabio. Hogoi elö elöla sebe amo nufudahalea muugia heale gälo sali amola muabio. Amase, udia dolö fa nimabiola säla äla säi.

²⁶ Amalahilä amo aiyo amogi Foloea dolö

* **21:24:** Abosolo 18.18 amoge bimalo.

biyidia amoli sigi nea, hiligila Godeie siigi nigime baai made neebe amo olelo mala hamoi. Amalahilä e Godeie mosöa awäla gobela iloma nigime baai made neebe amo oleloie segeyo amogi wagamolö gabugi, afädë afädëlaea amo galada odala imolö gabula säla i.

Yu dolö amolia Folo gaui

²⁷ Mala amoie segeyo gifalädalä dilo awäha maademolö ga made dibegi, Yu dolö odoa Esia segeala mofiai amolia Folo Godeie mosöa neebe amo meli. Bealahilä udia dolö nefolalo amoli sulubadelaea Foloma habobamäia neala habobalasilahilä Folo gaui.

²⁸ Gaulahilä ilia gelola uuala sähalea, Isilale dolöla dili-e, nili ugila negemolö mofiamo. Dolö gowea sege dibe sulubadelagi udia dolö nefolalebe sulubadelama säla olelesalea, Isilale udia dolöge, Ado säla negei dibe amoge, amase, sege gowege, amolida memalämelëla säla olelelommelë. Amomu made, ea Giligi dolö odoa nefolalebe amoligi Godeie mosöa sigi maalahilä mosö Godea hile nafolai nelo amoge neala nafadei gabiola säi.

²⁹ Amala säi amoda dafidi ilia Ebesa fii ëi Dolofimasa e Folobalä gaamugi neebe amo bealahilä, Foloea e Godeie mosöa sigi nogila digai gabula helësëlahilä amala säi.

Ami dolö amolia Folo e sigi asi

³⁰ Amala säsebegi, gaamugi nefolalo amoli sulubadela fudugilahilä, udia dolö baluluia mafula gegedola ilia Folo gaulahilä, Godeie mosöa amila dusugala gaula awähalea Godeie mosö idi galo sulubadela fodolofali gaha maadei.

³¹ Amala hamolahilä Folo baagomäia nufulö hamosebegi, Olomo ami dolö beaha aligilo busa amea Yalusaleme udia dolö sulubadelaea edefademalä fudugila nudusaleamelëla säi amo nabi.

³² Amo nabalahilä ea ami dolö beaha aligilo odoa nefolalo amolige ami dolö odoa nefolalo amolige sigi awälahilä, udia dolö gegedoi nebea ami ili fodolofali baluluia afiai. Beaha aligilo busa amoge ami dolö odoa amolige maase bealahilä, ilia Folo made nufudala fisi.

³³ Ami dolö beaha aligilo busa amea Folo nebea awälahilä e gaula nea, ea ami dolö amolima sähalea, Igi ëfë äudäea e nafodomola säi. Amala sälahilä ea nabahalea, Dolö goweda nowë, ea edo hamosiola nabi.

³⁴ Amala nabasebegi, udia dolö gegedoi nefolalo amolia säla obëgësalea, ado elö elöla gelola säla didigai. Amala gelola säla didigai amea ami dolö beaha aligilo busa amea ado mi fädäla made beasebegi, ami dolö amolima dolö goweda ami mosöa sigi mosalola säi.

³⁵ Amala sigi awäla e mosö aulo didaia fedadelä hamolebe udia dolö gegedoi amolia edefade habobasebegi, ami dolö amolia Folo e naaboea sogobala gaula fedai.

³⁶ Mida, udia dolö amolia, nufuö, baagomäia nufuöla gelola säla didigala ili bëgëla maasebegi amai.

Folo e asigi afädë negei amoë mi Yu ilima fädäla säla i

³⁷ Ami dolö amolia Folo e sigi gaula ilia mosöa digamolö hamosebegi, Foloea ami dolö beaha aligilo busa amoma sähalea, Na dima ado afädë

nabedulela säi. Amala sälebe busa amea sähalea, Dida Giligi ado adolole.

³⁸ Isibi dolö afädë dafidi gamanebalä nudulahilä ie nudulo dolö dausini biyidia sege nafade udia dolö aligisia made ami sigi awäha nelo amoda di madelela nabi.

³⁹ Amala nabasebegi, Foloea sähalea, Neda Yu dolö neawe. Silisia segeie gaamu Dasasa dibe amoda nie segemelë. Nie gaamuda ilibia edefademelë. Na udia dolö ilima ado sädelä dima nabahala säi.

⁴⁰ Amala sälebe ami dolö beaha aligilo busa amea dofea sämosebegi, Foloea aulo didaia ami nea naabo usigili. Sau sagaha maadesebegi Foloea Hibulu adoea sähalea,

22

¹ Naado nedoola dili-e, dilia na asiala hamoila säsebegeoie, asiala made hamoila dilima fädäla säla iahago, nabualola säi.

² Amala sälahilä Hibulu adoea säha neebe amo nabalahlä, dolö nefolalo amolia dofä adola made sau sagala nefolalo.

Sau sagala nefolalebegi Foloea sähalea,

³ Ne fiida Yumelë. Silisia segeie gaamu Dasasa amida nemea ne neegela ägüi. Gasoda, neda gaamu wegi nea wi fädäla aligisebegi, Gamelielea ne olelesa nelo. Eada nema nilile naua mäuie mala säla negei dibe amo sulubadela hedabola säla olelei. Na Godea hamomola säsegi gelola hamosa nelo, dili walio nefolalebe goea hamosa neebe go gadola.

⁴ Idi gowegi bögëla aulo nefolalo amoli na neala sëlasisa nelo, ili baagomäia. Udiage

dolöge nafodolahilä, ili galabaia mosöa negesa aligilomelë.

⁵ Gobela ilo Busa Edefade neebe ameage galisolö dolö nefolalebe sulubadelaeeage, ilia na dofä säsebewe dilima säla ilo amo. Ili ilile edoo Damasaga nefolalebe amolima beba dödëla, na gaula mosäia iasisio. Iasisibegi Idi bögëla aulo ami nefolalo amoli gaulahilä së imäia Yalusaleme sigi obögëmolöie nea asimelë.

⁶ Ne Damasaga suägila eso mogogi aligisebe amo gaalu, mudaijala yo digalo edefade fodolofali maala nema sege yabagelelo wäla yabagelei.

⁷ Amaimo, ne nagadaia digala negei dibegi afädëa nema sähalea, Solo-o, Solo-o, edogi dia ne neala sëlasisala säse nabi.

⁸ Amo nabalahlä na, Dafidilo, dida nowëla säla obögëi. Amala säla obögëlebeda ea nema sähalea, Neda Nasalese fii Yesu, dia neala sëlasilo amomelëla säσιο.

⁹ Dolö nebalä afiai amoliada yo digai amo meli gaso, afädëa nema ado säi amoie adoda ilia made nabi.

¹⁰ Amala hamosebegi, na nabahalea, Dafidilo, na abilia hamomolödula nabi. Amala nabasebegi, Dafidilo Geloia nema sähalea, Di nowela Damasaga mosö. Ami dia hamomolö Godea daia amoda afädë ami neebe amea dima säla iaha maademolömelëla säσιο.

¹¹ Yo edefade digai amea na bimolö ulisebegi, dolö nebalä afiai amolia ne nabelela gaula awäla Damasaga besela galai.

¹² Dolö afädë ëi Ananiasa e Damasaga aminelo. Eada Ado säla negei dibe amo gadola hamolo

nebegi, Yu udia dolö ami nefolalo amoli sulubade-
laeada, eda dolö hedabi mogoi neala sälo nelo.

¹³ E maala ne neebee ga madefali nea, ea nema
sähalea, Nedoo Solo-o, die si hedabi bu bimalola
säσιο. Amala säi amole nïe si bu hedabolahilä
bimolöi gabugi e meli.

¹⁴ Amasebegi ea sähalea, Nilile mäuïe Gode
neebe amea ea hamesebe amo dia helësëmäiage,
ïe hamoi hamolasilo asigi mogoifali neebe amo
dia siia bimäiage, hï ado säsebe amo nabuäiage di
memeleimelë.

¹⁵ Dia meli amoge nabi amoge udia dolö
sulubadelama säla ïmolöie e neala olelo di
namolömelë.

¹⁶ Di memalä beaha samolöda edoïe. Hä now-
elahilä ödägi gela, Dafidilo Geloima adola, dia
nafade hamoi amo hëla fisimalola säsiola Foloea
säi.

Foloea fii elöma ado mala sämäia Godea fisiga gai

¹⁷ Foloea säla ïahamu nea sähalea, Ne Yalusaleme
obëgëlahilä Godeïe mosöa Godema adosa salea
sosoäla awäla

¹⁸ beahamelebe, Dafidilo Geloi e misi nelo gabio.
Ea nema sähalea, Dia nïe säsise amoda Yalusaleme
nefolalebe amolia made nabolö ameada, hä
fodolofali, Yalusaleme digila di aabela mosalola
säσιο.

¹⁹ Amala säsebegi, na säla obëgësalea, Dafidilo
Geloi-e, na gedolo mosö difolalebea ami awäla
udia dolö dima asigi afädë negei nefolalo amoli
nufudala ïalalela, galabaia negelo amoge hili
dawadigimelë.

²⁰ Die olelo Sidibenïie heale digasolo amo gala
nege ilibalä nelomelë. E baagomolöge dofeala

helësëlahilä e baagomäia nufidelo amolile fagulo daia salugalo gii amoda na beaha nelomelëla säi.

²¹ Amala sälebe ea nema sähalea, Mosalo. Na di sege wagadi made, udia dolö fii elö sefolalebea ami fisiga gamolömelëla säi.

Folea ami dolö amolima neda Olomo dolömelëla säi

²² Ea ado säha nelo amo udia dolö nefolalo amolia hedabola nabaha nea gaso, ea udia dolö fii elöma moholömelëla säse amo nabalahlilä, ilia gelola üalala sähalea, Dolö goweda baagomäia nufü. Go gadoida wi namolöi made gabula säla didigai.

²³ Iliä üalala didigala sähamu nea hilile fagulo daia salugai giila sadia gala digi, gulu dao gasala sadia adala digisa nebegi,

²⁴ ami dolö beaha aligilo busa amea sähalea, Iliä ema ado gelola säse goie mi säla imäia ami mosö mumusogi digala e fëgämalola säi.

²⁵ Amasebegi ilia Folo fëgämolöie e nafodoi. Nafodoi amola wäla nea, Folea ami beaha aligilo ga madela neebe amoma nabahalea, Olomo dolöma gudi made nabala, Olomoie mala säla negei ameada dolö amo fëgämolöda mogolalela nabi.

²⁶ Amala säi amo nabalahlilä beaha aligilo amea ami dolö beaha aligilo busa neebea awäla ema säla ialahlilä nabahalea, Dia abilia hamomolö gabu. Dolö goweda Olomo dolöla säi.

²⁷ Amasebegi beaha aligilo busa amea e neebea awäla ema nabahalea, Nema sämo. Dida Olomo dolölela nabi. Amalebe ea säla obëgësalea, Äla säi.

²⁸ Amalebe beaha aligilo busa amea sähalea, Nihine muni edefadea ne Olomo dolö hamomolöie niimelëla säi. Amalebegi Foloea sähalea, Nemea ne neegela ägüsolo amo gala ne amala nelola säi.

²⁹ Amalebe e fëgämolö nefolalo amoli fodolofali badadi gasi gagai. Amalebegi ami dolö beaha aligilo busa amea helësäsaleada, na Olomo dolö nafodoila helësëlahilä, e bedäha nelo.

Foloea Yuie Galisolöma ado säi

³⁰ Amo aiyo amogi ami dolö beaha aligilo busa amea Yu amolia Folo eada edo asiala hamoidula fädäla bimolöie, e fisigälahilä gobela ilo busa amolige, Galisolö dolö amoli sulubadelage gegedomalai. Gegedosebegi ea Folo sigi digala ili sebea ami ifosi.

23

¹ Foloea Galisolö dolö amolima siila nea sähalea, Nedoola dili-e, ne Godeie siigi nawesa neda nie iso asigia dofealahilä hahamola misi amo, aso, hamosa neawe.

² Amala säsebegi, gobela ilo Busa Edefade Ananiasaea dolö odoa Folo ga made nefolalo amolima sähalea, İe nafigi nufuöla säi.

³ Amala säsebegi, Foloea ema sähalea, Dida mosö alalo gai beni faleia hëi amo gadoi nebego, Godea di nufulömelë.* Ado säla negei dibe amo gadola dia nema gudi nabolö salea gasoda, dia Ado säla negei dibe amo damula ne nufuöla sähalela nabi.

* **23:3:** Mosö alalo gai beni faleia hëila säi amoie mida gomalä. Mosö alalo gai nafade fea amoda made bimäialahilä beni faleia hëlo amo gadoila helësëi.

⁴ Ea Amala nabasebegi, dolö e ga madela nefolalo amolia sähalea, Dia Godeïe gobela ilo Busa Edefade neebe goma nafadela sähalela nabi.

⁵ Amala nabasebegi, Foloea säla obëgësalea, Nïe nedoola dili-e, e gobela ilo Busa Edefade neala na made helësëi. Udia dolö dili nefolalebe amoïe beaha aligilo neebe amo dilia e gagademabiola bebagi dëdëla negei dialeala säi.

⁶ Amalahilä Foloea dolö nefolalebe amoli odoa Sadiusi sosogo, odoa Felesi sosogo nefolalebe amo helësëlahilä, Galisolö gegedoi nefolalo amolima ado gelola sähalea, Nedoola dili-e, neda Felesi sosogo neawe. Nïe naadoge Felesi sosogo nelomelë. Udia dolö baagoi nowemolö amo dofä gabula helësëla asigia sisiläfüsa neebeweïeda gudisagomelëla säi.

⁷ Ea amala sälebegi, Sadiusi sosogo amoliage, Felesi sosogo amoliage ili gëgëlahilä gegedoi amo hilimu moge mogela nelo.

⁸ Sadiusi sosogo iliada udia dolö baagoi amoli made nowelolage selesaia fiige gesamige madela sälo nea, Felesi sosogo ilia ohodoa amoli dofä gabula helësësa neamelë.

⁹ Amalahilä dolö amolia gëgësalea ado gelola sähamu nebegi, mala dawadigi odoa Felesi sosogo amoligi nefolalo ilia nowela aligilahilä ado gelola sähalea, Dolö gowea nafade afädë hamoi nilia made meli neawe. Amai gesamiale ma, selesaia fiia ema ado säla ïledula säi.

¹⁰ Amala säsebegi, ilia gëgëlahilä edefade nudusalea, Folo dusugagise amea damula galaloea ami dolö beaha aligilo busa amo bedäi. Bedälahilä ea ami dolö nefolalo amolima sähalea,

Dili idogo digalahilä Folo e ili mogogila neala ami mosö mumusogi sigi obögëmalola säi.

¹¹ Amala hamolahilä gasigi Dafidilo Geloï Folo neebee maalahilä sähalea, Asigi gelomalo. Bedämabio. Yawe Yalusaleme nea di nïe neala olelo nelo amo gadola Olomo awälage amo gadola wäla hamomolömelëla säi.

Yu dolö ilia Folo baagomäia nufulö daiï

¹² Sege yosebe amo gaalu, Yu dolö nefolalo amolia Folo nufulö daiïha dilo. Ili migalïa diigila ado gelola säla negesaleada, ilia molö ödäge made naala, Folo nufudala baagolahilä molö ödä molömelëla säla negei.

¹³ Nufulöla daiïlo amolida nabülasï biyidia baagi.

¹⁴ Ili gobela ilo busa amolige, asigi gäwi dafidilo dolö amolige neebee awälahilä, ilia sähalea, Nilïa migalïa diigila ado gelola säla negesaleada, nilïa molö made naala, Folo nufudala baagolahilä molö molömelëla säla negeimelë.

¹⁵ Amala hamoi gabugi, Galïsolöla diliada ami dolö beaha aligilo busa amo sebee ado fisiga gahaleada, Folo dili neebee sigi digamalamäïa, ema säi amoïe mi fädäla hogomolöïela sämalö. Amala hamoseda, e dili mia, aso, made besela galala neëgi, nilïa e nufulöïe daiï neamelëla säla ï.

¹⁶ Amala säsebegi, gaso, Foloïe elefiïe malöea ilia säi amo nabalähilä, e ami dolöïe mosöa awäla mumusogi digala Foloma säla ï.

¹⁷ Amo nabala Foloea beaha aligilo dolö afädë welähilä sähalea, Diada malö malïsä gowe beaha

aligilo busa sebea sigi mosalo. Eada ado afädë ema sämolö gauleamelëla säi.

¹⁸ Amalebe ea malö malisä amo beaha aligilo busa sebea sigi awälahilä sähalea, Galabaia negei Folea ne wesaleada, malö malisä goweada ado afädë dima sämolö galea, di sebea sigi mosöla säla imelëla säi.

¹⁹ Amala säsebegi, ami dolö beaha aligilo busa amea malö malisä amoie naabogi gaula agesuadi heledo nea nabahalea, Diada nema edo sädeläla nabi.

²⁰ Amalebe ea sähalea, Yu ilia ado afädë nege-salea gomalä negesio. Ema säi amoie mi fädäla nabulöie, dia Folo e Galisolö neebea aiyo sigi digamalamäiala sämolöla säσιο.

²¹ Amaseda, diada ilima ümabio. Mida, dolö amolida nabülasi biyidia baagi, ilia e nufulö musügä beaha nea. Iliä migaliä diigila ado gelola säla negesaleada, molö ödäge made naala, e nufudala baagolahilä molö ödä molömelëla säla negesio. Hä dia ümäia ili walio daijala beaha neamelëla säla i.

²² Amala säla ibe beaha aligilo busa amea malö malisä amoma gelola sähalea, Dia nema säla i amo afädëma säla imabio, mosalola säi.

Gamane beaha aligilo Feligisi neebea, Folo e sigi asi

²³ Amala sälahilä ea ami beaha aligilo äudä misiëla welahilä elema sähalea, Sisalia moholöie ami dolö hädali äudäge, sugua hosidaia fila aulo dolö nabülasi gifalädaliage, amase, gögë gaulo dolö hädali äudäge, süwia midilö neë gaalu, moholöie walio daiamalo.

24 Amase, Foloïe sugua hosige dilia daialahilä e hedabola sigi awäla gamane busa Feligisi neebee sigi mosalola säi.

25 Amala sälahilä ea beba afädë dëdëla iahalea gomalä säla dëdëla i.

26 Neda Golodiasa Ilisiasa, na gamane beaha aligilo Feligisi dolö edefade dima, Di go gabiola säla, beba gowe dëdëla iasisago.

27 Yu iliada dolö go gaula nufudadigimolöie hamosebegi, na eda Olomo dolömelëla säsebe amo nabalahlilä, ami dolö amola e neebee maala na e damula awäla sigi obëgëimelë.

28 Ilia ema gudimolö ado säsebe amoïe mi nabulöilahilä, na ilile Galisolö neebee e sigi asimelë.

29 Sigi awälahilä beahamelebe, ilia ema gudimolö ado säi amoïe mida ilile mala säla negei amoïemu meli. Amai ameada, e baagomäia nufulöge, galabaia negemolöige, afädë made meli.

30 Dolö go baagomäia nufulö daiahaleamelëla afädëa nema säla iasebegida, di neebee e fodolo fisiga idogosagomelë. Ea nafade hamoila sälo amoliage mi goweïemelëla dima säla ïmolö mosalahagomelëla säla dëdëla i.

31 Amaimo, ami dolö amolia ea säi amo gadola, gasigi Folo e sigi awäla Ädibadalisi gaamugi besela galai.

32 Amo aiyo amogi ami dolö sugua hosidaia fila aulo amoliamu e sigi awähamu nebegi, ami dolö odoa amolida hilile mosöa obëgëi.

33 Ami dolö sugua hosidaia fila afiai amoli awäla Sisalia besela galalahilä, gamane beaha aligilo amoma beba dëdëi amo neala iala, amase, Fologe

sigi maala e mia ifosi.

³⁴ Amalebe beba amo nidelahilä Foloma naba-halea, Dida bolobinisi abidilala nabi. Eda Silisiala helësëlahilä

³⁵ ea sähalea, Dia nafade hamoila sälo amoli mofi-ala neëgi, na dïe gudi nabolömelë. Amala sälahilä ea Heledoea mosöa e idihë namialai.

24

Yu dolöea Foloea nafade hamoila säi

¹ Segeyo bia nelolahilä, gobela ilo Busa Edefade Ananaiasage, dolö asigi gäwi dafidilo nefolalo amolige, Olomoie mala negei amo gadola sälasilo ëi Dedulusi nelo amea ilile säsimäia eege hiligila digai. Digalahilä, ilia gamane beaha aligilo amea nabuäia Foloeada nafade gomu hamoimelëla säla i.

² Amalahilä beaha aligilo amea Folo misialai. Maala nebegi, Dedulusia ea asiala hamoi amoie ado säla iahalea, Dia nili sigi namolöi nelo amea nili neebea dalulo amoda negesimu dialeamelë. Dia nili hedabola sigi nelo amea sege edefade gowegi nefolalebewe hedabi namolöie, neala mogolasisa nelo.

³ Dolö edefade Feligisi-e, nilia amo bealahilä segeyo sulubadelagige sege dibe sulubadelagige dima obeägila edefademalä nesegesa aligilomelë.

⁴ Amai gaso, na asiala dima dofogaloea, dia nili bobasëla nilia ado oboba säsewe nabuäia.

⁵ Nafade hamoloda dolö gowemadila misi gabula beagolesamelë. Eada Yu dolö sege dibe sulubadelagi nefolalebe amoli neala habobalasi-lahilä nudulasiloge, amase, Nasalese sosogo nefolalebe amolile dafidiloge emu neamelë.

6-7 Amase, ea Godeie mosö Godeie siigi nigime baalasilage hamoi. Amalebegida nilia gauimelë.*

8 Amaimo, dihī mi fädäla hogomolöie dolö goma nabaseda, nilia nafade gowe hamoila säseweda dofä säsebelä helësëmolömelëla säi.

9 Amala säsebegi, Yu iliage Dedulusiie ado ugila negela ado säi amoda dofämelëla säla i.

Folea Feligisima ado säi

10 Gamane beaha aligilo amea Folea ado sämäia ië naaboeamu oodo bibila säsebegi, ea obëgëla sähalea, Dida gäheo i yafiegi sege edefade goweie gudi mogelo nelo amo helësëlahilä, nïe asigiada ilia ado säi amoie dima obëgëla sämolöda hedabi galea.

11 Amaimo, na Godeie ei gauia adala Godema adomolö Yalusaleme fedaia amila segeyo walioda giwimelë. Amoda dihī dawadigimolöi.

12 Amaimo, ilia na Godeie mosöa nea afädëbalä didiäha neebe made meli. Amase, gedolo mosöage, sege gaamu dibeage udia dolö gegedoi amoli fudugilasila hamoseda made melimelë.

13 Amaimo, na nafade hamoila ilia walio sälebeda, na dofä amala hamoi amoda dima säla ulufadigimolö amo ulisio.

14 Ado dofä dima säla iahawe, amoda gomalä. Neda Idi ilia sosogo elöla säse gowe bëgësaleada, nilile mäuie Gode ei gauia adalomelë. Amase, nada Ado säla negei dibe amo sulubadelage, Godeie

* **24:6-7:** Dolö dawadigi odoa amolia helësësaleada, ado odoage damo gogi dialeala helësëi. Ado amoda gomalä. [Nilia nilile Ado säla negei amoie ema gudideläi 7 gaso, ami dolö beaha aligilo busa Ilisiasa maala, nili bobala didigilahilä, ea nilia gaula nelo amo sigi awäsio. 8 Sigi awäla ea nafade hamoila sälo amoli di neebea misialola säi.]

bea sälo amolia ado säla dödëla negei amoge dofä gabula helësësamelë.

15 Godea baagoi amoli nowela ifosimäia na beaha neebe amo gadola, amase, dolö gowe iliage amala beaha neamelë. Godea amala hamomäia na asigia sisiläfüsa nea.

16 Amalebe segeyo sulubadelagi Godeie siigige udia dolöie siigige nie iso asigia mogola namiäiala helësësa aligilo.

17 Neda gäheo i odoa nelolahiläda, nihile segea obëgësalea, udia dolö nelebo maade amoligali muni imolöiege, amase, Godegali odala imolöiege obëgei.

18 Dafidida Godeie siigi nigime baai made neebe amo olelo mala hamolahilä, Godeie mosöa odala imolöie awäla nebegi, ilia ne meli. Nebalä udia dolö gegedoi made, gëgëla nudusage made nudui.

19 Amalebe, Yu dolö odoa Esia segeala mofiai ami nefolalo amolia nema dia nafade hamoila säha nea galëda, di neebea hili ado amo sämolö yawe moholöi galea.

20 Maade galëda, dolö nefolalebe gowe ilia ne Galisolö dolö neebea nowela ifosisolo amo gala, ilia na dofä nafade hamoila meli amo säla imäia.

21 Ne ilibalä nea na ado afädë säi amomuda gowe. Udia dolö baagoi nowemolö amo dofä gabula helësëla asigia sisiläfüsa neebeweëda, dilia walio gudisagomelëla säimelëla Foloea säi.

22 Amala säsebegi, Feligisia Idigi aulo mala hed-abola dawadigi nelo ameada gudi nabi amo wagalahlilä sähalea, Ami beaha aligilo busa Ilisiasa e maasegi, dilile gudi säla mogemolöla säi.

23 Amala sälahilä, ami beaha aligilo amoma

sähalea, Folo e idihë nea gaso, hï helësëse amo gadola hamomäiage, amase, e damelë neebe amolia e ugila negemolö misiäiage fu ïmalola säi.

Feligisia Folo e gäheo i äudä galabaia negei

²⁴ Segeyo odoa nelolahilä, Feligisi e hïle udia Dulusilabalä misi. Dulusila eda Yu udia. Feligisia Folo bea mosalolahilä sigi maasebegi, Foleoa Geleso Yesuma asigi afädë negemolö mala säla ïasebegi, Feligisia nabaha nelo.

²⁵ Nabelebe Foleoa mogoi namolöge, asigi sigi namolöge, mogemolöie segeyo daiala negei amo maasebe amoïege säla ïaha nelo. Säla ïaha nebegi, Feligisi e bedälahilä sähalea, Di mosalo. Hobeala fu beaseda, na di misialamolömelëla säi.

²⁶ Amala helësëselo amo gala Feligisia Folobalä ado didiämölöie wesamu nelo amoda muni ïmäiala helësëlahilä amai.

²⁷ Gäheo i äudä nelolahilä Feligisi gadoi Bosiusi Fesidusi e gamane beaha aligilo bedefala nelo. Feligisiada Yu dolö nefolalo amoli obeägimäia Folo e galabaia mosöa ifosisamu nelo.

25

Foleoa sähalea, Olomo beaha aligilo Gini Sisa nebea gudimolö moholömelëla säi

¹ Bolobinisigi ami gamane beaha aligilo Fesidusi besela galala segeyo ohodoa nelolahilä, e Sisalia digila Yalusaleme fedai.

² Yalusaleme fedala nebegi gobela ïlo busa nefolalo amolige, Yu udia dolö ëi sälo nefolalo amolige e nebea awälahilä, Foleoa nafade gomalä

hamoimelëla säla i. Säla iälahilä ilia ema gelolafali sähalea,

³ Dia dofä nili ugila negela Folo eda Yalusaleme misialamäiala säi. Dafidi ilia didiähalea, Folo e, aso, idiafa maaha neëgi, e nufulöie idia negeomolömelëla didiäi amo helësëla amala säi.

⁴ Amalebe Fesidusia säla obëgësalea, Folo eda Sisalia galabaia nea. Neda holöfali nelolahilä ami obëgemolömelë.

⁵ Dolö goea nafade afädë hamoi galëda, dilile ëi sälo odoa nefolalebe amolia ebalä gudimolöie nebalä digamalamalola säi.

⁶ Amida Fesidusi e ilibalä segeyo gödöläsi gadoiledu ma, nabüläsi gadoiledu, nelolahilä Sisalia digai. Amo aiyo amogi Fesidusi e gudisalea filo amodaia salea, ea Folo sigi misialai.

⁷ E maasebegi Yu dolö Yalusalemela digafiai amolia Folo e nogöla amalela digila nea, ea nafade yafie edefade hamoimelëla säi. Amala säi gaso, ea dofä amala hamoi amoda säla ulufadigimolö amoda uli meli.

⁸ Amaimo, Foloea sähalea, Yu udia dolöie mala säla negei dibe amoge, Godeie mosöge, amase, Olomo beaha aligilo Gini Sisa neebe amomage na nafade afädë made hamoi neawela säi.

⁹ Amala säsebegi, Fesidusia Yu udia dolö obeägimäiala helësëlahilä, Foloma säla obëgëla nabahalea, Iliä säi amoie na gudi mogemolöie Yalusaleme fedamolö helësësebelela nabi.

¹⁰ Amasebegi Foloea säla obëgësalea, Mosöa walio ne neebeweda Sisaie gudilo mosö. Nebalä gudimolö amoda mosö wegimelë. Dihï dawadigi, nada Yu ilimada asiala hamoi afädëda made.

¹¹ Amaimo, na nafade hamolo amea baagomolö galebeda, ne baagomolö amoda dofealabio. Amai walio dolö gowe ilia na nafade hamoila säsebege, amo dofä made galëda, afädëa ne neala ilile naabogi gausimolöda made bimolömelë. Amaimo, neda Sisaeamu nïe gudi nabuäiala helësësamelëla säi.

¹² Amala säsebegi, Fesidusia dolö e ugila negela sälasilo amolibalä didiälahlä, ea Foloma säla obëgësalea, Dia Sisaea nabuäiala säi ameadada dida Sisama moholömelëla säi.

Fesidusia Gini Agilibama Foloie nabi

¹³ Segeyo odoa baagilahilä, beaha aligilo Gini Agilibale Benisile Sisalia Fesidusima di go gabiola säla olemolö misi.*

¹⁴ Eleda Sisalia segeyo holöbö nahui nelö. Segeyo amo gala Fesidusia Foloie ado amoie ginima säla i. Ea sähalea, Dolö afädë dafidi Feligisia galabaia negei nelö amo, wimu neamelë.

¹⁵ Ne Yalusaleme nelö amogida, Yu ilile gobela ilo busa amoliage, asigi gäwi dafidilo amoliage, dolö amoie sähalea, Ea nafade gomalä hamoimelëla säla ialahlä, na dofä ea asiala hamoila sämäiala säsio.

¹⁶ Amasebegi na ilima säla obëgësalea, Olomo nilile malada dolö memalä neala elöie naabogi gausiloda mademelë. Dolö gudimolö galëda, eda dafidi gudimolö dolö amo mimiagila mia sida alogola aligilo. Amase, nilia ema fu iahalea ilia ema säse amoie säla obëgëmäia fu ilömelëla säi.

* **25:13:** Gini Agilibada Heledo, Yamese nufidelo amoie malö. Abosolo 12.1 bimalo. Benisida Agilibaie elefi.

17 Amalebe ilia wi maala gegeedosebegi, segeyo baagila made, amo aiyo amogi ne gudisalea filo amodaia salea, na dolö amo sigi misialola säi.

18 Dolö ebalä gudimolö amoli hä nowela nefolalebeda, ilia ea nafadefali hamoi gabula sämabelela helësëi gaso, maade gabu.

19 Ilia ado gëgëla säha nelo amoda ilile Gode bëgëlo mala amole, Yesu baagola Foloea e noweimelëla sälo amolegi gëgëi.

20 Na ado goie mi fädäla bimolö amo asusug-asebegi, na ema nabahalea, Ado goie gudi mogemolöie Yalusaleme moholö helësësebelela nabi.

21 Amalebe Foloea, beaha aligilo giniamu nie gudi mogemäia galabaia namolöla säsebegi, na e beaha aligilo Gini Sisa nebea fisiga gamolölahilä gaso, aso, galabaia namialaimelëla Fesidusia säi.

22 Amala säsebegi, Agilibaea Fesidusima sähalea, Dolö goea ado säse amo nihï nabolöila helësësebemelëla säi. Amala sälebe, ea säla obëgësalea, aiyo dia ie ado nabolömelëla säi.

23 Amo aiyo amogi Agilibale Benisile momadolahilä maala ami beaha aligilo busa nefolalo amolige, gaamu amoie dolö dafidilo nefolalo amolali gamane gegeedolo mosöa ami digai. Digalahilä, Fesidusia Folo e sigi misialasebegi ilia e sigi misi.

24 Sigi maala nebegi Fesidusia sähalea, Gini Agiliba-o, dolö gegedoi sulubadela dili-e, dolö dilia beasebe egoeda Yu udia dolö sulubadela, Yalusaleme amige, amase wige, nema nabahamu nea sähalea, E namolöi madela üalala säha aligilomelë.

25 Amai gaso, na ea hamoi amoie e baagomäia

nufulöda mi afädë made beagolei. Gasoda, ea beaha aligilo ginia ie gudi mogemäiala säsebegi, na ado afädë negesaleada, e fisiga gamolöla säi.

²⁶ Ea hamoi amoie dafidiloma beba dëdëmolöie afädë fädäla made beagolesebegi, Gini Agiliba-o, dë siigi e sigi misialaimelë, amase dilile siigige. Mida, nilia ema säi amoie mi fädäla hogolahilä, ea hamoi amoie mi bebagi dëdëla negemolö dibe amo helësëlahilä, dëdëmolömelë.

²⁷ Afädë galabaia neebe amea nafade gomalä hamoila made dëdëla fisiga gamolöda dofea madela helësësamelëla Fesidusia säi.

26

Foloea Gini Agilibaea nabuäia ado säi

¹ Agilibaea Foloma sähalea, Dia sämolö amo sämalola säi. Amala säsebegi, Foloea naabo gauia adogola nea sähalea,

² Gini Agiliba-o, Yu dolöea nema dia nafade hamoila säi amo sulubadelaïeda walio na dima säla obëgëmolö amogida obeägisamelë.

³ Obeägisamelëla säi amoda, diada Yu udia dolö neebe amoie mala sulubadelage, amase, nilia elö elöla helësëla gëgëlo amoge dawadigisa maadei nebege. Ameada na walio ado säsebewe sedade säsebela helësëla made, hame negela nabuäiala helësësa.

⁴ Ne malësägila na hamosa nelo amoda Yu udia dolö sulubadelaëa dawadigisa maadei nea. Mi gäwia amila nihï segea neage Yalusaleme neage, namolöi nelo amo ilia dawadigi nea.

⁵ Iliä ne malësägila dawadigi ameada ilia sämolö helësëседа, na Felesi ilile mala hamosa nelo amo

dima sämolöi gabu. Nilile Gode bégëlo mala amoïe sosogo odoa dialea gaso, Felesi sosogoïe mala elö elöla yafie hamolo ameadä sosogo odoa sulubadela baagila asimelë.

⁶ Amaimo, dafidi Godea nilile mäuma ado afädë säla negei amo hamomäia na asigia sisiläfüsa neebeweïe ne nebegi walio gudisagomelë.

⁷ Ado säla negei amo bimolöïe nili fi giwilasi nefolalo amolia asigia sisiläfülahilä, esoage gasigige Godeïe ëi gauia adala ema ado sähamu nefolalea. Amaimo, beaha aligilo gini-e, na asigia sisiläfüsa neebeweïeda Yu dolö ilia dia nafade hamoila säha neamelë.

⁸ Godea udia dolö baagoi amoli nowelasilo neebe amo dilia e amala hamolo ulila helësësa nefolalebegoda edoïe.

⁹ Nasalese fi Yesuïe ëi neala nafademolöïe, na hamoi edefade hamomolöila helësësa nelomelë.

¹⁰ Amala helësëlahilä, na Yalusaleme nea amala hamosa nelo. Gobela ilo busa nefolalo amolia ne geloi iasebegi, udia dolö yafie Godea hile nafolai amoli na galabaia negei. Amalahilä, ilia udia dolö amoli baagomäia nufualola säsegige na ülomelë.

¹¹ Segeyo yafiegi gedolo mosö nefolalebe amo sulubadelagi awälahilä, ilia Gode gagademäiaïe na ili neala sëlasisa nelo. Na ilima edefademalä mihaläla fii elö elölaïe gaamu dibeä amige awälahilä, ili neala sëlasisa nelomelë.

¹² Na amo gadola hamomäia gobela ilo busa nefolalo amolia ne geloi iala, bebage dëdëla iasebegi Damasaga gaamugi asi.

¹³ Beaha aligilo gini-e, ne idiafa awäla eso mogogi aligisebe amo gaalu, na beahamelebe, nege nebalä afiai amola nili neebea ami eso

si gadoi made, yo edefade hido elöi mudaiala säsälosebe meli.

¹⁴ Amala hamosebegi, nili sulubadela digafui difolalebegi, afädëa nema Hibulu adoea sähalea, Solo-o, Solo-o, edogi dia ne neala sälasisa. I ägëgi emoea nufidelo wäla nufidelo goeada di dihïmu yölasisebegola säσιο.

¹⁵ Amala sälebe na naba obëgësalea, Dafidilo, dida nowëla nabi. Amala nabelebe Dafidilo Geloia säla obëgësalea, Neda Yesu, dia neala sälasilo amomelë.

¹⁶ Di nowela emoea emesala namië. Di hamoi hamolasilo namiäiage, dia walio ne neebe meli amoge, hobeä ne bimolö amoge udia dolöma säla imäia na di memelela ifosimolöie ulufadigila misi neawe.

¹⁷ Hobeä ne bimolöla säi amoda, di fii nefolalebe amoliage, amase, udia dolö fii elö nefolalebe amoliage, di nufudadigiloea na damula awäla sigi molömelë. Na di ilima fisiga gahagomelë.

¹⁸ Ilile si fisigälasimolöiege, gasimi sagaia amila yo digalo dibeä amige, amase, Saidanïie geloi hawa amila Godea sigi neebeä ami ili besulasimolöie, na di fisiga gahagomelë. Iliä amala hamoseda, ilile nafade hamoi amo hëla fisimolö. Amase, udia dolö nema asigi afädë negela Godea hile nafolaimadi namiäia fu imolömelëla säσιο.

¹⁹ Amalebe, Gini Agiliba-o, selesäia mosöala ole-salea ado säi amoda na fisila made nelo.

²⁰ Dafidida Damasaga nefolalebe amolimage, Yalusaleme nefolalebe amolimage, amase, Yudia sege sulubadela dibeä nefolalebe amolimage säla iähalea, Dili asigi besulahilä Godemadi nea, dili dofä asigi besui amo gadola mala hedabi olela

hamosa namialola säla ïalahilä, hobealada fii odoa ilimage amala säla ïaha aligilomelë.

²¹ Amala säla ïaha aligilo amoïe, Yu dolö nefalalo amolia ne Godeïe mosöa nebegi gaulahilä baagomäia nufidedelä hamoimelë.

²² Amaimo, Godea ne ugila negesebegida, na memasamage, ëi sälomage ado säsäla misi amo, aso, walio säha neawe. Nada ado elö made sähamelë. Nada siiba bea sälölea, Moseselea nelebo gausiala digamolömelëla ado säla negei amomu sähamelë.

²³ Iliä gomalä säla negei. Afädë Memelei amoda së molö dialea. Amalahilä, bauiala nowemolö amo dafidifali hï nowese amea ea Godeïe yo digalo amo e fii amolimage, amase, udia dolö fii odoa amolimage säla ïmolöla bea säla negeila Foloea säi.

Foloea Agiliba asigi afädë negemäiaïe säi

²⁴ Foloea amala säha nebegi Fesidusia gelola uuala sähalea, Folo, dida gagaosebego. Die dawadigilo edefade goeada dihidi gagaosebegola säi.

²⁵ Amala säsebegi, Foloea sähalea, Dolö edefade Fesidusi-e, ne gagaosa maademelë. Nada dofä säha. Asigi gäwi nea gowe sähala sähamelë.

²⁶ Gini Agilibaeada na ado säi amoïe dawadigisa neamelë. Nada musügä negela made säla ïaha maademolöi neawe. Na helësésaleada, ea dawa made made, amoli sulubadela ea dofä dawadigisa maadei nebegola helësésamelë. Mida, amo hamoi amoda musügä nea hamoi made ameadä amala helësësa.

27 Gini Agiliba-o, diada bea säloie ado amoda dofäla helësésale. Na helësésaleada, diada dofäla helësésala helësésamelëla säi.

28 Amasebegi Agilibaea Foloma säla obëgësalea, Ne Geleso sosogo namolöie fu oboba gogi aligilasimäia helësësebelä säi.

29 Amala säsebegi, Foloea säla obëgësalea, Fu obobagi galëge ma, sedadegi galëge amoie na dimu made, udia dolö na walio ado säsebe nabaha nefolalebe amoli sulubadelage nihine gadoi namiäiaie Godema adosamelë. Nihine gadoi gaso, dili igi ëfëa galabaia negelo amo gadola made negela namiäiala helësésamelëla säi.

30 Amasebegi beaha aligilo ginige, gamane beaha aligiloge, Benisige, ilibalä sulo amolige hä nowei.

31 Nowelahilä ili segea doadigila awäla hilidomu sähalea, Dolö goweda ea hamoi amoie nifulöge, galabaia negemolöge maade gabula säi.

32 Amasebegi Agilibaea Fesidusima sähalea, Dolö goeada Sisaea ie gudi nabuäiala made säi galebeda, dia fisiga gamalalabiola säi.

27

Ilia Folo e Olomo mosäia ödä du edefadegi fisiga gai

1 Ilia nili ödä sibigi Olomo moholö dialeala ado afädë negesebegi, ilia Fologe dolö galabaia negei odoage ami beaha aligilo afädëie naabogi gausi. Beaha aligilo amoie ëida Yuliasa. Eada ami dolö hädali afädë beaha aligilo nelo. Eda beaha aligilo Gini Sisaie Ami Dolö amoligi nelo.

² Nili ödä sibi Adalamidiamala misi dilo amogi fila afiai. Sibi amoda Esia segeë gaamu age-sumadi besela galala digila moholö dilo. Desalon-aigala Masedonia fii dolö afädë ëi Alisadagusage nilibalä afiai.

³ Afiala amo aiyo amogi Saidono besela galai. Besela galalahilä Yuliasaea Foloma hedabola helësëlasila sähalea, Di damelë wi nefolalebe amolia nelebo di gumusui dibe amo gadoi imäia, ili neebee moholöi galeala säla i.

⁴ Amalahilä sege amo dīgila ödä sibigi afiaha dibegi, fo eso digasebeamadila maasebeamadi amogi moholö iliwasebegi, fo hagula Saibulusimadi dewagila afiai.

⁵ Afialahilä ödä duhulu dēgēla awāla Silisiale Bāfiliale agesuamadi awālahilä Ilisiaë gaamu Maila besela galai.

⁶ Besela galahamelebe, ami dolö beaha aligilo amea ödä sibi elö Alegisādāiala misi Idalimadi moholö dilo amogi nili sigi awāla ifosi.

⁷ Segeyo holöbö nahuigi afiahalea baagi sēla aligi gebela awāla Nidusa gaamu sida gagala afiai. Fo amea nili moholö helësēido amogi moholöi made gabugida oböla fo hagula ödä södülo Gilidimadi dewagila awāla Salomone segeamadi sida gagala afiai.

⁸ Nili baagi sēla aligi dewagila didigila awāla sege afädēgi besela galai. Sege amoda Ödä Sibi Musügä Negelo Hedabi Segela sälo. Amoda gaamu Alasea ga madela ami dilo.

⁹ Segeyo yafie baagila asi amogige, amase, Molö

Made Nülo Segeyo* amoge baagila asi amogige segeyo amo gaaluda, baagolea ödä sibigi aulo made negei. Amo helësëla Foloea ilima sähalea,

¹⁰ Dolö dili-e, wilahilä moholö amoda dofea made, nafade na melimelë. Nelegei difolalebe goge, du edefade wege neala nafademolö gabumelë. Amase, nili odoage baagomolö gabumelëla säi.

¹¹ Amala säi gaso, ami beaha aligilo amea ödä sibi gaulolea ödä sibi eedolea helësëse amo gadola hamodeläla helësëla Foloea säsebe amo gadola made hamodeläla helësëi.

¹² I bäu giise gaalu, gögi mulo segeyo besela galasebegi sege amogida ödä sibi negesilamu diamolö amo dofea made gabula helësëlahilä, dolö yafie ilia Finigisi moholö amoïe ado afädë negei. Iliä nili Finigisi besela galamolö walebelela bi-molö moholöila helësëi. Gögi mulo segeyo besela galasebegi ami negesimu diamolöla helësëi. Finigisi amoda Gilidi södöloïe ödä agesua. Sibi negelo segea ami diëda eso digasido amoïe fefeädimadilage dafädimadilage melëlo.

Sibi ödägi awäha nebegi fo edefade misi

¹³ Fo eso digasido amoïe fefeädimadila holöbö geleäla maasebegi, dolö amolia hili helësëi amo gadola ga moholö dialeala helësëi. Amala helësëlahilä nelebo yöi igi aeanea hamoi amo

* **27:9:** Molö Made Nülo Segeyola säi amoda nafade hëmolöïe odala ilo mala siiba daiala negei segeyo dilo amola helësëi.

dusugala neala gauia adalahilä, Gilidi segeie ödä agesuamadi afiai.*

¹⁴ Aso, afiaha dibegi heleia made fo geloi ede-fademaläde Gilidi södölomadila misi. Fo amoie ëida Ulagulo fo.*

¹⁵ Amalahilä du amo foea gaula näiadodimu bolosebegi iliada du obëgëdelä hamoi gasoda, obëgëmolöi made meli. Amasebegi hä foea du gaula mosäia fisigisi.

¹⁶ Fisigisila awäla södölo holöfalä, ëida Gaudaea fo holöfalä hagusebegi, niliada häualafalä du edefade mia du holöfalä begela negei amo dusugala gaula misi.

¹⁷ Dusugala gaula maala du holöfalä amo gauia adala du edefade amodaia negesebegi, ilia du edefade hawa ëfë fisiga idogolahilä amo bäimäia fëdöla begela negei. Ilida du amo ödämu dibe amogi ödä dögöla digai made giäbigi ëi Sidisi amogi aligisiloea bedähalea ie balai amo haila negesebegi foeamu gaula asi.

¹⁸ Fole ödä bubolele dagabola maase amolea nilida edefade besu besui. Amasebegi, amo aiyo amogi ilia mi gäwila nelegei dudaia negei amo duhulugi hadia idodogosa nelo.

¹⁹ Amalahilä awäla segeyo naabo osodagi, ödä sibigi negelo nelegei odoa, ëfëge balaige iige amo gadoi difolalo amoge hili naaboea neala ödägi hadia idodogoi.

²⁰ Segeyo yafiegi niliada eso, gasumilile made

* **27:13:** Nelebo yöi igi aeanea hamoila säi amoda gomalä. Nelebo yöi igi aeanea hamolahilä ödä du made mosäia begela ödägi nea salelo. * **27:14:** Ulagulo foda eso fedasido amoie fefeädimadila mulo, mugi fo gadoi.

beala, fo edefademalä maahalea nili neala besu besusamu nelo. Amasebegi nilia helësësalea, nilida samolö made gabu, baagomolö gabula helësëi.

²¹ Segeyo yafie ili molö made nasebegi, Foloea ili mogogi nowela nea sähalea, Dolö dili-e, dilia nie ado nabala Gilidi made baagi galebeda, nafadela bedälasila hamoi amoda made beala, nelegei odoa made fisilabio.

²² Amaimo, walio na dilima gomalä sähawe. Dili bedäla made, obeägimalo. Mida, niligi afädë made baagomolö. Du wemu nafademolömelë.

²³ Gode neebe amoie ne neawe. Nada ie ei gauia adaha aligilo. Gode amoie selesaia fii afädëa walio gasigi ne sebea maala nea

²⁴ sähalea, Folo, bedämabu. Dida awäla Sisaie siigi namolö galea. Amase, nabuö. Dolö dibalä ödä sibigi sefolalebe goli sulubadelada made baagomolö Godea die naabogi gausila imelëla säσιο.

²⁵ Ameada, dolö dili-e, bedäla made, obeägimalo. Mida, na helësësalea, Godea ado nema säi amo gadola gausiala digamolöla helësësamelë.

²⁶ Gaso, foea nili gaula awäla södülo afädëgi aligisimolö galeamelëla Foloea säi.

²⁷ Amaimo, segeyo silasi awäha nelolahilä gasisebegi, nili ödä duhulu ei Ödä Adiliagi foea gaula awähamu nelo. Gasi mogogi ödä sibi gaulo dolö amolia ödä agesu holöbö ga madei gabula helësëi.

²⁸ Amala helësëlahilä ilia ödä amo dofe bimolöie efë sedade amoie bidigi yöi afädë begehlahilä ödägi fisiga idogoi. Fisiga idogoi amo nea adogola beahamelebe ödä döğüla digai dofei

amo mida nabūlasi biyidia gadoi meli.* Amala bealahilä holöfali aliga galahilä bu elö fisiga idogola dofela beahamelebe ödä dofei amo mida nabūlasi ohodoa gadoi meli.*

²⁹ Amalahilä nili awähalea igidaia aligisiloea bedālahilä, ilia nelebo yöi igi aeanea hamoi biyidia amoli du amoie gobegi begela sadia idogoi.* Amalahilä ilia sege yola eso neēmäia Godema adosa nelo.

³⁰ Amaimo, ödä sibi gaulo amolia sibi dīgila äudulālahilä du holöfali fisiga idogola wāfali sähaleada, Nelebo yöi igi aeanea hamoi odoa sibiie busamadila fisiga idogosamelëla säi.

³¹ Amalebe Foloea ami beaha aligilo amomage ami dolö amolimage sähalea, Ili sibi gowegi made aligiseda, dili baagomolömelëla säi.

³² Amala sälebegi ami dolö amolia du edefadegi du holöfali begei amo damula sali.

³³ Haea gämölö hä ga madese amo gaalu, Foloea dolö amoli molö muäiala ilima sähalea, Segeyo silasigi dili molö fodögila made naala memalä nelo.

³⁴ Walio dili molö muäiala sähamelë. Dili namolöie molö molö dialea. Dilile busa hili afädë made besela digimolömelëla säi.

³⁵ Amala sälahilä Foloea beledi afädë nealahilä ili sulubadela sebea ami nea Godema nesegelahilä dagabola naha nelo.

³⁶ Amala hamosebegi, sulubadela asigi gadaealahilä ilige molö mai.

* **27:28:** Mida nabūlasi biyidia amoda hēsä gīdālasī gadoi.

* **27:28:** Mida nabūlasi ohodoa amoda hēsä gödōlasī gadoi.

* **27:29:** Abosolo 27.13 amogi gasumili nufi amo bimalo.

³⁷ Ödä sibi amogi dolö sefolalo amoli gedolada hädali äudäie nabülasi gifalädaliäie odoai gafeia sulo.

³⁸ Molö mai agulahilä, ilia ödä sibi amo hageamäia eladi gadoi ei widi dilo amo ödägi sadia idodogosa nelo.

Du dagabodasi

³⁹ Segeyo hosogasebe amo gaalu, ilia duhulu agesua besela galaia amo bealahilä, sege abididula asusugai. Asusugalahilä beahaleamelebe duhulu hedogola bose fula asi dibe amo bealahilä, ami awäla ödä sibi negemolöi galëda, negemolöla helësëi.

⁴⁰ Amala helësëlahilä ilia nelebo yöi igi aeanea hamoi amoli ödägi ëfë amo damula sasali. Amala hamolahilä ödä sibi mogola mosäia adelo i ëfëa begela negei dilo amo fisigäi. Fisigälahilä foya ödä sibi gaula mosäia ilia duie busamadi balai afädë dilo amo gauia adogola neegilahilä, ili ödä agesu dibeami besela galamolöie awäha nelo.

⁴¹ Awäha nea ödä sibi amo ödä isogi bose giäbigila fedai dilo amogi udigi. Busa amo udigila aligisilahilä fogomolö uli dilo. Amala aligisi dibegi ödä bubolela edefade maasebe amea du gobe aba fedafusalea dagabodasila nafadei.

⁴² Amala hamosebegi, dolö galabaia negei amoli ödä agesua dasi afufula fisäla afialoea, ami dolö amolia ili sulubadela nufudadigimolöla helësëi.

⁴³ Ili amala helësësebegi ami beaha aligilo amea Folo e made nufuäiala helësëla ilima säla iähalea, Dilia helësëi amo gadola hamomabiola säi. Amala sälahilä ea sulubadelama sähalea, Ödä dasi aulo

nefolalebe dilidale ödägi nila digala dasi afufula agesua mosalo.

⁴⁴ Odoa dilida i gäi amogi gaula, amase, odoa du nuli amogi gaula biila mola afufula mosalola säla i. Amala säi amo gadola hamolahilä niligi afädë made baagola hulu agesua dea negesa maadeimelë.

28

Folo e Malada södölogi nelo

¹ Nilä agesua hedabola besela galalahilä, ami fii amolia sege ödä södölo amoie ëi Maladamelëla säla i.

² Udia dolö sege amogi fii amolia nili hedabola helësëla hido elöla ugila negei. Sege digahalea gögisebegi, ilia nulo gobelahilä nili sulubadelama hëgi haumulö mofiamalola säi.

³ Foloea nulo gasa nidilahilä nulo gaamugi gobesebegi, nulo amogi baagolo nuba afädë nulo gaamuea hëgisebegi doadigila fedala, Foloie naabogi mihila begedigila gosai dilo.

⁴ Ami fii udia dolö amolia beahamelebe, Foloie naabogi nubaea mihila begedigila gosai dibe amo bealahilä hilidomu sähalea, Dolö goeada dofä dolö nufudala baagolo. Eda duhulugi baagomolö halabai gaso, godea nafade hamolo amolima bidi obëgëla ilo amea e made namiäia amasebela säi.

⁵ Amasebegi Foloea nuba amo folalela nulogi hadia galahilä, eda made olola hedabi nelo.

⁶ Udia dolö amolia helësësalea, e galumulöledu ma, fodolo baagola digamolöledula helësëi. Amala helësëlahilä, ili sedademaalä beaha nefolalebegi,

emada nelebo afädë made hamose meli. Amasebegi ilia asigia oböla elö bedefala helësésalea, eda gode afädë gabula helësei.

⁷ Sege afädë ili sebe amo gägägëla dilo amoda södölo amoie dafidilo ëi Bubuliasaie sege dilo. Dolö amea nili ea mosöa fimäia fu iasebegi segeyo ohodoagi ea nili hedabola sigi nelo.

⁸ Bubuliasaie eedo domalo hëgige gaisa sëge oloi dibegi, Foloea e dibeami awäla Godema adoi. Godema adolahilä ea ie naabo negesebegi oloi dilo amo wahilasi.

⁹ Amala hamosebegi, södölogi ami oloi difolalo amoli Folo neebea mafusebegi ili wahilasisi.

¹⁰ Nilima obeägila ilia hedabolafali hamoi. Amala hamolahilä hobeala nili ödä sibigi äudulä hamosebegida ilia nelebo nili gumusui dibe amo gadoi i.

Folo awäla Olomo besela galai

¹¹ Aube ohodoa ami nelolahilä, nili ödä sibi afädë Alegsädaliala misi dilo amogi fila afiai. Ödä sibi amo i bäu giilo segeyo amoli besela galasebegi södölogi ami negesi dilo. Sibi amoie busamadi malö äudä balagula ägüi amolele ausulubo iia hamola baala negei dilo.*

¹² Afiala nili Silagusa besela galalahilä, segeyo ohodoa ami nelo.

¹³ Silagusa amila awäla giso Ilegiuma besela galai. Segeyo afädë ami nelolahilä, fo eso digasido amoie fefeädimadila maasebegi, nili afi-

* **28:11:** Malö äudä balagula ägüila säi amoda, wäfalä gode Susa amoie dolö malö äudäiela säi.

ala gasila didigadigila awälahilä amo aiyo amogi awäla Budeoli besela galai.

¹⁴ Besela galalahilä ami nedoo odoa nefolalebe amoli beagolelahilä, ilia niläma segeyo gifalädalä namolömelëla säi. Ami nelolahilä nili Olomo molö afiai.

¹⁵ Afiaha dibegi nedoolali Olomo ami nefolalo amolia nili maahala säi amo nalahilä, ilia nili idiafa gausiamolö maala odoa Abiasa magaia gaamugi gausialahilä, odoada hele filo mosö ohodoa neebee ami gausiai. Foloea ili maasebe amo beala Godema nesegelahilä, ie iso asigi delësi.

¹⁶ Nili Olomo besela galasebegi gamane ilia, ami dolö afädëa idihë neëgi, Folo mosö afädëgi hido namolöi galeala säi.

Foloea Olomo nea Yesuie mala säla i

¹⁷ Segeyo ohodoa nelolahilä, Foloea Yu udia dolö nefolalo amolile dafidilo nefolalo amoli misiäia wei. Maala gegeosebegi Foloea ilima sähalea, Nedoola dili-e, nili fii amolimage, nilile mäuie mala amomage na nafade afädë made hamoi nebegi, ne Yalusaleme ami nafodolahilä, Olomo dolö nefolalebe amolile naabogi gausimelë.

¹⁸ Iliä gudilahilä ne nufudala baagomolö amoie mi fädäla made beasebegi, fisigämolöla helësei.

¹⁹ Amala helësebegi, Yu dolö amolia amabiola säsebegi, idi elö maade gabugi na beaha aligilo Gini Sisaeamu nie gudi nabuäiala säi. Amai gasoda, na ne fii amolima nafadela hamoila sämolöda helësäla made nelo.

20 Mi amoïe na dili siia beala ado sãmolöie dili misiäia weimelë. Isilale ilia asigia sasilãfûsa neebe amoïe igi ëfë gowe ne begela negei neawela säi.*

21 Amala säsebegi, ilia ema sähalea, Yudia amila dia hamoi amoïe beba nilima made dëdëla ïasi. Nilile nedoo misi amoliage ado made säi. Dia nafade hamoilage made säla ïmelë.

22 Dia helësëi amo nilia nabolöila helësësebe. Mida, sege sulubadelagi sosogo gowe nafade neala sälo amo nilia dawadigi neamelëla säi.

23 Amala sälahilä ilia ema segeyo naabo negesebegi, ili yafie Folo neebea mosöa ami mofiala gege-doi. Gegedosebegi Foloea yosefalï nowela Godea Beaha Maadela Sigi Neebe amoïe ado säla ïahalea mi awala ïaha nebegimu së gäi. Ea Mosese nebegi Ado säla negei amo gadolage, amase, Godeïe bea sälo nefolalo amolia bea säla negei amo gadolage säla ïahalea Yesuïe säi amo dofä gabula helësëmäia säla ïahamu nelö.

24 Amala säla ïasebegi, dolö odoaeada ea ado säsebe amo dofä gabula helësëi. Amase, odoaeada dofä gabulada made helësëi.

25 Amala hamolahilä ili hilimu asigi afädë made negela afiai. Dafidida, Foloea ado afädë wagala sähalea, Eleloi Gesamia bea sälo Aisaeama aligila dilile mäuma mogola säi gabu.

26 Ea sähalea,
Udia dolö amoli neebea awäla ilima sähalea,
Dilia nabahamu nea gasoda, fädäla
made helësëmolömelë. Dilia beahamu
nea gasoda, galone gowe gabula made
beagölemolömelë.

* 28:20: Abosolo 23.6; 24.21; 26.6 amoli bimalo.

²⁷ Amoïe mida, udia dolö amolile asigi dofogai nea. Ili gëhe gai gadoia hedabola made nabelo nea. Ilile siige dofogai nea. Ili siia beala, gëhea nabala, asigia helësëla besusa galebeda, amoda na ili wahilasilabiola sämalola

Aisaeaea säi.

Aisaea 6.9, 10

²⁸⁻²⁹ Amai ameadä gowe helësëmalo. Godeïe damula moholö ado mala amoda udia dolö fii elö amolima fisiga gaila helësëmalo. Ili nabolömelëla Foloea säla wagai.*

³⁰ Foloea mosö e adi amoïe bidi ïalahilä ami gäheo i äudä nelö. Ami nea udia dolö sulubadela e neebea mofusebe amoli obeägila gauia idala nelö.

³¹ Ea Godea Beaha Maadela Sigi Neebe amoïege säla ïala, amase, Dafidilo Geloi Yesu Gelesoïe malage säla olelesa nelö. Bedäla made gelola säla olelesa nebegi, afädëa ema olelemabiola made säi. Hä amo.

* **28:28-29:** Dawadigi dolö odoaea helësësaleada, ado odoage amogi dialeala helësëi. Ado amoda gomalä. [29 Foloea ado säsebegi, Yu dolö amolia awäha nea hilimu mihaläla gëgëla afiai.]

Edolo Bible
Ruth and the New Testament in the Edolo Language of
Papua New Guinea
Sampela hap Buk Baibel long tokples Edolo long
Niugini

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-16

PDF generated using Haiola and XeLaTeX on 16 May 2025 from source files dated 16 May 2025

688323a7-0b01-555d-b52f-07c624ea681b